

**NATIONAL ASSEMBLY OF
SEYCHELLES**

Tuesday 03rd June, 2025

The Assembly met at 09am

National Anthem

Moment of Reflection

*Mr Deputy Speaker in the
Chair*

MR DEPUTY SPEAKER

Mon a dir bonzour tou bann Manm Onorab, tou piblik ki a lekout e pe swiv nou travay pou sa Mardi le 3 Zen. Bonzour e byenveni pou nou travay ozordi. E mon ava dir en bonzour spesyal bann zabitan distrik Larivyer Anglez ki pe swiv sesyon ozordi envite par zot Manm Elekte Onorab Andy Labonte.

E mon fek aprann ki i osi anan en group travayer ki sorti kot Minister Gouvernman Lokal avek Zafer Kominoter ki'n vini pou vin donn en sipor zot Minis ozordi. Me solman mon vwar li en nide enteresan parske souvandfwa i annan en kantite travayer Servis Piblik ki angaze avek Lasanble, solman zot travay apartir en zistans.

Zot ede par egzanp prepar Bidze; zot ede prepar larepons bann kestyon ki vin dan Lasanble Nasyonal, be

solman zot napa zanmen en enteraksyon fizik ek Lasanble Nasyonal. Be kekfw nide ki Minister Gouvernman Lokal avek Zafer Kominoter in vin avek ozordi, i en nide ki lezot Minister ti a kapab osi adopte.

E avan nou pas lo prezantasyon papye mon ava zis donn laparol MNA Labonte pou dir en pti mo byenveni.

HON ANDY LABONTE

Mersi Mr Speaker. Bonzour Mr Speaker, tou koleg Onorab, tou dimoun ki a lekout. En bonzour spesyal tou zabitan Larivyer Anglez ki anler dan Galeri.

Ozordi i en plezir pou mon swet zot labyenveni dan Lasanble. E mon apresye ki zot in vini pou donn sa sipor e i montre poudir zot vreman apresye travay ki zot MNA pe fer e mon nouvo nominasyon pou reprezant zot ankor dan Lasanble Nasyonal. Mersi.

(APPLAUSE)

MR DEPUTY SPEAKER

Mersi Onorab. E mon ava aprezan pas laparol avek Deputy Clerk pou pas lo prezantasyon papye.

(comments off-mic)

MADAM DEPUTY CLERK

Bonzour Mr Speaker. Bonzour
tou bann Manm Onorab.

(comments off-mic)

MR DEPUTY SPEAKER

Mon ti ava demann Lasanble
silvouple pou akord en pe
respe ki letan i annan en
endividi ki i pran laparol nou
sipoze gard silans. Mersi.
Please proceed.

MADAM DEPUTY CLERK

Bonzour tou bann *staff*
Lasanble Nasyonal.

(comments off-mic)

MR DEPUTY SPEAKER

Mon ava demann bann *Whip*
silvouple pou met en disiplin
avek zot *Caucus* respektif.
Mersi.

MADAM DEPUTY CLERK

Bonzour bann viziter dan nou
public Gallery. Mr Speaker,
prezantasyon papye i *comme*
swivan; -

*S.I. 33 of 2025 5.50%
Seven Year Treasury Bond
Debt Order, 2025*

*S.I. 34 of 2025 Tourism
Development (Standards)
(Amendment) Regulations,
2025*

*S.I. 35 of 2025 Tourism
Development (Accommodation
Establishments) (Amendment)
Regulations, 2025*

*S.I. 36 of 2025 Physical
Planning (Fees) Regulations,
2025*

*S.I. 37 of 2025 Elections
(Conduct of Registered Political
Parties and Candidates During
Election and the Remainder of
the Electoral Cycle)
Regulations, 2025.*

E finalman; -

*Office of the Auditor
General – Performance Audit
Report on Effectiveness of the
Methadone Programmes.* Mersi
Mr Speaker.

MR DEPUTY SPEAKER

Mersi Madanm Deputy Clerk.
Donk, aprezan nou pou pran
nou bann *item* ki lo *Order
Paper* pou sa Mardi, e nou
travay prensipalman pou sa
semenn i dominan par
kestyon, *statement*, Mosyon.

E bomaten la nou pou
komans direkteman avek
Questions for Oral Answer e
mon ava demann *Hansard
Reporter* pou kriy *panel*. Mon
vwar lanmen *Leader*
Lopozisyon anler, in- ou
annan en pwen ki oule fer
resorti?

HON SEBASTIEN PILLAY

Mersi Mr Speaker. Mon krwar
piblik i bezwen ganny eksplike
akoz napa *PNQ*.

MR DEPUTY SPEAKER

Non, *hold on, hold on*. Ler ou
lev ou lanmen, *either* i pou en

point of order ou bezwen dir mwan ou pe *raise en point of order* e anba ki *order*.

HON SEBASTIEN PILLAY

Mon pe *raise en matter of privilege* par lefe ki bomaten napa en *PNQ* e ki ou pa pe eksplike aköz.

MR DEPUTY SPEAKER

Non, *hold on*. *Leader* Lopozisyon in vin war mwan konsernan sa size e mon'n dir ek li byen ki anba *Order 31(6)* pou okenn size i konsernan kestyon ki'n ganny refize ou diskrit *privately* avek *Speaker* and not on the floor. And so we are not taking this matter. Mersi.

HON SEBASTIEN PILLAY

Be *why privately*? Ki ou per pou dir dimoun? Dir dimoun laverite? Dir dimoun laverite, aköz ou pa oule konn laverite?

(Interruptions)

HON SEBASTIEN PILLAY

That's what you need to do!

(Interruptions)

MR DEPUTY SPEAKER

Onorab, Onorab Rocky Uranie mon pe demann ou pou ou gard disiplin e pa lev ou lavwa, montre ledwa ver *Speaker*. Zot kapab konsilte *Order 31(6)* ki i dir, e koman Manm Lasanble

nou sipoze ofe avek nou bann *Order*. Mersi.

(comments off-mic)

MR DEPUTY SPEAKER

Eski *panel* ki pe vin zwenn nou bomaten i kapab antre silvouple? Mersi.

(comments off-mic)

MR DEPUTY SPEAKER

Mon ti ava demann Onorab Conrad Gabriel pou kit lasal, e ou kapab retournen ller bomaten. Mersi.

(comments off-mic)

MR DEPUTY SPEAKER

Onorab, mon pe demann ou pou kit lasal trankilman, ale e ou kapab retournen ller. Mersi.

Bon, nou ava aprezan akeyir *panel* ki fek zwenn nou.

(comments off-mic)

(US Members walked out)

(APPLAUSE)

MR DEPUTY SPEAKER

Mersi, nou ava gard silans silvouple. Mersi. Mon ava akeyir aprezan *panel* ki fek zwenn nou. *Panel* sorti kot Minister Gouvernman Lokal avek Zafer Kominoter, dirize par Minis Rose-Marie Hoareau

e i akonpannyen par son Sekreter Prensipal Mr Kevin Perine e Direkter Egzekitiv Mr Romano Songor.

E Minis i annan lo *Order Paper*, kestyon 85 ziska kestyon 93. Alor *welcome* e mon ava pas laparol premyerman avek parti *United Seychelles*, zot tou zot in *walk out*. Kestyon 85 i dan non Onorab Egbert Aglae, alor i tonbe kestyon. Kestyon 86 i dan non Onorab Egbert Aglae, alor i tonbe. Nou al direk lo kestyon 87 ki dan non Manm elekte pou distrik Baie Lazare.

HON FRANCOIS ADELAIDE

Mersi Mr Speaker. Bonzour Mr Speaker, bonzour Minis avek ou delegasyon. Bonzour tou Manm Onorab e bonzour tou bann dimoun dan Galeri.

Dabor Mr Speaker, permet mwan 30 segonn pou remersi tou bann dimoun ki ti vin Konvansyon Dimans, in vremen en sikse e ozordi nou trouve poudir *LDS* i se sa parti ki pou anmenn Sesel ver 2025 pou sa eleksyon.

(APPLAUSE)

HON FRANCOIS ADELAIDE

Prezan mon kestyon pou Minis i al koumsa; -

Eski Minis i kapab donn detay sa Lasanble lo bann fasilite tel ki *bus shelter* e twalet piblik ki zabitan Anse

Boileau e Baie lazare ti ganny promet avek sa devlopman Lotel *Canopy*? Mersi.

MR DEPUTY SPEAKER

Mersi Onorab. Mon ava envit *panel* pou larepons.

MINISTER ROSE-MARIE HOAREAU

Bonzour Mr Speaker. Bonzour tou dimoun prezan e tou dimoun a lekout. Mersi Onorab pou ou kestyon.

Mr Speaker, sa proze i ankor an diskisyon, nou konsyan ki i annan en serten retar, me i enportan note ki sa retar i an deor kontrol Gouvernman. Par kont, bann diskisyon e konsiltasyon i ankor an progre.

Mon napa lenformasyon lo kan ki sa proze pou materyalize, me i reste enn nou bann demars pou realiz li dan le fitir. Mersi Mr Speaker.

MR DEPUTY SPEAKER

Mersi Minis. Onorab Adelaide, ou annan siplemanter.

HON FRANCOIS ADELAIDE

Mersi Minister pou ou repons, Minister dabor mon konpran ki ou pe eksplik nou. Me solman petet mon siplemanter i pou vin koumsa; -

Ordinerman ler bann devloper i vini avek bann program apre ki i annan bann benefis pou bann distrik,

lekel Minister ki sipoze sivre e fer sir ki sa bann promes ki fer i ganny byen note e ki nou trouve ki i annan bokou *follow up* lo la, pour ki nou distrik nou benefisyé?

Akoz ki nou trouve pa bokou letan ler bann *investors* i vini zot fer bokou promes, me solman sa bann promes i al dan vid, ler zot ganny landrwa zot nepli enterese avek Kreol? So, mon ti a kontan konnen, eski lekel sa bann lazans ki sivre sa proze?

E eski Gouvernman Lokal osi i anvoy bann dimoun, bann zofisyé pou vin fer sir ki sa bann proze i ganny note e ki nou fer swivi pour ki sa bann proze i materyalize?

Petet dezyennman Minis, mon konpran ki ou pe dir mwan poudir i pou pran en pe letan, me solman mwan mon krwar poudir nou bezwen met en pe plis presyon, aköz ler mon pe dir ou Anse à la Mouche nou deza annan 2 *bus stop* ki nou zabitan i esper bis dan soley, nou'n donn zot nou bann akse, nou'n donn zot tou nou propriyete ki nou ti espekте poudir nou pou ganny bann keksoz en pe pli vit ki pou soulaz nou.

So, mon krwar Gouvernman i devret met en pe presyon pour ki en- 2 *bus shelters* i vitman sa mon krwar nou kapab fer, 2 twalet piblik mon krwar i senp napa gran

planifikasyon *whatsoever*. Mon krwar sa nou devret met en pe presyon pour ki prosennman nou ganny sa bann Fasilite pou nou dimoun. Mersi.

MR DEPUTY SPEAKER

Mersi Onorab. Mon ava envit *panel* pou larepons.

MINISTER ROSE-MARIE HOAREAU

Mersi Onorab. Mon toutafe dakor avek ou. Mwan ler mon'n vin Minis mon'n zwenn sa proze la e mon'n pran li pou mon rekomans diskisyon ankor, e ler nou'n komans diskisyon ti annan ansanm ki nou tou nou ti pe fer en louvraz kolektif - ti annan bann reprezantan *SIA*, Lenfrastriktir, ti annan bann dimoun Lanvironnman e nou menm koman *Local Government* koman fasilitater.

E mon apresye byen ou bann pwen ki sa bann *bus shelters* nou bezwen pou eparnye sa bann dimoun dan soley e se pour kwa nou komans Minister Gouvernman Lokal nou reste angaze pou nou kontinyen fasilit sa bann diskisyon e fer sir ki dan le fitir sa bann keksoz i materyalize.

Alor nou pa pe kit li la konmsi nou'n *give up*, nou pe *still* an progre. Pa les ou lebra tonbe, aköz konversasyon i ankor pe pase, diskisyon i

ankor pe pase e dan le fitir ou ava vwar ou bann *bus shelters* ek ou bann *toilets* dan Baie Lazare.

So, we are working on it, nou pe travay lo la, nou pou kontinyen nou pa pou zis abandonn sa konversasyon nou pe kontinyen e i pou arive.

MR DEPUTY SPEAKER

Mersi Minister. Lot kestyon i dan non Onorab Arissol, siplemanter.

HON SANDY ARISSOL

Mersi Mr Speaker. Bonzour Minis avek ou lekip, bonzour bann dimoun Larivyer Anglez.

E mon osi mon ti a kontan Mr Speaker, remersye tou bann dimoun ki ti desann pou Konvansyon yer. Premyerman dir zot mersi pou zot sipor e mersi pou zot *endorse* nou koman zot bann kandida.

Dezyenmman mon ti a kontan dir tou bann siporter *United Seychelles* poudir tou zot bann swadizan kandida in taye dan Lasanble Nasyonal e zot in ale. Mon ti anvi demann Minis en kestyon siplemanter lo kestyon Onorab Adelaide Mr Speaker.

Mon ti a kontan demann Minis, an vi ki ou, ou Minis *Local Government* ki sa bann proze normalman i retourn kot ou, eski letan nou pe koze ozordi Minis, apard *Canopy* ki

Onorab Adelaide in mansyonnen, eski nou annan lezot lotel par egzanp lo Mahe, annou dir dan rezyon Nor, Beau Vallon, Bel Ombre i annan okenn lotel ki'n ganny konstrir?

Oubyen ki letan zot ti pe konstrir zot ti promet swa *bus shelter*, swa re sirfas semen, swa okenn lezot proze? Eski dan ou kapasite koman Minis Gouvernman Lokal ou okouran si apard *Canopy* nou annan lezot lotel osi ki'n fer serten komitman e zot komitman pa'n ganny zwenn? Par egzanp parey kestyon Onorab Adelaide pe demande? Mersi Mr Speaker.

MR DEPUTY SPEAKER

Mersi Onorab. *Panel.*

MINISTER ROSE-MARIE HOAREAU

Mersi Onorab. Mersi Mr Speaker. Annefe mwan koman *Ministry of Local Government* mon pa okouran okenn lezot diskisyon, me i pa vedir petet ki napa, me selman pa'n ganny fer avek nou.

Mwan mon'n *involve* dan sa enn kot *Canopy* aköz mon ti vin zwen sa proze kot *Local Government*. Me pou lezot bout, lezot distrik mon pa okouran, me selman i pa vedir ki napa, petet en lot Minister i kapab pli konnen. Mersi.

MR DEPUTY SPEAKER

Mersi *Minister*. Onorab Waven William.

HON WAVEN WILLIAM

Mersi Mr Speaker. Bonzour Minis avek ou delegasyon. Mon osi mon ti a kontan dir en gro mersi bann zabitan Grand Anse Mahe e tou bann sipoter *LDS* ki ti desann pou sa kongre. Ti vreman en sikse e mon'n touzour pare pou travay pou distrik Grand Anse Mahe.

Mr Speaker, mon ti a kontan demann Minis, dan konzonktir devlopman kot nou'n arive ozordi dan Sesel, e sa bezwen pou twalet parey ki loter kestyon in demande pou Anse Boileau avek Baie Lazare - mon anvi demann avek Minis si petet zot pa pe konsider antre an diskisyon avek *Land Transport*; par egzanp Grand Anse Mahe ou annan sa 2 *roundabout* Grand Anse dan krwaze avek Barbarons kot parfwa dimoun i pas en pe letan avan ler zot ganny bis, si zot pe mazin petet met bann twalet avek sa bann *bus shelter*?

Akoz ozordi i en nesesite Minis, si zot ava konsider annan en diskisyon lo la pou fer sir ki dan lavenir nou kapab ganny bann twalet avek bann *bus stop* ki mon kapab dir en *transit point* parey dan krwaze Grand Anse avek Barbarons? Mersi.

MR DEPUTY SPEAKER

Mersi Onorab. Lefe ki *scope of question* ti lo devloper *Canopy* in promet laba dan Baie Lazare, eski par egzanp Avani ti promet Grand Anse *then* konmsi nou a kapab navig dan sa *scope of the original question*, si Minis kapab konfirm koumsa.

MINISTER ROSE-MARIE HOAREAU

Sel keksoz mon ti pou dir Mr Speaker, se ki i en *proposal* ki Onorab William in met devan e ansanm avek li nou kapab diskite sa en pe plis, e vwar son posibilite. Mersi.

MR DEPUTY SPEAKER

Mersi *Minister*. Otreman Lotorite Distrik Grand Anse Mahe i kapab met sa dan zot *community project* pou 2026. Parey Mont Buxton nou'n fer enn kot kort. Nou pou pas lo lot kestyon aprezan aköz napa ankor siplemanter lo la, i pou kestyon limero 88 e ankor enn fwa i dan non Manm Elekte pou distrik Baie Lazare.

HON FRANCOIS ADELAIDE

Ankor enn fwa mersi Mr Speaker. Minis, mwan mon kestyon i al koumsa; - eski Minis i kapab donn detay Lasanble Nasyonal lo progresyon *District Road Naming Project*?

MR DEPUTY SPEAKER

Mersi Onorab. Mon ava envit *panel* pou larepons.

MINISTER ROSE-MARIE HOAREAU

Mersi Mr Speaker. Mersi Onorab pou ou kestyon. Proze *District Road Naming*, i form parti en proze ki pli larz ki apel *National Addressing System Project* e an *short* nou apel li NAS.

Sa proze i ganny dirize par Minister Finans, Planifikasyon Nasyonal e Komers, an kolaborasyon avek *Seychelles Postal Services* avek sipor Minister Gouvernman Lokal ek Zafer Kominoter. Mon Minister ek Lotorite Distrik in zwe en rol vreman enportan dan sa legzersis, ki ti annan pou fer avek idantifikasyon bann semen, lanrezistremman e propozisyon bann non semen.

Sa bann lenformasyon in fini ganny soumet kot biro *GIS* e zot pe finaliz bann dokiman nesaser. Mon annan plezir pou konfirman ki Proze Nasyonal - (*I'm sorry*)- mon annan plezir pou konfirman ki Proze *National Addressing System* i ankor an mouvman e i lo en staz ase avanse.

Bann detay i *comme* swivan; - o size demarkasyon distrik, sou distrik e non semen, sa in konplete e in deza

anrezistre dan sistenm *GIS* kot Minister Later ek Labita. Me par kont Mr Speaker, Departman Transpor pe verifye tou sa bann semen avan ki i ganny proklanmen.

Lannen pase, Proze NAS ti ganny prezante avek *Cabinet of Ministers* e ti ganny aprouve. A sa staz osi i enportan mansyonnen ki Lalwa pou NAS in ganny son premye *draft* par Biro *Attorney Zeneral* e in ganny soumet avek bann departman konsernen pou okenn komanter.

Komite i ankor pe travay pou ariv lo son pwen lenplimantasyon, e i vreman enportan ki tou i al dapre plan aköz sa proze i tre, trez enportan lo nivo nasyonal e enternasyonal.

Rekomandasyon pou en konsiltan enternasyonal in ganny soumet e konsiltan pou dan pei an Zilyet 2025. Avek larive en konsiltan, nou espekte ki travay pou komanse dan distrik Beau Vallon ki'n ganny swazir pou demar sa Proze Pilot.

Mr Speaker, mon oule sezi sa loportinite pou remerisi tou bann *MNAs*, tou bann *DAs* ek zot *staff*, tou bann volonter ek tou bann dimoun dan kominote ki'n met lanmen ansanm pou fer sa travay ki ti vreman kompleks e entansif. Nou vreman apresye zot

kontribisyon. Mersi Mr Speaker.

MR DEPUTY SPEAKER

Mersi Minister. Mon ava envit Onorab Adelaide pou siplemanter.

HON FRANCOIS ADELAIDE

Minister, mersi pou ou larepons. I montre ki Gouvernman Lokal nou pe fer en travay me solman nou pa pe war zot piblisite zot pe fer.

So, mon krwar sa i bann keksoz ki kantmenm i pa ankor ariv lo finisyon mon krwar sa i bann lespwar ki nou devret pe donn nou bann Seselwa deor la pour ki byento nou pou arete dir kot madanm entel anba ros, sepa kot gro pye mang, me mon felisit ou avek ou lekip kontinyen sa bon travay.

E petet mon ava demann ou petet si ou annan en dat apepre, mon konnen poudir ou pou fer Beau Vallon en *pilot project*, petet pou Mahe petet mon pa pou dir Mahe aköz bann dimoun Praslin pou oule fer problem ek mwan. So, pour ki Sesel antye pou ki nou kapab benefisye avek sa bon prodwi ki zot in fer, petet ki lannen konmsi nou pe mazine? Mersi.

MR DEPUTY SPEAKER

Mersi Onorab. Mon ava envit *panel* pou larepons.

MINISTER ROSE-MARIE HOAREAU

Mersi Mr Speaker. Onorab, mon ti a voudre annan en *timeframe* pou donn ou, me selman sa mon bezwen konsilte Minister Finans, ler sa konsiltan i arive, konmsi progre pe- travay pe bouze.

Wi, parey ou dir nou fer bokou travay *behind closed doors* me selman nou pou, mon pa pou kapab donn ou en *timeframe* egzakt la, me selman sa petet apre serten diskisyon avek Minister Finans ek *Seychelles Posters Services* ek tou bann dimoun konsernen, bann dimoun kot *GIS* petet apre nou a kapab donn ou en *timeframe*. Mersi.

MR DEPUTY SPEAKER

Mersi *Minister*. Mon ava envit Onorab Arissol pou kestyon siplemanter.

HON SANDY ARISSOL

Mersi Mr Speaker. Mersi Minis pou ou bann larepons.

Mon ti a kontan demann Minis si sa travay ki zot pe fer spesyalman sa enn ki pou komanse, zot pe komanse zot pe komans li ou'n dir dan distrik Beau Vallon, si sa travay ki zot pe fer zot pe fer, zot pe fer li an konsiltasyon mon'n kontan ler ou'n mansyonn *postal services*.

Eski zot pe fer li an konsiltasyon avek *postal services*, zot pe osi konsilte bann dimoun kekfwa ki reste dan sa bann rezyon an relasyon avek lesplikasyon sa landrwa akòz in ganny apele Dan Noe? Akòz montanny Noe i par lao. Eski i annan sa konsiltasyon avek tou bann lazans konsernen pou nou annan sa non apropiye?

Dezyenmman mon ti a kontan demann ou si zot osi pe pran kont bann non, les mon apel li mon a servi sa non bann non barok, par egzans dan Bel Ombre nou annan *Canada*, nou annan *Cameroon*, nou annan Kosovo, eski dan sa bann travay ki zot pe fer, zot pe mazin osi pou nou annan bann nouvo non ki ava koresponn avek Leta Sesel ozordi, avek latmosfer distrik, olye annan ban pti non ki nou ti zis deservi pou konnen kot entel ek entel i reste? Mersi bokou Mr Speaker. Mersi Minis.

MR DEPUTY SPEAKER

Mersi Onorab Arissol. Mon ava envit *panel* pou larepons.

MINISTER ROSE-MARIE HOAREAU

Mersi Mr Speaker. Mersi Onorab Arissol. Annefe wi, se pour kwa mon pe remersye bann dimoun kominote, akòz bokou zot dan bann distrik

respektif se bann manm kominote ki'n vin donn nou ban *DAs* ek lezot lazans *involve* bann sizesyon, se zot ki konn listwar akòz sa semen i apel tel non.

Alor, sa i en legzersis ki'n *involve* tou sa bann dimoun ki annan en keksoz pou fer ek sa semen ki nou pe al swa kit son non parey, swa re nonm li. So, i annan bokou *involvement* kominote ladan, se pa nou ki deside. Se sa tim parey nou dir *on the ground* ki rod sa bann *history* i vin deryer sa bann non, e apre finalman zot vin lo en konsansis.

E dan sa legzersis, sa bann non petet en pti pe drol, sa osi i ganny anmennen ladan, zot ganny demande konmsi kestyon i pase akòz ti apel koumsa? Eski nou devret sanz li? Si wi, ki nou pou rapel li?

So i en konversasyon ki ti vreman parey mon dir ti konpleks, ti ase entans, me selman tousala in ganny fer an prenon kont listwar ki sa bann dimoun dan distrik i konnen ki'n *share* avek bann volonter ek mon bann *DAs* ek bann *MNAs* zot menm akòz zot tou zot in pran par ladan. Mersi Mr Speaker.

MR DEPUTY SPEAKER

Mersi *Minister*. Mon pou donn laparol Onorab Bistoquet.

HON ANNE BISTOQUET

Mersi Mr Speaker. Bonzour tou Manm Koleg Onorab, tou dimoun dan Galeri, tou dimoun a lekout.

Mr Speaker, permet mwan osi pou remersye tou dimoun ki ti desann pou vin nou Konvansyon, sirtou sa gran group dimoun Roche Caiman ki'n pare pou vin donn nou sipor. E i annan ki pe kontinyelman vini nou dir zot *welcome onboard*, akòz LDS nou en gran fanmir ki *welcome* tou dimoun.

Mr Speaker, mon kestyon pou *panel* i, eski zot kapab eksplik nou ki bann prosedir ki bezwen ganny swiv ler pe al donn nou'n en semen, sirtou bann prosedir legal? Si zot kapab eksplik Lasanble e manm piblik osi pou nou ganny en konpran ki fason ki zot fer zot bann prosedir? Mersi.

MR DEPUTY SPEAKER

Mersi Onorab. *Panel*?

MINISTER ROSE-MARIE HOAREAU

Mr Speaker, si ou permet mwan petet mon a pas laparol ek ED Songor silvouple?

MR DEPUTY SPEAKER

Sertennman. Mr Songor.

EXECUTIVE DIRECTOR ROMANO SONGOR

Mersi Mr Speaker. Bonzour tou bann Onorab, bonzour Mr Speaker.

Onorab, dan sa prosesis ki Gouvernman Lokal ti anbark lo la avek Minister Finans, i annan en *draft* ki'n deza ganny *submit*, e ladan nou fer sir ki premyerman bann non ki pe ganny selekte i pa bann non ki pou kontradir oubyen bann lenformasyon ki pe ganny anmennen i pa bann lenformasyon ki pou kontradir sa prosesis.

E bann DA ansanm avek bann volonter ki pe ed zot, zot asize zot analiz sa bann lenformasyon e letan nou *submit* avek lofis GIS, nou vwar poudir si sa distrik i en legzanp ouswa sa sou distrik ki sa non i pe ganny adopte i reflekte vreman sa sou distrik?

Akòz i annan bann non ki nou'n gannye ki swa non dimoun oubyen sinyatir, e demen nou pa anvi ki okenn manm fanmir i pourswiv Gouvernman.

So, otan ki posib nou pe *avoid* pou nou pran bann non endividyel oubyen non sinyatir dimoun. Nou pe plizoumwen pran bann non oubyen bann mon kapab dir sa bann lenformasyon ki reflekte direkteman avek sa distrik oubyen sa sou distrik. Mersi.

MR DEPUTY SPEAKER

Mersi Mr Songor. Mon ava donn laparol Onorab Georges Romain.

HON GEORGES ROMAIN

Mersi Mr Speaker. Minis, bonzour ek ou *panel* e bonzour tou dimoun dan Galeri.

Minis, mon kestyon i an vi ki nou pe byensir pe demark sa bann semen avek bann non apropiye parey nou tou nou konnen dan nou bann non parey nou tann nonm Kandahar. E pou mwan sa mon krwar i pou fasilite osi *courier system* kekfwa ki i ava ede pli byen pou dimoun kapab ariv kot bann lakour. Mon kestyon alors pou Minis, ki bann lezot benefis ki zot pou tire atraver sa?

Aprè mon dezyenm kestyon an vi ki ler nou pou fer sa legzersis mon mazine dan tou distrik, eski nou pe mazine ki nou pou met sa bann non semen apre standar parey nou annan dan lavil en legzanp kot sa bann non semen pou ganny plante partou dan distrik? Eski sa legzersis pou apre sa pou ganny fer? Sa i mon kestyon Minis. Mersi Mr Speaker.

MR DEPUTY SPEAKER

Mersi Onorab Romain. Mon ava envit *panel* pou en larepons.

MINISTER ROSE-MARIE HOAREAU

Mersi Mr Speaker. Onorab, mon kapab dir ou an bref, parske parey mon dir ou i Minister Finans ki pe *lead* sa legzersis, selman nou'n en pe *involved* mon a dir ou en pti pe sa ki nou, nou konnen apre mon a demann *ED* Songor pou petet azout enn de mo.

The end result, ler – tou sa legzersis, son pwen final i pour ki tou bann non tou bann semen, -(pardon)- tou bann semen e menm bann lakaz pou annan en fason ki pou annan en referans. I pou *involve* osi parey nou konnen bann *postcode*. Koman? Ki kantite sif ki pou annan koman pou ete sa pli tar nou a ganny detay.

Me selman le bi sa legzersis se ki tou bann lakaz dan tou distrik i a kapab ganny idantifye par nenport lotorite, ki lapos, ki petet bann dimoun Ankour ki pe al servi en somonn, ki petet bann pou en rezon enternasyonal ki zot bezwen lenformasyon lo tel landrwa, alor an gro se sa ki tou lakaz pou annan en *identification*.

E sa i pou ganny fer par sa legzersis ki nou pe fer *naming the roads*, apre annan son *postcode* ki pou petet relye avek sa teren. Alor, wi, se sa le bi se sa, pour fer keksoz pli fasil pou idantifye kot tel lakaz

i ete. Se sa son bi, *the aim of the exercise*. Mersi Mr Speaker.

Zot dir mwan mon'n fini reponn, pa bezwen Mr Songor i koze.

MR DEPUTY SPEAKER

Onorab Romain, i annan en dezyenm pwen ki in manke?

HON GEORGES ROMAIN

Wi, Minis mon dezyenm pwen ti, mon dezyenm kestyon ti apre sa legzersis si zot annan nide pou met bann *sign* semen ki pou annan sa fason standar parey non anndan lavil? Mersi.

MR DEPUTY SPEAKER

Mersi Onorab.

MINISTER ROSE-MARIE HOAREAU

Mersi Onorab. *Once* bann semen i ganny proklanmen aköz ou pa kapab zis donn non en semen, ou bezwen nonm li apre proklanm li. Ler in proklanmen in ganny legalize ou kapab dir, *then* ou kapab met son *sign* ou konpran? Ou a met son *signage* poudir sa i tel semen.

Me selman ou kapab *propose, you propose the name of the road* me i bezwen al pli lwen pou li ganny proklanmen, vin legal apre la nou met son lansenny. Mersi.

MR DEPUTY SPEAKER

Mersi *Minister*. Prosen Manm lo lalis i Onorab Richard Labrosse.

HON RICHARD LABROSSE

Mersi Mr Speaker. Bonzour tou dimoun ki a lekout, bonzour bann envite dan Galeri. Mr Speaker, mon'n ekout Minis ki'n donn en bon pe larepons bomaten e mon ti a kontan osi remersye li ek son lekip pou travay ki zot in fer pou nou distrik pandan sa 4 an ki'n pase.

Minis, mon pa ti a- i pa en kestyon en, kekfw a i kapab en sizesyon - Sa travay ki ou pe fer la ozordi i en travay vreman enportan ki mon war ou'n met en bokou lenerzi lo la. Me selman en keksoz ki mon ti a kontan sizere avek ou, dan sa travay osi ti ava bon osi ou ganny laspirasyon bann zanf an ki pe lekol.

La mon pe mazin lekol Plaisance segonder oubyen primer, kot kekfw a mon pa konnen ki mannyer Ladministrasyon Distrik kekfw a dan ou departnan ti kapab anmenn sa devan kot zanf an osi ti a kapab partisipe pou donn non zot kominote kot zot reste, aköz parey nou konnen zanf an i fitir ozordi ek demen.

So koumsa nou fer sir ki tou dimoun osi ganny sans

partisip ladan. Mersi Mr Speaker.

MR DEPUTY SPEAKER

Mersi Onorab. *Panel?*

MINISTER ROSE-MARIE HOAREAU

Mersi Onorab. Ou pwen i valab, e i ava form par nou diskisyon *going forward*. Mersi.

MR DEPUTY SPEAKER

Mersi *Minister*. Onorab Mondon.

HON TERENCE MONDON

Mersi Mr Speaker. Bonzour Minis avek ou lekip. Mon premye parti mon kestyon in fini ganny adrese akòz ti lo sa *postcode*, si zot pou enkli dan sa proze.

E mon dezyenm parti, ou konnen dan distrik ler nou pe fer en Proze Semen, nou tant pou servi sinyatir pou nonm sa proze. E par egzanp ou annan en Proze Semen Alcide/Jean-Louis Takamaka.

Eski dan sa travay aprezan, dan distrik aprezan, eski distrik pou bezwen vin avek en non pli apropiye, ouswa zot pou mentenir sa fason fer, kot distrik i donn en non abitrer, apre ki plitar sa semen i ganny son non. Mon pe koz ou en nouvo semen ki ganny fer dan distrik. Mersi Mr Speaker.

MR DEPUTY SPEAKER

Mersi Onorab. *Panel*.

MINISTER ROSE-MARIE HOAREAU

Mersi Mr Speaker. Mon pou les *ED* Songor reponn sa kestyon silvouple.

MR DEPUTY SPEAKER

Mersi.

EXECUTIVE DIRECTOR ROMANO SONGOR

Mersi Mr Speaker. Mersi Onorab pou ou kestyon.

Onorab, par egzanp ou konnen poudir dan sa Proze Alcide *Road* Takamaka, si i annan en benefis ki sa manm kominote in donn sa komite, byensir si in donn son later oubyen in kontribye signifikan dan sa proze alors i annan serten konsiltasyon ki bezwen ganny fer ant li avek Lotorite Distrik e osi byen ki bann manm kominote e la nou agree poudir *ok* sa i non ki nou pou *name* sa semen.

Me pour le moman sa proze i ganny nonmen lo sa non, akòz lefe se ki i annan parey ou konnen serten negosyasyon ki'n ganny fer avek sa propriyeter pou kapab enplimant sa proze. Mersi Mr Speaker.

MR DEPUTY SPEAKER

Mersi Mr Songor. Dernyen enterven an lo sa enn kestyon Onorab William.

HON WAVEN WILLIAM

Mr Speaker, mersi kestyon in ganny demande. Mersi.

MR DEPUTY SPEAKER

Mersi Onorab. Donk, nou pou bouz lo lot kestyon aprezan. Sa i kestyon limero 89 e i dan non Manm Elekte pou distrik Larivyer Anglez.

HON ANDY LABONTE

Mersi Mr Speaker. Kestyon i al koumsa; -

Eski Minis i kapab dir Lasanble dan ki lespri sa *post supervisor* pou *general attendance* in ganny aboli kot Ladministrasyon Distrik e ki nouvo striktir *staffing* Ladministrasyon Distrik? Mersi.

MR DEPUTY SPEAKER

Mersi Onorab. Mon ava envit *panel* pou larepons.

MINISTER ROSE-MARIE HOAREAU

Mersi Mr Speaker. Mersi Onorab. Mr Speaker, Minister pa'n aboli *post work supervisor* dan bann distrik. Par kont nou ti revwar sa *post field technician* pou fer li vin *general attendant*. Sa i akòz sa bann *field technicians* pa ti dan en kad lanplwa formel.

Sa bann sanzman ti byen merite ki ozordi koman en Gouvernman responsab, sa group travayer in kapab antre dan Lalwa formel, *-(sorry)-* ki sa group travayer in kapab antre dan lanplwa formel e benefisyè bann benefis ki Lalwa Lanplwa i permet en travayer zour.

Sa ki konsern sa *post work supervisor, Executive Management team* dan Minister Gouvernman Lokal ek Zafer Kominotè i an diskisyon pou revwar ki pli bon fason ki nou kapab itilize *skills* sa group dimoun dan en fason pli efikas, avek bi pou kontinyen amelyor kalite servis lo nivo distrik.

Sa bann sanzman i anliny avek plan stratejik nou Minister. Pou le moman napa okenn desizyon ki'n ganny pran, me sa size i an diskisyon. Mersi Mr Speaker.

MR DEPUTY SPEAKER

Mersi *Minister*. Onorab Labonte siplemanter.

HON ANDY LABONTE

Minis, petet dezyenm parti kestyon striktir *staffing* Ladministrasyon Distrik si ou ti kapab elabor lo la.

Apre mon vreman apresye ki ou annan distrik aker, petet dan lespri parey Larivyer Anglez i en distrik ki demann bokou, ou konnen i

annan bokou travay pou fer dan distrik e nou war poudir sa pozisyon *supervisor* ti vreman itil.

So, eski i vedir nou pou war ki i pou annan sa sipervizyon lo bann travayer ki pe fer bann travay parey netway dan bann - sirtou bann pti kanton kot parfwa petet *LWMA* pa vreman pe touse pou netwaye. Eski petet zot pe mazin pou get bann distrik ki vreman bezwen sa *work supervisor*, latansyon spesyal? Mersi.

MR DEPUTY SPEAKER

Mersi Onorab. *Panel?*

MINISTER ROSE-MARIE HOAREAU

Mr Speaker, permet mwan pou les *PS* Perine reponn silvouple.

MR DEPUTY SPEAKER

Mersi. *PS.*

PS KEVIN PERINE

Mersi Mr Speaker. Mersi Mr Speaker. Mersi Onorab, pou ou kestyon. E avan mon reponn mon ti a kontan *welcome* nou bann *staff* ki anler dan *Gallery*.

Onorab, letan nou pe koz lo *work supervisor* i en keksoz parey Minis in nonmen ki an diskisyon. Akoz letan mon pe get lo lalis ki mon annan zis 8 *work supervisors so far* ki nou

annan dan Sesel. E laplipar distrik napa *work supervisor*.

Diskisyon ki nou pe anmennen pou lavenir, petet pou nou revwar *skills* sa bann travayer e revwar ki meyer fason nou kapab servi zot dan en fason pli apropiye dan distrik. Me pour le moman sa 8 ki la i deza reste.

E an term *staffing* pou bann distrik, mazorite distrik zot *staffing* ki enkli *DA*, *office manager*, *office assistant* *security* avek *work attendant*, sa i leka dan tou distrik. Me selman apropo *work supervisor* ki le fitir pou *work supervisor* sa i diskisyon ki nou bezwen ganny fer.

E i pa vedir ki zot pe fer per bann *work supervisors* zour nou pe koz zot fitir, i vedir ki nou bezwen revwar e revwar zot plasman kote zot sipoze ale e sa i a vin letan bann diskisyon i fini ganny fer eternalman. Mersi.

MR DEPUTY SPEAKER

Mersi *PS*. Mon pou donn laparol Onorab Roucou pou siplemanter.

HON MICHEL ROUCOU

Mersi Mr Speaker. Bonzour *a tous*, bonzour tou dimoun ki ozordi pe rann nou en pti vizit kot Lasanble.

Minis, si ou kapab dir ek nou pou benefis piblik deor, ki responsabilite en *work*

supervisor, konmsi ki i fer kot distrik, ki son responsabilite ki i desarze? Mersi.

MR DEPUTY SPEAKER

Mersi Onorab. *Panel*?

MINISTER ROSE-MARIE HOAREAU

Mersi Onorab. Mr Speaker avek permisyon, *PS* Perine i ava pran sa kestyon *please*.

MR DEPUTY SPEAKER

Sertenman. *PS*.

PS KEVIN PERINE

Mersi *Minister*. Mersi Onorab. Responsabilite en *work supervisor* se pour *basically oversee* bann *office*, bann sa ki nou apel *field technician* avan. Sa ki nou oule vwar ki apel ki mannyer nou apel zot la a ler aktyel? *General attendant*, *yes*.

So, me parey mon'n mansyonnen ki i zis serten distrik ki ti annan sa bann dimoun, me avek kou bidzeter osi eski i neser pou nou annan en *work supervisor* dan sak distrik, oubyen eski nou revwar nou fer li vin lo kote rezyonal ki sa 8 ki la i kapab ganny plase dan diferan rezyon pou *oversee* egzaktaman sa bann louvraz ki sa bann *general attendant* i fer.

So, parey mon'n mansyonnen en diskisyon ki

pe *go on* a ler aktyel kot Minister Gouvernman Lokal e bann *work supervisor* zot ava konnen vremen ki mannyer nou pou servi zot dan en fason pli byen dan le fitir. Mersi.

MR DEPUTY SPEAKER

Mersi *PS*. Mon pou donn laparol Onorab Loizeau.

HON NORBERT LOIZEAU

Mersi Mr Speaker. Minis, premye- *PS* in abord en pti pe sa kestyon ki mon ti pe vin demande, aköz nou dan distrik Bel Air nou napa *supervisor* se *DA* ek *OM* ki zwe sa rol *supervisor*.

Kestyon in adrese. Me selman mon anvi konnen mwan, sa bann *field workers* la ki nou pe koz lo la, eski zot sipoze travay zis kot Ladministrasyon Distrik? Zot sipoze al travay an deor? Parey sa kort Roche Caiman ki *MNA* zanmen i netwaye depi sepa konbyen letan eksi i permet zot al fer sa?

E, vi ki zot pe travay deor, eski i annan bann anterm en lasitans pou zot anka i ariv en keksoz avek zot? Eksi tousala i an plas pou fer sir ki zot, zot kondisyon travay i *ok* konmsi? Mersi.

MR DEPUTY SPEAKER

Mersi Onorab. *Panel*.

MINISTER ROSE-MARIE HOAREAU

Mersi Onorab. Mersi Mr Speaker. Zis ma reponn premye bout apre PS i a pran lo dezyenm bout silvouple.

Kot *Local Government* nou travay koman en tim, e bann DAs zot annan en bon lantant antre zot. Par egzanp si en DA dan son distrik i vwar poudir i annan tel louvraz pou ganny fer, me sa 2 dimoun ouswa sa en dimoun ki kot li i pa pou ase pou *tackle* sa louvraz, alor, zot kontakte zot bann koleg DA, zot fer en plan travay nou pret travayer ek kanmarad pou nou fer serten louvraz.

Me *the day to day work* sa zot fer normalman, me selman se sa *the spirit of teamwork*. Nou annan resours dan diferan distrik, zour ou bezwen ou bann resours, *you pull them in together* e nou fer sa travay.

So, nou esey nou mye pou maksimiz lefikasite e sa i deza en keksoz ki an pratik vizavi bann *field technicians*, bann *general attendants*. Alor, sa i pe mars divinman byen, alor toultan i annan sa sipor enn pou lot. PS, petet ou a koz lo lot bout silvouple. Mr Speaker, avek ou permisyon.

MR DEPUTY SPEAKER

Sertenman. PS.

PS KEVIN PERINE

Mersi Minis. Mersi Onorab. Onorab, bann *general attendants* zot manda osi se vwar en pti pe Biro Ladministrasyon Distrik ki mazorite Biro Ladministrasyon Distrik a ler aktyel ki li osi okip biro bann MNA.

Savedir letan mon dir sa i netway deor, fer en pti pe lanbelisman deor e osi zot osi ede avek fer bann lezot fasilite ki distrik i annan parey bann pti laplenn ki pa tonm anba NSC pou al netwaye. E de fwa osi menm si nou annan *general attendant* dan laplipar distrik. Me parfwa osi nou bezwen plis mendev pou fer sa bann netwayaz kot la nou rod nou brigad nou mobilize brigad i vini koman en aktivite e zot donn lanmen netwaye.

An sa ki konsern lasirans pou okenn lensidan ki arive avek zot, sa Gouvernman i fer provizyon atraver si nou annan okenn lensidan ki arive, la byensir nou bezwen fer *Public Service Bureau* konnen e AG's Office konnen e la nesaser i ganny fer pou okenn konpasyon ki bezwen ganny peye. Mersi.

MR DEPUTY SPEAKER

Mersi, PS. Mon pou donn laparol Onorab Arissol.

HON SANDY ARISSOL

Mr Speaker, mersi. Mon kontan diskisyon ki *PS* avek Minis in entrodwir an relasyon avek bann *field worker*. Parske kot nou kapab annan bann lesanz travay ant distrik avek distrik avek mwens resours ki nou annan.

E mon ti a kontan alor demann avek Minis, byensir Mr Speaker, letan nou pe koz *field worker*, eski *Local Government* zot osi enkli sa avek lezot travayer ki nou annan lo nivo distrik? Par egzanp kot mon apel en lepok Denise Clarisse ti *DA Beau Vallon*, li menm ki ti *DA Bel Ombre* kot mwan, letan nou ti napa.

So, eski *Local Government* zot ankouraze pou nou fer sa lapartaz *staff*? Zot pa pou zanmen ganny tou *staff* parey tou Minister e nou konpran e nou apresye travay ki *Local Government* i fer sirtou lo kote nou distrik.

So, eski *Local Government* zot annan sa lapartaz kot en distrik sirtou si dan son rezyon i kapab asiste en lot distrik dan okenn evantyalite. Par egzanp Minis letan ti annan dezas Cascade, tou bann *DAs*, *MNA* nou ti rasanble ansanm pou nou soulaz Cascade. Zis parey dan rezyon Nor nou ti annan plizyer ki ti vini pou vin ed nou avek dezas nou ti pe fer.

Eski zot ankore annan sa lenerzi, sa lapartaz kot ou Minister Minis i kapab ed lezot distrik kekfwa ki *short* lo en *staff* oubyen 2 *staff*? Mersi bokou Mr Speaker.

MR DEPUTY SPEAKER

Mersi Onorab. Mon envit *panel* pou larepons.

MINISTER ROSE-MARIE HOAREAU

Mersi Onorab. Mersi Mr Speaker. Onorab, kot *Local Government* sa i en keksoz ki mon fyer; mon fyer aköz mon tim zot toultan la pou kanmarad, ou pa bezwen ni demann zot.

Ler en dezas i arive, i kapab en dife dan en distrik, si par egzanp mwan mon en da sa distrik mon reste pli lwen me en *DA* ki reste pli pre i pou ariv lo teren avan *DA* sa distrik limenm. Alor, konmsi in vin en labitid sa - nou'n kre en kiltir *teamwork* kot *Local Government*.

Sa i arive, nou vwar li toultan ler i annan en dezas ou toultan war en lot *DA* pe donn sipor, sa *DA* ki konsern sa distrik. Parey ou'n dir si en *DA* i dan vakans, *either* i lo *sickleave* ouswa i lo *annual leave* en lot *DA* i zet en koudey lo son distrik i a fer 2 zour, 3 zour kot li apre 2 zour kot lot en fason ki sa bann *staff* ki la

dan sa biro i pa santi zot konmsi zot napa gidans.

Nou toultan fer sir ki nou annan sirveyans lo nou bann *teams* dan distrik, e dan biro kot nou osi i parey. E sa ki goulou an en tim ki motive, en tim ki *committed to the work*, e en tim ki travay byen ansanm.

Me sa i bezwen en kiltir ki ou kiltive ou menm ou met parmi ou bann *staff* apre zis labitid ou pa bezwen lev en telefonn pou dir en *DA* al ed entel, led in fini arive, aköz zot fer li avek zot pasyon ek zot leker, alor mwan mon tre fyer mon tim kot *Local Government*. Mersi.

PS oule azout en keksoz? Mr Speaker *PS* i kapab azout en keksoz silvouple?

MR DEPUTY SPEAKER

Mersi. Laparol pou Mr Perine.

PS KEVIN PERINE

Mersi Mr Speaker. Onorab, Minis in tous preski tou keksoz an regardan lafason ki nou travay.

Me selman petet ou kestyon ti vize en pti git plis lo *general attendant* lafason pou partaz *staff*. E dan menm laliny ki *DA* i fonksyonnen i arive osi parey de fwa nou annan bann *general attendant* ki swa ki dan konze *let's say long sick leave*, la nou pret avek en lot distrik 2 fwa par semenn pou al ede.

E lo kote *management* ou'n mansyonn non Mrs Denise Clarisse kot nou tou nou konnen Mrs Denise Clarisse i ofisyelman en kandida pou *LDS*, in piblik tou dimoun in vwar. E Mrs Marie avek Vesna zot ofer zot menm pou *oversee* departman Mrs Clarisse la zis ou vwar sa lantant kote i deza vini e sa i dekoulo osi i komans anler lo nivo *management* ki nou dekoulo li anba avek tou nou kous nou *staff*. Mersi.

MR DEPUTY SPEAKER

Mersi *PS*. Sa ti dernyen entervenans lo kestyon 89. nou pou aprezan bouz lo kestyon 90 ki ankor dan non Manm Elekte pou distrik Larivyè Anglez.

HON ANDY LABONTE

Mersi Mr Speaker. Kestyon i lir koumsa; -

Eski Minis i kapab dir Lasanble si i dan plan son Gouvernman pou konstri en nouvo Sant Kominoter Larivyè Anglez vi ki ansyen Sant Kominoter in ganny vann par parti politik *United Seychelles (US)*? Mersi.

MR DEPUTY SPEAKER

Mersi Onorab. Mon ava envit *panel* pou larepons

MINISTER ROSE-MARIE HOAREAU

Mersi Onorab. Mersi Mr Speaker. Onorab, depi ki ansyen VP Meriton ti la, dan son kapasite koman Prezidan Parti Lepep, ladministrasyon aktyel ti'n deza komans negosyasyon e diskisyon pour ki bann propriyete ki US in gannyen i ganny remet avek Leta pou deservi Sesel.

Sa diskisyon ti kontinyen avek ansyen Prezidan Faure. Me, anba nouvo *management* US, sa bann negosyasyon in tonm dan delo. I regretab pou vwar ki landrwa ideal pou konstrir en Sant Kominoter dan Larivyer Anglez in ganny vann par US avek en biznes prive.

Pli sagrinan ankor se ki zot pa ti ni menm ofer Gouvernman pou aste sa propriyete, ki nou ti'n kapab servi pou konstrir en Sant Kominoter ki ti a deservi bann zabitan sa distrik.

Koman ou konnen i annan en gran mankman teren dan distrik Larivyer Anglez, me nou reste an diskisyon avek plizyer lazans pou esey nou mye pou trouv en landrwa apropiye pou konstrir en Sant Kominoter alavenir. Mersi Mr Speaker.

MR DEPUTY SPEAKER

Mersi Minis. Siplemanter Onorab Labonte.

HON ANDY LABONTE

Mersi Minis. Minis, dan ou larepons ou'n fer resorti ki ti deza annan en negosyasyon avek Dirizan Parti US avan, pou petet war pou retourn bann propriyete ki US ti'n gannyen. E nou konnen poudir dirizan parti konmela se Dr Patrick Herminie ki i kandida Prezidansyel pou zot parti pou sa eleksyon.

So, Minis, i montre poudir i annan en vremen, i napa Sesel aker, i *sad* pou sa e zabitan Larivyer Anglez i ti a kontan konnen si petet dan lespri ki- aköz sa sant ti vremen itil, pa selman pou bann zenn me osi pou bann trwazyenm az.

E ozordi nou annan bann zabitan Larivyer Anglez la anler ki mon konnen zot leker i fermal ler zot tann sa, e nou, nou ti a kontan ganny en sant, e parey ou'n dir poudir later i vremen limite.

So alor nou war poudir nou annan en stad lanmizik dan distrik e sa stad lanmizik i la, bokou fwa nou bann zabitan i dir i en *disturbance*, me nou, nou konnen poudir menm mizisyen osi i bezwen landrwa pou zot performen.

Be petet dan lespri, dan le fitir, petet pa soudan, petet get sa stad lanmizik si ti kapab *convert* li *in to* en petet en *multifunctional* fasilite kot zabitan distrik vi ki nou konnen Sant Kominoter i en

landrwa kot dimoun i defoule, petet ti kapab vin sa landrwa ideal kot zabitan ti kapab servi li itiliz li pou kapab benefis nou trwazyenm az e osi byen nou bann zenn, aköz zot napa landrwa pou vremen defoule.

Apré petet mon dezyenm keştyon Minis, ou konnen mwan mon menm mon mon'n deza sey negosye e i ti ganny dir poudir pa pou vann. Savedir i napa okenn posibilite ki nou, nou pou kapab re ganny sa sant ankör, vi ki nou köz bokou lo patrimwanny e nou konnen poudir sa sant i annan en valer kiltirel e enportan pou zabitan.

So, napa okenn fason ki nou pou kapab re ganny nou sant dan okenn sironstans. Mersi.

MR DEPUTY SPEAKER

Mersi Onorab. *Panel*.

MINISTER ROSE-MARIE HOAREAU

Mersi Onorab. Mersi Mr Speaker. Onorab, tou le de ou keştyon i pa tonm dan mon domenn. Me selman ou 2 pwen i bann pwen valab ki nou kapab, mon kapab anmenn pli devan pou en diskisyon avek bann lazans konsernen.

Parey ler ou köz *music stadium*, sa i pou bezwen en konversasyon ki nou fer avek bann teknisyen parey kot *SIA*, nou pou bezwen regard en pe

bann dimoun ki ansarz sa *stadium* premyerman. Pou bezwen annan en konversasyon avek diferan group dimoun si *ever* sa posibilite ki ou'n demande pou arive i kapab arive.

Me, i touzour en pwen valab; i touzour en pwen ki nou kapab enmenn devan me selman parey mon dir ou, mwan dan mon kapasite koman Minister pou *Local Government* ek *Community Affairs* mon pa kapab pronons mwan lo la, me selman i pa en move nide. Alors, si i pou kapab arive sa i en keştyon ki nou bezwen al *discuss* li pli lwen.

E parey lo lefe, mon pa tro, tro okouran si ou kapab *reverse* en lavant en later, en propriyete me ankör sa i pa dan mon domenn e mon ti a prefere en dimoun ki konnen sa bann posibilite. Mersi Mr Speaker.

MR DEPUTY SPEAKER

Mersi *Minister*. Onorab, ou annan klarifikasyon?

HON ANDY LABONTE

Minis, petet pou en pe pli kler petet mon dezyenm keştyon pou pli spesifik, aköz nou annan en plant later lot kote e mwan mon menm mon personnelman mon ti'n deza komans annan en negosyasyon pou sey get avek

petet menm sa nouvo propriyeter ki fason petet nou kapab re negosye pou war.

Me selman nou konnen poudir sa sant in vann pou milyon de milyon Roupie avek ki parti *US* in benefisye lo la e zot in ganny sa preski pou naryen. Mersi.

MR DEPUTY SPEAKER

Mersi Onorab.

MINISTER ROSE-MARIE HOAREAU

Mersi Onorab. Mersi Mr Speaker. Onorab, mon apresye ou fristrasyon, mon konpran. E *going forward* mon asire ki sa Gouvernman aktyel nou a sey fer tou nou mye pou nou kapab en zour kapab rezourd sa problem. Mersi Mr Speaker.

MR DEPUTY SPEAKER

Mersi *Minister*. Bann siplemanter lo sa kestyon, Onorab Woodcock. Nou reste vizilan ki *scope of question* i lo Sant Kominoter Larivyer Anglez. Mersi.

HON WAVEL WOODCOCK

Wi Mr Speaker. Mon osi Mr Speaker, mon profit sa lokazyon pou mon remersye tou bann siporter *LDS*, sirtou bann siporter ki sorti lo Praslin avek La Digue ki ti desann pou nou Konvansyon Dimans. E sirtou bann

siporter Praslin ki *endorse* mwan pou al ankor- pou debout pou zot pou ankor en lot manda.

Minis, an vi ki ou'n dir ti annan serten negosyasyon oparavan avek ansyen Prezidan avek Vis-Prezidan pou rann sa kare later kot sa Sant Kominoter i été, pou vin konmsi pou zot rann parmi tou sa bann later ki zot annan pou zot rann avek *Local Government* pou annan sa Sant Kominoter kontinyen parey i ti ete oparavan.

Eski i annan ankor bann lezot kare later ankor ki ti an negosyasyon aköz ti annan bann fasilkite ki ou prezimen zot ti kapab fer bann Sant Kominoter ankor? Eski i annan lezot later ankor ki *involve* apard sa later English River?

Aprè Mr Speaker, zis permet mwan pou mon eksprim byen mon fristrasyon. Vi ki sa kestyon i pe adres en parti, *US* direkteman e zot in *walk out*, konmsi i montre en pti pe mank, mannyer mon kapab dir sa, en pti pe dezapwentan, en pti pe mank respe pou Lepep Seselwa. Mersi Mr Speaker.

MR DEPUTY SPEAKER

Mon ava envit *panel* pou larepons son kestyon.

MINISTER ROSE-MARIE HOAREAU

Mersi Mr Speaker. Mersi Onorab. Onorab, mwan annefe mon'n fer mon resers lo sa kestyon Onorab Labonte, alor mon pa okouran bann lezot diskisyon, aköz mon ti'n prepar mon larepons pou Onorab Labonte.

Me- annefe sirtou Larivyer Anglez kot napa later *it remains a big issue* ki sa sant in ganny vann san pran kont bezwen bann dimoun sa distrik. Mersi.

MR DEPUTY SPEAKER

Mersi *Minister*. Onorab Monthy.

HON PHILIP MONTHY

Mersi Mr Speaker. Mon osi ma swiv mon bann koleg pou remersye tou zabitan Cascade sirtou sa gran group *first time voters* sorti Cascade ki ti desann pou nou Konvansyon e en mesaz kler in ganny anvoye Dimans mon krwar sanmenm sa zot lakoler bomaten.

Minis, mon kestyon se ou'n koz lo negosyasyon ki ti annan pandan direksyon ansyen Prezidan Faure, pandan ki ansyen VP Meriton ti ansarz Parti Lepep, ki ti pe al dan sa laliny pou retourn sa landrwa pou zabitan Larivyer Anglez. Eski ou annan okenn lenformasyon, okenn lide aköz ki direksyon parti US la

aktyelman in fer en *complete turnaround* lo sa desizyon?

Akoz zot in refize pou kontinyen avek sa negosyasyon ki ti pe deroule? I menm parti politik, zis zot in sanz non. Me eski ou kapab dir nou aköz? Eski par voras? Plis larzan pou fer konpanyy? Kwa ki'n arive ki zot in deside pa kontinyen avek sa negosyasyon? Mersi.

MR DEPUTY SPEAKER

Mersi Onorab. Mon envit *panel* pou en larepons.

MINISTER ROSE-MARIE HOAREAU

Mersi Mr Speaker. Mersi Onorab. Onorab, en kestyon byen konplike ki ou'n demann mwan, aköz koman ou konnen mon napa- parey nou dir an Angle *I am not privy of what-ki mannyer the management of US* i fonksyonnen e ki mannyer bann son bann lezot Lepep osi ti fonksyonnen.

Alor, sa kestyon i ava reste en kestyon aköz fransman dir ou mon napa okenn lenformasyon lo la. Mersi.

MR DEPUTY SPEAKER

Mersi *Minister*. Onorab Arissol.

HON SANDY ARISSOL

Mersi Mr Speaker. Mwan mon pou bezwen, lo larepons ki

Minis in donn Onorab Labonte mon pou bezwen prezant mon dezapwentman.

Mon dezapwente parske letan Onorab Labonte pe rod en fasilite pou son bann zenn Larivyer Anglez e Minis i vini i donn nou en larepons, e nou'n tandé ozordi tou bann dimoun Larivyer Anglez ki anler dan Galeri ek bann ki dan lakour poudir parti *US* in vann sa propriyete; kot bann zenn ti kapab zwenn, bann trwazyenm az ki pe rod en pti landrwa pou defoule zot ti kapab zwenn. Zot in vann sa avek en prive.

Mr Speaker, be i enportan pou note dan sa menm Lasanble Nasyonal *US* ti anmenn en Mosyon lo patrimwann, pa vann nou patri, pa vann nou later, la nou aprann poudir *US* in vann en bout kot bann zenn ti kapab zwenn.

E letan in koz *management* parti *US*, parti *US* son *management* i ansarz par Patrick Herminie en dimoun ki pa ankor ganny konfirman koman kandida Prezidansyel par son Konvansyon aköz zot ankor pe rode si zot pou met en premye fanm koman Vis-Prezidan avek li koman kandida. Alor zot ankor en pe deroute lo sa.

Mon kestyon mon ti a kontan demande lo lapar dimoun Larivyer Anglez ki ti a

kontan en landrwa e ki zot landrwa in gany vann par parti *US* - sa menm parti ki pe vin rod vot avek zenn. Mon premye kestyon; -

Minis, mon ti a kontan demann ou dan menm laliny ki Onorab Labonte in demande an relasyon avek stad lanmizik pou nou sey gete si nou kapab, ou koman Minis pou koz ek lezot ou bann koleg Minis pou nou sey gete ki mannyer nou kapab servi stad lanmizik koman en *multi purpose* kot bann zenn i a ganny sans rezouir en kou, me letan bann mizisyen i vini zot fasilite i la? Sa premye.

Dezyenmman mon ti a kontan demann ou kekfwa dan lespri letan zot pe fer zot bann plan pou bann nouvo sant, Cascade mon aprann i annan enn nouvo pe fer, Bel Ombre nou pe al ganny enn byento pe la ouver *ground plus one* ki pa bokou distrik ki annan, mon pou fer zot par.

Alor, eski dan sa menm lespri eski zot pa pe mazin kekfwa lo Larivyer Anglez kefwa avek mankman later parey ou'n dir, si avek letan zot annan en renovasyon par egzanp lo zot *DA's Office* ki en pe vye, aköz kekfwa letan zot a ganny sa finansman nesaser a lavenir dan sa lespri pou siport Onorab Labonte, siport tou bann zenn Larivyer Anglez e osi bann trwazyenm az, pour

ki zot *DA's Office* son *ground floor* kekfw a i ava vin son sant, annou dir en legzanp, e son lofis ava anler en pti pe parey dan lespri parey nou pe fer Bel Ombre pou moderniz en pe nou bann fasilite avek mankm an teren ki nou annan mersi bokou Mr Speaker.

MR DEPUTY SPEAKER

Mersi Onorab. *Panel*.

MINISTER ROSE-MARIE HOAREAU

Mersi Onorab. Mersi Mr Speaker. Annefe en bann propozisyon tre valab, e posibelman tre fezab. Ankorenn fwa mon ou bezwen al konsilte avek bann dimoun konsernen, bann *SIA*, bann *civil engineers* bann *quantity surveyors* eksetera.

Me selman i montre poudir nou sa ladministrasyon nou oule vwar en keksoz, nou oule vwar en Sant Kominoter ganny kree pou sa bann zabitan. Akoz *it's not fair* ki zot pa pe zwir en Sant Kominoter parey tou leres distrik, laplipar distrik i annan en Sant Kominoter.

Alor, wi nou ava pouse pou sa bann sizesyon nou ava anmenn li pli devan e nou ava fer sir ki bann konversasyon byen serye i ganny fer lo la. Mersi Mr Speaker.

MR DEPUTY SPEAKER

Mersi *Minister*. Dan sa bann konversasyon serye pa bliy distrik Mont Buxton. Deza lo *verbatim* piblik ki *request* osi in ganny fer. Onorab Adelaide *you are next on the list*.

HON FRANCOIS ADELAIDE

Mersi Mr Speaker. Minis mwan mon kestyon pou ou i konmsa; -

Vi ki zot, zot sa departman ki ansarz bann servis kominoter e vi ki later ti en keksoz ki napa bokou, ki petet zot pe fer sirtou avek bann lezot Minister, la parey mon mazin Minister Later i annan bann plan distrik ki fer pour ki bann later ki ganny konsidere bann landrwa stratezik pou distrik, pou devlopman distrik, i ganny kapte byen boner pour ki nou pa war nou, nou pe vann avek en biznesmenn prive pou li al fer en lot keksoz ki nou pe gete i pa pou benefis kominote tou son *totality*?

Konmsi i devret annan bann landrwa parey nou pa koz Baie Lazare i annan bann bout later ki Parti Lepep menm in pran avek zabitan Baie Lazare ki i pe rod vann. Si i vann avek en etranze, en etranze i pou fer son *building* ki li i anvi, petet i pou napa benefis imedya pou kominoter.

So mon ti a kontan ki petet dan sa lespri sinerzi ki ou Minister i travay ansanm

avek Minister Later, pour ki bann landrwa stratezik dan distrik ki pou anmenn devlopman pou nou konminote bann landrwa fasil osi i ganny rezerve pou devlopman kominoter. *Thank you* Minister.

MR DEPUTY SPEAKER

Mersi Onorab. *Panel* larepons.

MINISTER ROSE-MARIE HOAREAU

Mersi Mr Speaker. Mersi Onorab. Ankor enn fwa en pwen tre valab ki nou kapab met devan pou konsidere. Avek sirtou bann lezot lazans konsernen parey ou'n dir avek lezot Minister konsernen.

E nou koman *Local Government* nou toultan la koman bann fasiliter pou anmenn devan bann sizesyon, e sa i en sizesyon ki nou, nou kapab dan nou kapasite - ki mwan mon kapab dan mon kapasite Minis avek mon lekip anmenn pli devan kot bann lazans e bann lotorite konsernen. Mersi Mr Speaker.

MR DEPUTY SPEAKER

Mersi Minister. Onorab Roucou.

HON MICHEL ROUCOU

Mersi Mr Speaker. Minis, si ou kapab dir nou, eski an se moman la, *Local Government* in fer en travay pou vwar si i

annan okenn zot bann lenfrastriktir ki anba ki annan lenfrastriktir konmsi sa bann propriyete, lo ki i ete si i lo non *US* pangar zot a war zot ankor dan en sityasyon kot pe ganny vann ankor, ouswa lo bann propriyete prive? Mersi.

MR DEPUTY SPEAKER

Mersi Onorab. *Panel*.

MINISTER ROSE-MARIE HOAREAU

Onorab, mersi. Mersi Mr Speaker. Ankor enn fwa sa sizesyon sa kestyon i vreman petet konsern Minister Later, e ankor enn fwa nou *take note* e nou ava enmenn pli devan koman en fasiliter. Mersi.

MR DEPUTY SPEAKER

Mersi *Minister*. Sa ti dernyen enterven an ki ti'n endike ki i oule demann en kestyon siplemanter lo kestyon 90 ki dan non Onorab Labonte.

Pou kontinyen, i annan ankor 3 kestyon ki swiv. Kestyon limero 91 ki dan non Mann elekte pou distrik Roche Caiman ki absan dan Lasanble donk kestyon i tonbe. Kestyon 92 i dan Onorab Tamboo ki Mann Proporsyonnel parti *US* ki absan dan Lasanble, donk kestyon i tonbe. Kestyon 93 ki i dan non Onorab Tamboo ki Mann Proporsyonnel pou

parti *United Seychelles* donk kestyon i tonbe.

Alor sa i fer ki nou termin nou sesyon kestyon, *Questions for Oral Answer* ozordi. E avan ki *panel* i kit nou, koman *presiding officer* ozordi bomaten mon bezwen eksprim mon dezapwentman avek sityasyon Lasanble Nasyonal bomaten.

Parske kestyon i ganny anvoye, sekretaryat i fer le nesaser i anvoy kot bann Minister konsernen. E zis parey mon'n dir bomaten, bann travayer ki la bokou zot i pran en kantite letan pou resers sa bann larepons.

Zot pran bann zour pou asire ki bon larepons i vin devan Lasanble Nasyonal e apre nou Manm Lasanble Nasyonal ki'n dabor eksprim nou lentere pou deman sa bann kestyon nou *walk out* e ki i fer nou *fail* dan nou responsabilite vreman pou reprezant popilasyon ki'n konfyé nou sa sez isi anndan. Alor, mon prezant en leskiz avek *panel* pou sa sityasyon bomaten.

E mon ava remersye delegasyon sorti kot Minister Gouvernman Lokal e Zafer Kominoter ki ti pe dirize par Minis Mrs RoseMarie Hoareau ki ti akonpannyen par son Sekreter Prensipal Mr Kevin Perine e Direkter Ekzekitiv Mr Romano Songor.

Donk, nou pou, mon war lanmen *PS* la, mon pa tro fye pou donn ou laparol aköz mon'n fini koze pangar ou dir en keksoz ki ou pa devret dir dan Lasanble. Donk, konpran mwan lo la. Nou pou *adjourn* la.

Nou pou annan en sanzman dan nou *Order Paper* aprezan, bann lord bann *item* i reste parey, me *statement* pe vin la 11er, i pa pou 2er apre midi. Donk, nou'n fini fer laranzman pou Minister Ledikasyon anvoy delegasyon 11er nou pou rebran travay Lasanble.

Donk nou pou *adjourn* la e nou ava rebran 11er.

(BREAK)

MR DEPUTY SPEAKER

Welcome back tou dimoun, bann Manm e mon note ki bann viziter Larivyer Anglez i ankor la. Donk zot welcome pour swiv *next item*. Mon bann vwazen, apre tou nou dan menm distrik.

Prosen *item* lo *Order Paper*, i *statement* par Minis pour Ledikasyon. Mon ava alor apel *Hansard reporter* pour apel delegasyon.

Mon ava dir bonzour e byenveni dan Lasanble. Delegasyon sorti kot Minister Ledikasyon, dirize par Minis pour Ledikasyon. Dr Justin Valentin ki pour fer en

'Deklarasyon lo Reform dan Sistenm Ledikasyon Segonder Dan Sesel An 2026'.

E pour son *statement* Minis i akonpannyen par delegasyon 3 dimoun, ki konpri dabor Mr John Lesperance ki Sekreter Prensipal pour Sekter Devlopman Ledikasyon.

Osi Mr Jean-Michel Domingue ki *Director of Education Legislative and Regulatory Affairs* e Mr Jean-Marc Athanase ki *Principal Planning Officer*.

Welcome. E mon ava donn laparol Minis pour son *statement*.

MINISTER JUSTIN VALENTIN

Mersi Mr Speaker. Bonzour Mr Speaker. Bonzour tou bann Manm Onorab. Bonzour osi tou bann dimoun, bann envite ki dan Galeri anler ; tou bann lezot travayer Lasanble, bann dimoun ki pe swiv nou lo tou diferan medya. Bonzour.

Mr Speaker, mersi pou donn Minister Ledikasyon sa loportinite ozordi pour prezant Lasanble Nasyonal, enn bann reform mazer lo nivo segonder dan lekol piblik.

Ki pe al antreprann apartir Zanyve 2026 e ki son lenplimantasyon konplet pour arive apartir Zanyve 2027.

Sa reform ki mon pou prezante pour adres striktir e

lorganizasyon bann lekol; osi byen ki lorganizasyon e lenplimantasyon bann program skoler.

Sa reform, i adres kekyon ki koman en Minis Ledikasyon mon'n reponn plizyer fwa dan sa Lasanble. Ki Minister Ledikasyon pe fer pour adres nivo performans dan lekol piblik?

Ozordi atraver sa *statement*, mon pou pe donn enn parmi sa kantite travay ki nou pe fer. I nesese koz lo sa enn reform aköz li i pou pli fondamantal lo nivo segonder e i pou annan bokou lenplikasyon lo nivo nasyonal.

I en reform ki'n ganny byen kalkile, byen diskite, byen konsilte. E i en reform ki reflekte direksyon ki Gouvernman, atraver Minister Ledikasyon i anvi bouze.

Sa reform i reprezant osi enn parmi bann demann ki bann ansennyan zot menm zot in fer.

Mr Speaker, nou tou nou konsernen avek performans akademik bann etidyan dan lekol piblik. E nou krwar ki sistenm i bezwen fonksyonnn dan en fason ki nou vwar en benefis konsiderab, tou bann lenvestisman ki pe ganny fer dan ledikasyon.

Nou ava dakor ki nou sistenm lekol segonder aktyel i bezwen ganny reformen, si nou anvi progrese konman en

nasyon e realiz target lekonomi ki pei in etabli.

Nou bezwen dabor devlop nou ledikasyon teknik e vokasyonnel. Lo en staz pli boner dan sistenm ledikasyon pour ki nou kapab prodwir bann etidyan avek bann konpetans pour ranplas sa gro proporsyon etranze dan pei.

Menm si nou annan serten etidyan ki pe perform tre o o nivo enternasyonal. Sa in ganny demontre par zot rezilta dan *IGCSE*, e *A Level*.

Sa pei i krwar ki nou bann zanfan, nou bann etidyan i devret fer bokou pli byen an zeneral.

Pour komans adres sa problem, lannen pase, Minister Ledikasyon ti met devan en propozisyon pou transform Lekol Perseverance Segonder, kot i ti pou pran tou bann etidyan *TVET* komansman nivo S4 - S5.

Lide sete pou pli tar reform lezot lekòl segonder pour ki zot kapab pran lezot group etidyan. Malerezman, nou pa'n kapab kontinyen avek sa lide. Me sa nide ki nou ti annan konsernan otour transformasyon bann lekòl pa'n perdi.

Sa vizyon i reste labaz sa reform ki nou pe propoze ozordi. Sa lannen, nou'n reviz nou plan. Nou'n prezant li dan *Cabinet* e *Cabinet* in aprouv larsitektir nou reform. Ki fer ki

sa reform, ki nou pou propoze pour lekòl segonder, i permet sistenm lekòl Sesel koresponn avek bann norm referans enternasyonal.

An menm tan i reprezant en sistenm lozik, realis e modern pour en sistenm ledikasyon dan enn Pti Leta Zil parey Sesel.

Mon ti a voudre konmanse par mansyonnen, ki Minister Ledikasyon pe met bokou lanfaz lo serten prensip kle dan reform ledikasyon Sesel. Kot i pe konsantre lo 4 laspe enportan:-

Aliny avek bezwen Nasyonal,

Adres bezwen e lentere bann etidyan,

Aliny avek norm enternasyonal e aliny avek Kad Kalifikasyon Nasyonal (*SNQF*)

Lentansyon Gouvernman se pou kre en program ledikasyon modern e relevan; ki kapab zwenn demann lekonomi lokal e lekspektasyon ledikasyon standar ki konparab enternasyonalman.

Adisyonnelman, bi sa reform se pou anplifye e anbelir Ledikasyon Vokasyonnel e Teknik byen koni koman (*TVET*). Atraver reponn bann diferan etidyan e maksimiz lilitizasyon resours konman enn Pti Leta Zil parey mon'n deza dir pli boner.

Mr Speaker, vwala bann reform ki nou pe propoze;

Premyerman pour annan en reform lo lorganizasyon bann lekòl Segonder; letap segonder pour ganny divize an 3 nivo:-

Premye letap *Lower Secondary*. Sa pour enkli S1 ek S2.

Dezyenm letap pour *Middle secondary* e sa pour enkli letap S3 ek S4.

E trwazyenm letap pour *Upper secondary* e sa pour enkli S5 and S6.

Avek sa laranzman apard ki lekòl Praslin Segonder ek La Digue, bann lezot lekòl Segonder piblik pour nepli annan tou nivo, S1 ziska S5 parey sityasyon i ete ozordi.

4 lekòl Segonder lo Mahe, pour annan selman nivo S1 e S2. Zot pour bann *lower secondary schools*. Sa 4 lekòl ki nou'n idantifye se lekòl:-

Belonie, Mont Fleuri, Plaisance, e Anse Boileau koman bann lekòl *lower secondary school*.

Sa nivo pou pran etidyan ki sorti dan P6 oubyen ekivalan, ki'n konplet Kad Kalifikasyon Nasyonal legzanmen nivo enn.

Etidyan pou ganny plase dan lekòl rezyonnal depandan lo zot proksimite zeografik avek lekòl. Apre 2an, zot pou ganny en *Statement of Attainment*.

Lo *Middle e Upper secondary*; Dan sa 5 lekòl segonder ki reste, 3 lekòl pou fonksyon lo nivo *Middle secondary* e zot pour annan laklas onivo S3 ziska S5.

Sa 3 lekòl ki nou'n idantifye Anse Royale, Perseverance, e Beau Vallon: Sa bann lekòl pour enplimant program vokasyonnel e teknik.

Sa lot 2 lekòl segonder ki reste zot pour annan en nivo S3 ziska S6.

S3 ziska S4 i pour *Middle* e S5 ziska S6 i pour *Upper*. Sa 2 lekòl pour enplimant bann program akademik. Ki vadir sa de dernyen nivo pour *A level*, AS e A2.

Sa de lekòl ki pou fonksyon lo sa nivo ki nou'n idantifye se Lekòl English River e Lekòl Pointe Larue.

Anba sa nouvo laranzman, en etidyan i a ganny sans fer zot *IGCSE* dan S3 e S4. Dan tou le de groupman lekòl, akademik ouswa vokasyonnel-teknik, etidyan pour ganny sans fer zot *IGCSE* dan size akademik e dan bann size teknik, tel ki lagrikiltir, biznes, *tourism travel* eksetera depandan lo program ki bann spesyalis i a definir.

Apre 2an dan *Middle Secondary School*, tou etidyan ki kalifye pou ganny en

sertifika avek Kad Kalifikasyon Nasyonal nivo 2.

Sa ki nou apel the (*SNQF Level 2) School Leaving Certificate*. Sa sertifika pou sertifye nivo konpetans bann etidyan baze lo zot swa size, leksperyans travay osi byen ki bann aktivite ekstra skoler.

Zot pour apre kapab - (pardon) - zot pour apre kapab swazir en lanplwa oubyen bouz dan trwazyenm letap nivo segonder, respektif ouswa dan en sant profesyonnel e pli tar dan en liniversite.

Dan sistenm aktyel, etidyan ki dan S4 e S5, i ganny plase dan formasyon ki swa akademik oubyen formasyon zeneral.

Formasyon akademik i inikman pou bann etidyan ki pou swiv size akademik. Par kont formasyon zeneral i pou konsantre lo bann size plito teknik (*TVET*), osi byen ki bann size zeneralize kot apre etidyan pou fer bann legzanmen nasyonal.

Dan sa nouvo sistenm, sa trwa formasyon akademik, teknik e vokasyonnel, pou ede reponn bokou lentere varye, laspirasyon, abilite, e bezwen bann etidyan.

E i pour pran an konsiderasyon bann bezwen sosyoekonomik pei. Annefe, bi prensipal formasyon akademik se pou prepar bann

etidyan, pou swiv zot letid lo nivo tersyer.

E osi lo nivo ledikasyon pli o atraver size akademik. Bi prensipal formasyon teknik, se pou prepar bann etidyan avek la pratik e osi konnesans aplike, ki relevan avek standar lendistri e inovasyon teknolozi.

Sa pou ede atir bann etidyan ki annan en lentere dan teknolozi e osi annan en abilite pou angaz dan bann size akademik.

Finalman, bi prensipal pour formasyon vokasyonnel, se pou donn bokou lantrennman pratik e plas etidyan dan bann lorganizasyon, pour ganny bann konpetans atraver laprantisaz aplike dan komers e bann servis pou zwenn ankor bann demann lanplwa.

Fodre met antet ki lentansyon Minister Ledikasyon se pou entrodwir fleksibilite. Atraver bann formasyon kot pou permet bann etidyan sanze, oubyen kapitaliz lo bann leksperyans laprantisaz letan zot lentere ki zot lanbisyon i evolye.

Savedir, en etidyan ki komans son *Middle secondary* dan en lekol vokasyonnel teknik. I pour kapab bouz dan akademik si son lentere i sanze e son abilite i evolye.

E sa sanzman pour byensir vis versa. Sa pou ede

asire ki leksperyans bann etidyan i enn ki enkliziv, i ekitab e byensir ki dinamik.

Plan Minister Ledikasyon, se pour komans aplik serten bann sanzman an 2026 lo Lekol Praslin Segonder e La Digue.

Nou ekspekte komans lenplimantasyon lo Mahe an Zanvye 2027 lo tou lekol. Bann reform ki nou pou fer dan Lekol Segonder Praslin e La Digue i konpri:-

Lentrodiksyon bann nouvo program lo nivo S1 e S2 e nouvo program formasyon vokasyonnel lo nivo S3 e 4.

Lentrodiksyon nouvo metod evalyasyon osi pour ganny fer. E sa lenplimantasyon gradyel, pour permet nou aranz bann lozistik nesaser, e pli byen siport sa lenplimantasyon.

An menm tan, travay lo lenplimantasyon ki pou fer lo Mahe an 2027.

Sa reform ki nou pe propoze pour anmenn plizyer benefis enportan pour sistenm ledikasyon an zeneral.

Premyerman nou pe anliny nou sistenm ledikasyon avek bann norm enternasyonal. E sa pour fasilite bann konparezon ant bann diferan sistenm skoler dan lezot pei.

Dezyenman, sa reform pour redwir dirasyon letid

segonder, pour evite bann repetisyon dan program letid par egzant P6 ek S1.

E osi pour asire en tranzisyon pli striktire e senp pour bann etidyan.

Anplis, sa re-reentegrasyon *A Levels*, dan sistenm segonder i anliny avek sistenm enternasyonal.

Isi Sesel *Independent School, International School, Vijay International*, i swiv sa menm lozik.

Pour bann etidyan, akademik, ou menm bann ki swiv formasyon teknik vokasyonnel, sa nouvo sistenm reform pou enn pli entegre e senp.

Ki pou anmenn amelyorasyon dan performans ek progresyon.

Retire en lannen dan lekol segonder pou ed etidyan fer en tranzisyon pli senp, san repetisyon, parey in deza ganny mansyonnen.

Etidyan pou kapab konmans prepar pour *IGCSE* depi S2 e fini serten size lo nivo 'Core' dan S3.

Nou pour prepar zot pli byen pour S4 e donn plis sans pour reisir. Espesyalman dan bann size lasyans, teknolozi, enzenyer e matematik.

Dan sa de lekol akademik pour annan mwens distraksyon e plis konpetisyon pozitiv. Parey 'Lekol Ekselans' me dan en nouvo format.

Anplis, bann ansennyan pour vin pli spesyalize e dedye zot letan zis avek bann etidyan akademik, san bezwen partaz zot lentansyon avek bann etidyan ki annan lezot lentere.

Sistenm pour osi ofer en baz pli for dan size lasyans parey mon'n dir, teknik, teknolozi, enzenyer, matematik, pour bann etidyan teknik ki anvi pourswiv en size pli avanse, pli aplike, parey dan konstriksyon, ki bezwen matematik, sa i zis en legzanp.

Etidyan TVET, pa pou santi presyon pour kit sistenm boner. O kontrer, zot pou kapab reste dan lekol pour plis letan, ganny sipor e konsantre lo zot formasyon.

Depi S2, zot pou ganny ekspoze avek devlopman konpetans debaz e en program letid pli relevan.

Enkli konpetans *digital* avek mikro-sertifikasyon pour lanplwa. Atraver progresyon, zot pour ganny 3 lannen preparasyon solid, pour antre dan Sant Profesyonnèl oubyen dan lanplwa.

Zot pa pou bezwen an konpetisyon direk avek etidyan akademik, pour antre dan Sistenm Ledikasyon Tersyer.

Dapre *Commonwealth of Learning* par egzamp, apre 12 lannen dan lekol, bann etidyan i devret kapab pourswiv letid pli onivo e

profesyonnèl dan liniversite ouswa dan lezot lenstitisyon avek nivo ekivalan.

Sa reform i ekspekte prodwir bann etidyan diplome ki byen ganny prepare pour lavi e lanplwa.

Sa sanzman pou permet ki *A Levels* i konplimant bann Sant Profesyonnèl ek Liniversite, olye an konpetisyon avek bann Sant Profesyonnèl atraver en sistenm seleksyon ki pa toultan zis.

Sa reform pou osi fer ki bann Sant Profesyonnèl pa bezwen konsantre lo bann program nivo sertifika. Me plito lo zot vre vokasyon; vèdir ledikasyon lo nivo diplom e pli o ankor.

TVET pa devret reste lo bor sistenm, oubyen ganny konsidere zis pour bann etidyan avek difikilte laprantisaz.

Eksper in dir ki pour fer bann etidyan pli atrakte ek ledikasyon teknik e vokasyonnel dan Sesel, sa program i devret konmans dan sistenm lekol byen boner.

Eksper in osi dir ki “Ledikasyon teknik e vokasyonnel i devret ganny rekonnet konman en karyer profesyonnel”.

Sa reform pour met valer lo TVET, donn li en pozisyon dan lasosyete e garanti ki

resours pe ganny servi dan en fason efikas.

Sa reform pou permet pli bon litilizasyon resours imen. Par egzanp, dan serten size parey Lasyans Sosyal, kot partisipasyon etidyan i mwens, sa reform pour permet en pli bon lorganizasyon bann ansennyan.

Pour bann lekol ki lo Zil Pros, par egzanp Praslin, La Digue, sa i vedir ki depasman bann ansennyan ant bann zil, pou vin en eleman osi pli favorab.

Mr Speaker, larestan lannen 2025 e lannen 2026 antye Minister Ledikasyon pou pe komans son travay entans, pou fer ki sa reform i vin e realite e en sikse.

Nou'n komans met an plas bann diferan Komite pour travay lo bann aksyon nesese.

Nou'n deza komans revwar program e sa i lo en staz tre avanse. Apre ki program letid pou'n pare, nou pou fer en odit pour etabli ki resours nou bezwen pour nou komanse.

Nou pour zwenn avek bann diferan lazans, par egzanp SPTC, pour etabli bann diferan lozistik. Nou pour osi fer bann sesyon sansibilizasyon paran e bann etidyan, pour zot konpran ki pe arive e ki bann benefis sa reform pou pe anmennen.

Avek sipor Minister Finans, bann kou ekonomik zeneral sa reform, pour bezwen ganny kalkile an term lenvestisman e byensir an term benefis.

Nou pou osi revwar nou kad legal pou fer ki sa reform i mars avek nou kad legal; sinon nou a war kwa, ki nou pou bezwen amande.

Pli gro travay 2026, Mr Speaker, se pour fer transformasyon bann lekol, pour prepar larive reform an 2027.

Mr Speaker, nou rekonnet groser e lanpler sa reform. Nou pe servi sa platform ki Gouvernman in donner pou met ledikasyon koman en priyorite.

Nou pe servi sa platform pour nou demontre ki vreman nou konpran sa rol e ki nou pour bezwen donn nou zanfane le meyer dil.

I annan bann proze ki nou pe osi fer lo nivo primer. Nou'n komans en proze ki nou'n apel li (*PETALE*) *Project for Enhancing Teaching and Learning Experiences*, ki pou ed nou prepar bann zanfane evantyelman pou partisip pli aktivman dan sa letid segonder. Sa i ava en konversasyon apar pour pli tar.

Mon remersye tou dimoun ki deryer sa reform e mon envit bann parti prenan

pour ed nou donn sa reform en sans fer sikse.

Mr Speaker, Minister Ledikasyon i krwar dan en prosis kolaborasyon. Nou krwar ki provizyon ledikasyon pa en zafer zis Minister Ledikasyon.

Donk sa demars ki nou pou fer avek bann lezot lazans, se pour ki tou nou *partners* i konpran ki nou pe fer. E zot konpran ki fason zot pour reazir pour apiy nou.

Aprezan mon pou envit Lasanble pour rod plis leklersisman lo sa reform. E nou ti a osi kontan pour zwenn Lasanble dan en lot *forum*, en pe pli dekontrakte, kot nou a kapab fer bann prezantasyon solid, pour donn plis detay lo sa reform ki mon'n anonse. Mersi Mr Speaker.

MR DEPUTY SPEAKER

Mersi Minis pour ou *statement*. E mersi osi pour lenvitasyon pour Lasanble Nasyonal pour en lot *forum* en pe pli mwen dekontrakte. Kot nou kapab depouy sa size en pe plis.

Donk mon ava ekspekte ki *management* ledikasyon ava pran kontak avek Sekretarya pour aranz sa. E sirtou i pour konsern tou bann Manm sirtou elekte ki annan en lekol dan zot distrik.

Nou pour pas lo staz keston. E lefe ki annan bann

teknisyen prezan. Donk nou pour bezwen al dan Staz Komite pour permet zot reponn keston. Si i annan nesesite. Alor nou pour bezwen en Mosyon pour sa. *Chief Whip LDS*.

HON SANDY ARISSOL

Mersi Mr Speaker. Bonzour Minis avek ou lekip. Bonzour bann dimoun Larivyer Anglez ki ankor la pe ekout nou, konpare ek bann ki ganny peye pour travay zot, zot ale.

Mr Speaker parey nou *Standing Orders* i fer provizyon anba *Order 84* mon pe – non, non-Mr Speaker, avek ou gidans i *Order 84*.

MR DEPUTY SPEAKER

84(1).

HON SANDY ARISSOL

84(1) Resolution of the Assembly to a Committee. So anvi ki dan sa provizyon i koz lo “Whenever in any matter, other than the matters considered under Proceeding on a Bill, or Financial Procedure, a Member desires that the matter be considered in a Committee of the Whole Assembly”.

Alor anba *84* mon le *move* ki Lasanble Nasyonal nou konstitye nou lekor dan en Komite. Zisteman pour nou get sa lot *matter*.

Sa se *statement* fer par Minis, pour kapab *allow* Minis ek lezot son bann zofisye pour reponn bann kestyon ki nou, nou ava kapab demande. Mersi bokou.

Mon a ganny en Manm lo nou kote pour segonde. Mersi.

MR DEPUTY SPEAKER

Onorab Hoareau?

HON JOHN HOAREAU

Mersi Mr Speaker. Mr Speaker, mon oule segonn sa Mosyon pou anmenn dan Staz Komite pou nou kapab demann kestyon pou lo sa size. Mersi.

MR DEPUTY SPEAKER

Mersi. E dapre *Standing Orders* i ganny konsidere *without question put*, so nou pa bezwen pran en vot lo la. Alor mon ava demann *Sergeant At Arms* pou *constitute* Lasanble dan Staz Komite. Mersi Serzan.

Donk, aprezan lasal i ouver pou kestyon, e deza letan Minis ti pe prezant son *statement* ti annan bann Manm ki ti'n endike ki i oule enterakte avek *panel*. Premye lo mon lalis i Onorab Philip Monthy.

HON PHILIP MONTHY

Mersi Mr Chair. Minis, dan ou prezantasyon ou'n koz- tou dabor bonzour Minis avek ou

delegasyon - en group ki pe travay serye kot Minister Ledikasyon, e mon familye avek plizyer antre zot. Ou'n koz lo en reform ki'n byen ganny kalkile, konsilte e menm bann ansennyen ki'n demande pour ki i annan sa reform.

Eski ou kapab al en pti pe an detay ki bann konsiltasyon, ki bann travay ki'n ganny fer o nivo bann ansennyan, ki bann lenplikasyon ki zot in annan, bann *input* ki zot in donner en pe pli an detay lo bann konsiltasyon ki'n anmenn nou la ozordi ler ou pe prezant sa reform?

E dezyenm kestyon, ou'n fer referans a plizyer norm enternasyonal ki sa reform pou anmenn nou sistenm ledikasyon lo la. Petet koz en pe lo sa bann norm enternasyonal ki pou le moman nou sistenm ledikasyon petet pa pe fer- pa an rapor avek pa lo sa nivo e ki sa reform ki pe fer dan sistenm ledikasyon Sesel pou anmenn nou lo sa nivo? Donn nou en pe sa bann norm enternasyonal ki ou pe fer referans avek.

Apre Mr Chair, si ou permet mon en trwazyenm kestyon vi ki *US* pa la. *SALS*, mon konnen ou'n koz en pti gin lo la, vi ki *A Level* pou ganny fer dan sa bann sant

akademik, ki pou arive vremen avek *SALS* prezan, vi ki se zot mazoriterman ki pe ofer letid nivo *A Levels*? Mersi.

MR DEPUTY SPEAKER

Mersi Onorab. Mon ava envit *panel* pou kestyon.

MINISTER JUSTIN VALENTIN

Mersi Mr Speaker. Mersi Onorab, pou ou kestyon, Mr Speaker, mon pou demann bann teknisyen ki'n lo teren pou zot reponn sa kestyon. Donk nou a komans par *PS* apre Mr Domingue pou apiye. Mersi.

MR DEPUTY SPEAKER

Mersi. Donk, *PS* ki pou komanse.

PS JOHN LESPERANCE

Mersi Mr Speaker. Zis pou dir pou bann konsiltasyon ki nou pe fer, ki nou'n fer nou'n deza travay bokou, aköz parey Minis in masyonnen lenplimantasyon 2026 i pou lo Praslin ek La Digue.

So i annan bokou zefor ki'n fer pou nou travay avek sa 2 lekol spesifikman, kot nou'n fer plizyer prezantasyon menm avek lezot konsil avek serten group paran, avek serten bann etidyan, par ler zot ganny konsilte atraver zot bann *teachers*.

E avek lekol *management* li menm ki nou'n fer plizyer travay avek zot, i annan nou'n fer *virtual* depi Mahe apre nou ti mont Praslin pou al diskrit plis an detay avek zot pou vwar poudir nou bezwen zot partisipasyon pou nou enplimant sa reform.

E lo Mahe nou'n fer konsiltasyon avek tou bann lekol, avek tou bann *head teachers*, e menm nou bann depite ti vini e menm bann manm konsil zot in *attend*, *plus* nou'n fer serten konsiltasyon avek bann *border - PCs*, zot osi zot in partisip dan bann diskisyon ki nou'n deza fer.

So, i annan bokou konsiltasyon. E pou masyonnen lo nivo enternasyonal, ki sa i vedir pou bann travay ki nou'n fer nou'n fer bann *benchmarking exercise* parey letan nou ti pe fer sa reform 2 pei spesifik kot nou'n travay avek e Minis in masyonnen nou'n fer referans avek plizyer rapor.

Commonwealth of learning ti fer gro travay pou etabli en sistenm ki mannyer nou *modernize* nou bann *schooling systems* Sesel, nou'n fer referans avek sa travay ti annan en konsiltan ki ti'n vin Sesel e in travay avek nou, nou'n fer referans avek louvraz ki *UNESCO* in fer e menm lezot pei.

I de pei spesifik ki nou'n vwar zot model tre enteresan e aneife nou tin fini komans nou travay letan nou ti dekouver poudir en legzanp poudir *Barbados* e se Moris, in fer serten reform e nou vwar nou ti realize poudir reform ki nou, nou ti pe propoze i ti vremen anliny avek bokou travay ki'n arive dan sa 2 pei.

Spesifikasyon ki enteresan ek sa 2 pei se 2 *small states*. E nou'n vwar poudir zot reform i vremen anliny avek sa ki nou'n demande e sa ki vedir poudir nou pe reform en sistenm ledikasyon ki pe anliny avek norm enternasyonal e sirtou bann *small states* parey nou dir.

E sa pou nou i enportan aköz *small states* i annan bann spesifikasyon ki ou ganny konteks tre *unique*. E pou nou sa par ler pou pran sa bann konsiderasyon i fer nou reform baze lo bann konsiltasyon e bann demann ki'n arive atraver nou bann diskisyon i enportan. Mon a les Mr Domingue pou kontinyen.

MR DEPUTY SPEAKER

Please proceed.

**DIRECTOR OF EDUCATION
LEGISLATIVE AND
REGULATORY AFFAIRS
JEAN-MICHEL DOMINGUE**

Mersi Mr Speaker. Bonzour tou dimoun. Mersi Onorab Monthy, pou sa kestyon.

Mon mazine osi i enportan pou *underline* ki letan nou pe anmenn SALS, aköz ti annan en kestyon lo SALS pou *underline* ki SALS dan son plas kot i ete dan sistenm ledikasyon, i fonksyonnen en pti pe *away* an konpetisyon avek bann PCs, bann *professional centers*.

SALS la, i pou ganny anmenn *squarely*, mon pa mazin son term egzakt Kreol, me i pou ganny anmenn *squarely* dan sistenm ledikasyon *general education* e sa pou met li dan parey Minis in fer resorti - dan le fason ki i ete i pou plase, manmay i pou kapab *move smoothly from S5, S4, S5 SALS, S6 SALS son A2* e fini.

So, sa i pou anmenn SALS dan *regular schoolings as any normal school*. Lo kote SALS li menm an 2027 nou pou komans abzorbe li *into* dan bann lekol e nou konplet sa abzorpsyon *the year after*.

So, nou pou i en reform ki'n vin si mon kapab met li koumsa, pou nou ki annan en pti pe *long memories*, depi ler nou'n fini ek sistenm NYS an 1998, nou ti devret retoun nou sistenm *back into a normal schooling* prezan la en pti pe plis ki 20 apre nou'n anmenn, nou pou anmenn

SALS in the place kot i devret ete. Mersi Mr Speaker.

MR DEPUTY SPEAKER

Mersi Mr Domingue. Ki nou pou fer la nou pou kontinyen avek kestyon. Nou ava pou komanse limit li lo 2 kestyon sak Manm, si letan i permet nou, nou a kapab annan en lot *round* kestyon, donk, Onorab Hoareau *you are next*.

HON JOHN HOAREAU

Mersi Mr Chair. Mr Chair, mwan mon annan en pti pe en konsern lo resours, kapasite ek lozistik ki pou akonpany sa sanzman.

E mon dezyenm kestyon osi i eski sa bann *Upper secondary* ki'n ganny nonmen par egzanp English River ek Pointe Larue, i pou ofer menm kantite AS ek *A Level Courses* oubyen si oule bann *curriculums*, bann letid ki pou ganny fer ladan parey i pe ganny ofer a se moman avek *SALS*.

Eski tou le de pou parey oubyen i pou annan enn ki pou annan plis ki lot oubyen i pou depan lo lentere etidyan ki mannyer i pou klase, mon ti ava kontan konpran en pti pe plis an detay lo sa size. Mersi.

MR DEPUTY SPEAKER

Mersi Onorab. Donk, i annan kestyon pou *panel*.

**MINISTER
VALENTIN**

Mr Speaker, mon les- apre mon kapab elabore, Mr Athanase reponn *please*.

MR DEPUTY SPEAKER

Proceed, Mr Athanase.

**PRINCIPAL PLANNING
OFFICER JEAN-MARC
ATHANASE**

Mersi Mr Speaker. Mersi Onorab pou ou kestyon. Bonzour tou Manm a lekout.

Lo kote resours, lo komite letan nou'n zwenn nou'n diskite nou vwar poudir sa reform li menm parey in dir dan lavantaz i pou fer ki bann resours i ganny pli nasyonalize ki sirtou en konparezon lo kote *staffing*, parey in dir pli boner, i annan bann size par egzanp lasyans sosyal, *history* en legzanp dan plas annan *history* dan 9 segonder lo Mahe, la nou nasyonaliz li nou dir nou fer li dan 2 lekol.

E dan plas annan 11, 18 –(sorry)- 9 par 2 ki fer 18 *teacher history* la nou kapab dir nou pe bezwen annan zis 4 ki i fer ki nou redwir lo nivo lo kantite Resours Imen ki nou annan *staffing* dan lekol.

E an menm tan an fezan sa nou kapab donn en pti pe plis swa lo kote lokal. Nou servi plis nou bann resours lokal ki nou annan e apre la

kot i manke nou ofer bann lasistans *expatriate*.

E osi letan ou pe get lo kote program, parey in fer resorti i pou enn ki pou depan lo konteks lekol li menm lo bann swa ki zanfani annan, me selman lo kote program i annan en lekip ki pe travay - parey Minis in fer resorti travay in ariv en zistans ase avanse e *from there* plis komunikasyon pou ganny fer.

Me selman i pou tou depan lo lentere e enn bann keksoz ki nou bezwen fer sorti ki tre enportan se letan nou pe travay lo program, nou pe bezwen zeneraliz li lo bezwen pei ; *meaning the labor market* ki nou annan.

So, tousala letan sa bann travay pe ganny fer, i bezwen pe ganny fer an kolaborasyon ansanm pour ki i alinyen e ki nou annan en sistenm ki pli *efficient* e efektiv pou pei. Mersi Mr Speaker. Pas ou ek Minis.

MINISTER JUSTIN VALENTIN

Mon osi anvi elabor lo sa pwennvi resours. Dabor, nou pou dakor ki Gouvernman i met ledikasyon koman en priyorite, donk, nou- e nou rekonnet par egzant transformasyon bann lekol pou fer zot vin sa lekol ki nou anvi, i pou bezwen byensir en pe resours, en kantite resours.

Par egzant la ki nou pe fer, nou pou pe- annou pran legzant dan bann lekol kot pou annan vokasyonnel e teknik, nou pou pe fer *workshop*, nou pou pe re donn bann lekol *workshop*. Nou pa anvi ki nou kontinyen petet dan menm stil ki nou ete ozordi kot nou war nou- ou konnen i mank en pe materyo dan lekol.

Donk, nou anvi ki sa reform sa fwasi nou kalkil li byen nou fer *the right*, bann *workshop* byen apropiye ki bann etidyan ler i vin ladan i santi li pe aprann e ki pe progrese. Me lavantaz sa ki nou pou annan e sa in ganny dir en pti pe par Mr Athanase, dan plas prezan pou annan 11 - par egzant la si ou pou fer en *workshop* mekanik dizon dan lekol, ouswa ou pou fer en latelye pou sarpantye, ou bezwen fer dan 11 lekol, be la nou pe dir non, nou ava fer li dan sa 3 lekol, nou a fer li byen dan 3 lekol kot i pe ganny montre.

Donk, pou mwan sa i pou osi en fason servi larzan ki nou annan. I pa vadir wi, i annan *to some extent* wi, nou pou bezwen rod en pe ankor en pe larzan pou fer sa bann fasilite sirtou 2026. Me selman ki nou pe dir, i annan osi dan nou Bidze konmela nou kapab gete ki mannyer nou kapab pli byen maksimiz sa bann larzan

ki nou annan pou nou fer bann travay pli efikas.

E apre si ou get parey bann ansennyen, ansenyan nou ganny apiye bokou parey bann *teacher TVET* i ganny byen apiye byen ankadre par en program ki nou'n fer avek Gouvernman *La Chine*, e sa in prepar en kantite *teachers* pou zot kapab pran par dan sa transformasyon, akòz zot ti pe zisteman ganny prepare pou sa lekòl vokasyonnel.

Me la prezan sa konsepsyon i retounen, me i retoun dan en lot fason. Mersi Mr Speaker.

MR DEPUTY SPEAKER

Mersi Minister. Mon avas pas laparol avek Onorab Woodcock.

HON WAVEL WOODCOCK

Mersi Mr Speaker. Bonzour Minis. En byenveni spesyal pou Mr Jean Marc Athanase en zanfandan Praslin *Principal Planning Officer*.

Minis, mon konpran le rezondet sa reform ki Minister Ledikasyon pe antreprann ozordi, me mon kestyon- mon konpran poudir Praslin ek La Digue i sel leksepsyon, par lefe mon konpran akòz Praslin i an zis en lekòl segonder e La Digue osi i anan zis en lekòl segonder ki i an en proze ki'n komanse.

Lo Mahe bann lekòl pe ganny divize ant sa 3 *level Lower secondary, Middle secondary and Upper secondary* e pou tou lede dan menm plas, nou pou annan bann laklas vokasyonnel, nou ou annan bann laklas akademik.

Mon konsepsyon i an termenn parey en Manm in demande an term kapasite eski zot pou bezwen, *obviously* mon mazin zot pou bezwen *beef up* bann *staff*, apre nou pe kòz lo size vokasyonnel. Petet nou napa ase bann *teachers* ki annan lekspertiz dan sa bann domenn.

E osi nou pe entrodwir AS osi o nivo S6, e fodre pran kont osi poudir S6 i pou *mean* plis etidyan dan sa lekòl. So eski zot pe anvizaze, mon konnen La Digue zot kapab *accommodate* sa dan sa nouvo Proze Lekòl ki zot pe fer.

Me lo kote Praslin eski zot pou bezwen agrandi lekòl, fer plis laklas? E Mahe i fasil bouz bann *teachers* me lo Praslin, eski zot pe anvizaze- akòz mon konnen sa i en kontrent pou nou lo Praslin *teachers*, konmsi ki zot pou fer pou remède sa pou nou kapab ankadre tou bann diferan nivo vokasyonnel akademik? Mersi bokou.

MR DEPUTY SPEAKER

Mersi Onorab. Panel.

MINISTER JUSTIN VALENTIN

Mersi Mr Speaker. Mersi Onorab. Onorab, sa i en kestyon ki enteresan, akòz sa kestyon nou osi nou'n zwenn avek son larepons en kantite. Byensir ou war poudir annandler bann keksoz ki arive Mahe, pa tou i kapab ganny replike Praslin, me sa ki- Praslin ou La Digue.

Me sa ki enteresan se ki Praslin ek La Digue, sorti Praslin grand- Praslin segonder pe enfliyans en ta sanzman. Par egzanp Praslin segonder zot premye lekòl ki pe komans al IGCSE Lagrikiltir.

Praslin Segonder i premye lekòl ki pe fer IGCSE Maths core dan S3, S4? S4, zot ti fer sa lannen pase e zot pe - annefe pou nou zot bann, lafas zot model i ed nou servi pou fer en kantite keksoz. Donk, e zot osi zot konteks akòz letan ou get Praslin segonder nou osi get *parallel* nou get bann lekòl prive kot ou war i komans avek S1 i anmennen ziska S5, *A Level and so on*.

Me selman malerezman-mon pa konnen si malerezman si erezman, *ok* annou dir diferaman, diferaman annou servi sa mo, diferaman se ki dan Lekòl Praslin segonder oubyen La Digue, i annan en gran konsantrasyon bann

etidyan ki pa neseriman oryante ver akademik. Donk, sa i fer keksoz en pti pe konplike.

Donk, pou premye faz sa devlopman akòz sa resers li-sa transformasyon wi, i pou komans 2026, me i annan – i pou devlope, sa pou devlope sa konsep. 2030 pou totalman diferan, pou totalman diferan dan lesans ki i pou annan bann keksoz ki ou pou bezwen re aziste.

Parey imedyatman letan nou pe koze nou war poudir i riske enportan annan en dekoneksyon, mon pa konnen- fizik ant bann etidyan dizon dan- lo Praslin i kapab petet nou deside pli tar fer en lot sant ouswa fer en lot lekòl, pou bann manrmay, pou bann etidyan akademik ouswa ou bann etidyan vokasyonnel.

Konmsi sa dekoneksyon pou neser en zour i pou neser, me selman la pour le moman nou napa gran swa, pou le moman nou napa gran swa nou pou bezwen fer li pli byen posib dan sa konteks ki i éte. Petet la lekòl i kapab deside poudir *ok* la i ava annan sa *block*, sa *block* kote la i *Upper-* i *Lower* sa *block* i ava *Middle* avek son bann *workshops* e sa *block* ki laba i ava *Upper*. I pou koumsa pou le moman.

Me selman mwan e tim i pou dakor avek mwan, nou'n

dakor ek kanmarad annefe ki i pou annan sa evolision, sa evolision i pou annan sa sanzman, o firamezir sa program i devlope.

E apre letan ou get grander lekol si ou pa anvi dizon fer bann garaz, ou konnen ou anvi fer en pe garaz pou fer monte manrmay dir en pe keksoz i riske dan sa plas kot i ete ozordi pa kapab fer sa. Donk Praslin, Praslin i riske petet pe war lezot landrwa kot ou kapab fer lezot latelye, lezot *workshops* pou donn sa nouvo sistenm en sans epanouir. Mersi Mr Speaker.

MR DEPUTY SPEAKER

Mersi *Minister*. Onorab Labrosse, ou prosen Manm lo lalis.

HON RICHARD LABROSSE

Mersi Mr Speaker. Mon a dir Minis bonzour avek ou delegasyon e mersi pou sa *statement*. An menm tan osi Mr Speaker, nou vreman akeyir en tel reform dan ledikasyon e nou kontan ki Gouvernman i met ledikasyon koman son priyorite.

Minis, dan ou *statement* ki ou'n donner devan Lasanble ozordi i annan enn de keksoz ki mon pa'n tro tand ou tous lo la, kekfw si ou'n tous lo la ou ava zis reasir nou ankor en kou; par egzanp ler ou pe koz dan sa reform la

ozordi. Mon konnen ki kalifikasyon osi pou zwe en rol enportan ler sa reform pou en sikse byensir.

So, ozordi ler nou pe kzoe Minis, SQA sa lorganizasyon ki donn kalifikasyon, ki asire ki tou bann papye bann sertifika i annord, ki son rol dan sa nouvo reform ki ou pe koz lo la, la eski SQA pou kontinyen deservi son rol parey i pe servi? Ouswa eski zot pe mazin refer en travay lo son ladministrasyon e lo son fason ki i *operate*?

Mon dezyenm kestyon Minis ki mon ti a kontan ankor kekfw ou met en pti leklersisman lo la si ou'n dir. Ler mon'n ekout la par egzanp, mon'n antann ki Lekol Plaisance Segonder li osi i form parti dan sa reform ki si mon'n konpran ou byen i pou abrit bann zanf an S1 ziska S2.

La ler nou pe koze ozordi, eski ou kapab donn en konfirmasyon Lasanble si bann lezot travay in ganny fer ek bann partener ki pou antre dan sa reform.

La mon pe mazin *SPTC* sa enn ki donn transportasyon pou deplas bann etidyan pou al kot bann lekol e osi bann lezot partener ki pou enkli ansanm dan sa reform pou nou fer sir ki sa reform i en sikse. Parske ler mon'n ekout ou la bomaten, mon annan gran konfidans e konfyans ki

si en tel parey i marse Sesel pou pli lwen kot i ete ozordi. Mersi Mr Speaker.

MR DEPUTY SPEAKER

Mersi Onorab. *Panel*.

MINISTER JUSTIN VALENTIN

Mersi Onorab, pou ou kestyon. Mr Speaker, mon anvi azout, mon anvi dir Onorab ki i annan bann- mon pran dernyen kestyon ki koz lo sirtou *SPTC*.

I annan bann premyerman mon'n dir dan *statement* ki nou pou koz ek bokou lazans aköz provizyon ledikasyon i pa pou neseserman en keksoz Minister Ledikasyon tousel. Pou nou retir tou partner i bezwen e konpran ki nou pe fer, donk i annan sa sansibilizasyon ki nou pou koze.

E apre byensir i annan bann zanfan zot menm. Bann zanfan, bann paran i neseser pou nou koz avek zot, pou nou eksplik zot ou konnen annandler bann premye reaksyon ki ou tande par egzantp toudswit, mon rapel letan nou ti pe komans sa leköl vokasyonnel, bann dimoun i komans dir ou ah mwan mon reste la mon pa anvi al leköl laba, ou konnen nou bezwen sa sansibilizasyon i enportan pou fer dimoun

realize poudir lavi ou pa toultan ganny sa ki ou anvi dan ou salon.

Ou bezwen bouze, ou bezwen bouze, marse, rode me nou dan Sesel, Sesel i en pti pei, Sesel i en pti pei ou kapab si ou kapab sorti *a* pou al *b* sirtou Mahe *a* pou al *b* dan lespas 1 erdtan ou pou'n fini arive. Donk, nou pa pou oule bann konversasyon parey - la mon pa pou kapab lev tar-mon pa pou kapab, nou pa pou oule sa bann kalite konversasyon afekte bann zoli nide bann zoli propozisyon.

Donk, nou pou bezwen travay, sansibiliz dimoun e sa ki pou enteresan letan sa reform pou ganny byen koze i annan bann keksoz bann trou vid ki nou pou vwar e la vwala kot bann lazans lezot lazans i antre.

Par egzantp en konversasyon ki kontan monte letan nou koz lo sa bann transformasyon, ou tann bann paran ki dir ou koumsa be la mon pti- sa gran frer pou nepli kapab anmenn pti ser leköl, e letan li i monte.

Donk, prezan ou kapab rode be ki mannyer nou pou kapab rezourd sa problem an servan lezot lazans, lezot fasilite ki egziste dan pei. Donk, tousala i pou bann konversasyon ki pou antre dan zwe.

Donk, lannen 2026 lannen 2026 i pou sa lannen preparasyon lo tou nivo ki nou pou bezwen e fer ki Minister Ledikasyon pou bezwen fer pou kapab akeyir sa sanzman, e parey mon'n dir pli gro transformasyon ki i pou ariv 2027.

Lo kote kalifikasyon mon 2 teknisyen toulede i anvi koze lo sa size.

**DIRECTOR OF EDUCATION
LEGISLATIVE AND
REGULATORY AFFAIRS
JEAN-MICHEL DOMINGUE**

Mersi Minister. Mersi Mr Speaker. Mersi Onorab pou ou kestyon. Lo kote SQA i en domenn ki mon'n ladan en pe letan avan ler mon'n al dan *tertiary education commission*.

SQA i annan 2 rol prensipal, e kot i konsern sa ki nou apel *general education which is primary, secondary, Upper secondary*, SQA i pa'n vreman ganny enplike kot i konsern akredit sa bann kalifikasyon ki ganny ofer.

E sa dan nou reform nou byen konsyan e nou pou fer sir poudir tou bann kalifikasyon ki pe ne la nou pou anmenn devan SQA i pou annan son *recognition* e i pou annan son *value* devan *labour market*. I annan sa *role inspectorate* ki SQA i fer ki ti sorti-*inspectorate* ti sorti dan Minister Ledikasyon in vin dan

SQA, sa *inspectorate* pou kontinyen son louvraz.

So, i pou annan sa lenspeksyon, i pou annan sa *monitoring* i pou annan sa evalyasyon. So, sa i pou kontinyen. En keksoz ki mon krwar nou bezwen *bear in mind* en kantite dan sa reform, se sa bann pwen kot nou bann manrmay, bann etidyan pou *exit* in ganny byen demarke avek NQF.

For example, kot sa *school living certificate* i ete is *at the end of a cycle* kot i koresponn ek NQF, SNQF level 2. So, nou'n tant pou marye tou nou nivo ansanm, nou annan en *Statement of Attainment* letan nou bann zanfan i fini S2; i en *Statement of Attainment* aköz i pa en kalifikasyon aköz i dan milye en pwen en *Level NQF*.

So nou pa kapab donn en zanfan en *qualification* la, so sa i pou ganny fer. So antre all *levels NQF level 3* i kot sa *certificate* i fini. Mersi Mr Speaker.

MR DEPUTY SPEAKER

Mersi Mr Domingue. Mon a pas laparol aprezan avek Onorab Sultan. Anr, *panel* i annan en lot dimoun ti pe al azout en keksoz avan. Mr Lesperance. *Please proceed*.

PS JOHN LESPERANCE

Mersi Mr Speaker. Mersi Onorab, annefe Onorab, mon byen kontan ou'n demann sa kestyon akòz sa i pou permet nou reponn en kestyon poudir kwa ki diferan, ki pou annan diferans dan sa nouvo reform ki nou pe anmenn avek ki egziste ozordi.

Ozordi letan en manrmay i konplet son program *TVET* zot sorti zot fini zot pa vremen antre dan en lanplwa ki ou a dir dan en profesyon. Avek sa enn nouvo ki nou pe anmennen la, letan en zanfan in fini sirtou letan in fini son S5, i pou annan li en kalifikasyon formel ki pou ganny rekonnet par *SQA*.

E sa kalifikasyon pou permet li antre dan en lanplwa profesyonnel koman en sarpantye kalifye lo en nivo 3, en mason, en lotel dan en komandan *tourism* en nenport ki size en program ki nou pou entrodwir dan *tourism*, dan lagrikiltir.

So i pou annan en kalifikasyon formel ki poudir be vwala, mon pe kit lekòl segonder mon pou annan en serti fika mon kapab al direktman dan en lanplwa. Mersi Mr Speaker.

MR DEPUTY SPEAKER

Mersi PS. Onorab Sultan.

HON VALDANA SULTAN

Mersi Mr Speaker. Minis, eski ou kapab eksplik nou par egzanp dan sistenm aktyel ler zanfan pe al dan swa *TVET*, swa lot i souvan baze lo zot bann rezilta, eski ou pou kapab eksplik nou si la dan sa nouvo *fashion* fer i pou depan totalman lo sa zanfan *of course* gide par son paran, ansennyan si i pou depan lo sa zanfan menm ki petet i en zanfan ki *as* ledikasyon, *as teachers* nou war i vremen akademik me selman sa zanfan li i anvi al dan sa vokasyonnel, eski sa zanfan pou lib pou fer sa? Mersi.

MR DEPUTY SPEAKER

Mersi Onorab. *Panel*.

MINISTER JUSTIN VALENTIN

Mersi Mr Speaker. Mersi Onorab, pou ou kestyon. Onorab, i vre, i annan- ou konnen e sa ki nou anvi korize dan sa nouvo fason fer - nou anvi premyerman koriz persepsyon *TVET*, e nou osi anvi koriz persepsyon teknik.

Ou konnen teknik mon krwar *PS* i get mwan, sa i son domenn i ti pou kontan koz lo la mon a les li apre koz li la, me selman sa premye bout ki mon anvi dir se ki nou bezwen koriz sa persepsyon pou fer ki dimoun pa asosye teknik avek abilite akademik.

Akoz, finalman letan ou gete nou bezwen dan tou sekter nou bezwen sa abilite lo tou nivo, ou konpran mwan, pou kapab devlop en sekter ou bezwen devlop lo tou nivo. E sanmenm sa ki ou war pli tar pou ou ganny en *lecturer* ki mason, i pou bezwen annan en bon labaz akademik pou li kapab vin en *lecturer* mason lo en nivo profesyonnel, lo en nivo profesyonnel lo en lenstitisyon.

Donk, nou pou bezwen revwar sa. Nou pou osi dan nou- dan sa striktir nou war poudir lentere zanfani evolve, i kapab sa lannen en etidyan ek son paran zot in tonm dakor pou antre dan akademik e apre pli tar zot dir be non mwan mon anvi fer en pe bann size teknik osi, sa i permet li fer.

Donk, nou pou kre en sistenm ki permet etidyan bouze pou li pa ganny kondannen pou ler in antre dan en *pathway*, reste dan sa *pathway* ziska lavi diran nou bezwen fer sa sanzman, nou bezwen fer li bouze.

Donk, i ou annan sa, e apre osi ou konnen en lot group dimoun ki dan sa reform i pou bezwen li osi pas atraver bann formasyon se bann ansennyan *careers guidance*. Zot, zot osi zot pour ganny ekspoze ek osi la realite partou, partou.

E nou pou ed zot devlope pour ki zot vin osi, zot *skill* akonpanyi zanfani devlope e byensir i vin pli meyer ki i ete ozordi. Zot pe fer bann louvraz fantastik, fantastik e byensir nou bezwen apiy zot aköz zot osi zot bezwen *être* en gran akonpanyater dan sa prosesis. Mersi. Mr Speaker, PS i anvi dir en keksoz lo vokasyonnel lekip teknik letid.

MR DEPUTY SPEAKER

Napa difikilte avek sa, *proceed* PS.

PS JOHN LESPERANCE

Mersi Mr Speaker. Mersi Onorab, pou ou kestyon. Annefe nou pe anmenn devan en sistenm ki nou apel *multiple pathways*, zis pou donn plis valer, parey Minis in dir in annan en konotasyon avek *TVET* dan lepase menm prezan ki nou tant pou donn li en non ki en pti pe rezerve pou en serten group etidyan. E sa in anmenn en move non pou *TVET* e se sa ki nou pou anmenn devan la i pou sanz tou sa persepsyon ki deza annan, e vwala ki nou pe apel sa *multiple pathways*, nou pou annan nou 2 *pathway* spesifik ki i pou konsern *vocational* ek *technical*.

E annefe nou pa pou apel li *TVET* dan nou nouvo sistenm, kot pou nou vwar poudir vokasyonnel pou

annan en group etidyan ki pou granny swazir baze lo zot nivo, ki pou ganny formasyon pou al dan en lanplwa direkteman.

Pou annan en lot group etidyan zot, zot pou ganny swazir petet pou fer formasyon en pti pe pli teknik.

E i annan sa laspe akademik parey Minis in mansyonnen e apre nou'n annan lot group pirman akademik, be nou pou annan serten fason ki etidyan ki'n antre dan vokasyonnel pou nobou al dan domenn teknik e sa i depan lo son performans, lo son abilite e son lentere.

E si zot montre sa zot pou annan sa posibilite pou zot bouze pou sorti dan en nivo pou al dan en lot, dan en *pathway* pou al dan en lot. E sa i pou en sistenm tre *flexible* ki nou pa pe kondann en etidyan aköz ou petet ou nivo akademik pa tro bon koman ou antre vwala, *this is the only route* ki ou pou annan, non, non.

Zot pou annan loportinite *eventually* pou dir be premye lannen in debourye in travay son performans i ase bon son lentere i montre nou kapab bouz li pou al dan en lot *pathway*, pou dir be vwala i kapab demen vin en enzenyer e nou annan levidans e nou annan levidans ki'n montre nou poudir i annan manrmay ki'n sivre sa *skills pathway* ki

ozordi zot pe fer louvraz enzenyer. Mersi Onorab.

MR DEPUTY SPEAKER

Mersi PS. Nou a kontinyen avek nou lalis. Onorab Adelaide ou prosen Manm.

HON FRANCOIS ADELAIDE

Mersi Mr Speaker. Dabor bonzour Minis avek ou delegasyon. Mr Chairman, donn mwan 10 segonn pou mon remersye e felisit lekol Baie Lazare pou zot aktivite ki zot in organize pou lafet zanfandredi, e felisit zot osi pou Sanmdi.

Lekol Primer Baie Lazare pe fer vreman byen e zot in kapab fer bann zanfandredi *meet* avek bann zwer *beach soccer* e zot in ganny sans ganny sa enteraksyon mon krwar ki en keksoz ki vreman bon. E mon krwar sel lekol ki'n organiz sa se Baie Lazare si mon pa tronpe. Petet i annan lezot pa bat mon, aköz Baie Lazare mon ti laba.

Mr Speaker, mwan mon kestyon pou Minis, dabor Minis avek ou delegasyon mersi bokou pou sa kouraz, sa rezilyans e sa determinasyon ki zot annan pou zot amelyor laprantisaz dan Sesel ki bokou parey, bokou letan in ganny sa *lapse* e napa person ki'n kouraze pou modifie li, me mwan mon war zot, zot

vremman kouraze, mersi bokou pou sa komitman.

E dabor Minis, mon kestyon pou ou se ki nou oule aranz, nou oule ki sa i bon, pour ki bann etidyan ki al dan lekòl segonder zot preparasyon dan lekòl primer in ase enn ki'n ase bon e nou annan en problem ek sa *mix ability learning* mon pa konnen si i sa *right term* mon pe servi.

Kot ti annan bann distrik ki annan plis bann etidyan avek bann problem, i ana ban distrik ki mwens, e nou war bann dimoun akademik petet zot tant pou pri en pti gin. E petet la pou annan konpetisyon, pour ki bann zelev ki sorti dan spesifikman distrik Baie Lazare zot osi zot lo sa menm standar ki zot napa bokou bann keksoz ki'n dekouraz zot ki anpes zot antre dan bann lekòl segonder avek bann bon bagaz. Mon krwar ou konpran mwan sa premye kestyon.

E mon dezyenm kestyon pou zot, Minis, si ou apel ti annan en promes pou annan en Lekòl Ekselans swa en lekòl vokasyonnel apre, apre miting Perseverance mon war ki sa tim ti *back down*.

Ki garanti nou pou donn mwan ozordi ki sa program ki zot in vin avek la i en bon program ki zot pou *bold*, zot pou *bold enough*, akòz byensir

i en program ki zot fek met devan piblik e byensir la deor piblik i annan diferan persepsyon me zot pou ganny *challenge* ki konviksyon nou pe donn sa Lasanble ki zot pou tenir, zot pou tenir lo zot prensip e sa program pou bouze? Mersi.

MR DEPUTY SPEAKER

Mersi Onorab. *Panel*.

MINISTER

JUSTIN

VALENTIN

Mersi Mr Speaker. Mersi Onorab, pou ou kestyon. Onorab, parey mon'n dir dan mon *statement*, baze lo ou premye kestyon kot i konsern preparasyon bann etidyan dan primer pou al segonder i annan en proze ki nou'n komanse e sa i ava en topik konversasyon pli tar.

Me selman nou pe donn lasirans la ki nou'n komans en program la- en proze ki bann *teachers* an zeneral i byen kontan, bann etidyan sa proze pe ganny pilote, Lekòl Bel Ombre avek Anse Aux Pins. E apre byensir nou kontan komans li par en pti Proze Pilot apre si nou reisir nou *expand* li nou *scale* li *up*.

Tousala osi sa proze i pou ed bann zanfan konpran zot rol, pou fer sir ki bann zanfan zot osi zot rezilyan, zot anpes zot ganny bat isi, bat laba. So i en proze ki devlop pa

zis zot abilite akademik, me osi zot lantouraz, zot kapasite entelektyel dan tou son sans.

Ou dezyenm kestyon, ki lasirans nou donnen pou nou pa *back out*? Onorab, sa reform i en zoli reform. I en zoli reform, e nou pou depans lenerzi pou nou fer dimoun konpran, eksplik zot. E mwan koman en edikasyonist en akademik e mon, e nou tou ki la lo latib, byensir osi dan Lasanble i annan bokou bann ansennyan, nou pou fer dimoun konpran ki direksyon nou anvi ale.

Me byensir, dan bann direksyon, dan bann konversasyon i annan bann pti lazistaz ki ou bezwen fer, aköz letan ou met keksoz osi ater an plas, lenplikasyon dan la realite annandler, ou konnen ou bezwen kapab fer bann sanzman, nou fleksib pou nou fer bann sanzman.

Me larsitektir sa reform, mon krwar i enn ki pou dirab, ki pou dirab. Donk, mwan mon pou donn bokou kouraz, bokou kouraz pou pous sa largiman devan e pou fer ki sistenm ledikasyon Sesel i ganny en bon sistenm ledikasyon segonder- striktir segonder, ki permet li avanse, ki permet bann zanfan reisir e ganny en bon lavenir. Mersi Mr Speaker.

MR DEPUTY SPEAKER

Mersi *Minister*. Mon zis oule enform Lasanble nou pou fer en pti sanzman dan nou letan la, aköz i reste nou ankor 8 Manm ki pe demann kestyon. So, nou pou pouse ziska omwen 1er, savedir *SBC* ki pe ekout mwan, zot fini konnen ki pou annan enteripsyon la avek zot program.

Lasanble nou pou ale ziska 1er. I annan miting *Defence Committee*, mon'n demann Chair pou pous li met li 1er, *Bills Committee* i ava kapab zwenn 1er edmi, e Lasanble i ava rebran 2er edmi avek Mosyon apre midi.

So, koumsa nou ava kapab epwiz bann kestyon, e Minis in envit Lasanble dan en lot sesyon pli tar pou ganny plis klarifikasyon ankor, mon krwar nou a kapab satisfè avek sa pou ozordi. Onorab Romain, *you are next on the list*.

HON GEORGES ROMAIN

Mersi Mr Speaker. Mr Speaker, Minis, ler mon'n ekout ou prezantasyon, ler ou ti pe eksplik bann lekol ki pou fer *S1, S2, S3 and 4*. Ler mon pe get *S5* ek *S6*, koriz mon, ou'n dir *English River* ek *Pointe Larue*, sa 2 lekol. E ler mon get sa 2 lekol enn i anvil enn i an kitan *airport* ki pa sitan lwen osi ek nou.

Me ler mon pe get bann lekol parey bann lekol parey

Baie Lazare, Anse Royale - Anse Royale kekfwa ou kapab dir i pa tro lwen ek Pointe Larue, bann lekòl Takamaka menm- bann anvil mon konnen i pou *ok*.

Alors Minis, mon pe mazin, ki si zot ti pe mazin pran en konsiderasyon an vi ki sa 2 lekòl mon konnen ki zistans zot ete ek kanmarad, ki zot pa ti pe mazin kekfwa dan en sans dan sak rezyon, ti ava annan en lekòl S5 ek S6, sa i zis en sizesyon mon pe dir ki ou konnen manm pa bezwen deplas lwen.

Zot ganny zot rezyon, zot konsantre dan sa bann lezot lekòl S1, S2, S3, S4, akòz zot al dan sa bann lekòl rezyon. *Ok* sa i ti'n en kestyon mon ti a kontan ganny pwennvi Minis.

E mon dezyenm kestyon Minis, an vi ki mon tann ou pe dir nou pe koz lo nivo enternasyonal ki zot pe met sa standar, me ler nou pe regarde lo kote SPTC, mon konnen enn de Manm in fer resorti sa lo kote SPTC.

E nou tou nou konnen ozordi i annan Minis Lanplwa ti vin dan Lasanble, pe dir ki i pe sanz ler travay pou sey *avoid* en pti pe sa *traffic jam* dan bomaten, be nou'n ganny dir ki lekòl pa pe sanze son ler pou komanse pou reste parey.

Alors, mon pe mazin, eski mon konnen zot pe fer rankont ek SPTC, eski SPTC

pou annan ase resours pou kapab deservi sa bann mouvman zanfan dan bomaten?

An vi ki deor nou konnen bann pei deor zot annan zot *school bus*, ki *obviously* i konpletman diferan ki nou annan ek isi, e alors mon pe mazin si osi sa pa pou kre en problem ek SPTC, an vi ki pou annan bokou mouvman e bokou travayer i servi SPTC pou al travay? Si sa koze ek SPTC ou krwar i sa i pou en keksoz pozitiv ki ou krwar i pou marse?

Alors, mon ti a kontan ganny pwennvi Minis lo la. Mersi Mr Speaker.

MR DEPUTY SPEAKER

Mersi Onorab. *Panel?*

MINISTER JUSTIN VALENTIN

Dakor, *ok*. Mersi Mr Speaker. Mersi Onorab, pou ou kestyon. Premyerman mon ti a kontan petet Mr Jean Marc i koz lo rezondet par deryer swazir sa bann lekòl ki pou ganny klasifye koman *Upper*, *Lower* - ti a bon nou eksplike e apre i kapab permet mwan petet fer serten pti, azout serten pwen.

E apre mon ava koz lo sa konversasyon ant ledikasyon SPTC.

DIRECTOR OF EDUCATION

**LEGISLATIVE AND
REGULATORY AFFAIRS**
JEAN-MICHEL DOMINGUE

Mersi Minis. Mersi pou, ou kestyon Onorab. Lo kote ki mannyer bann lekòl in ganny selekte, parey in dir pli boner par Minis in ganny fer *according to* zeografi. Nou'n sey *as much as possible* pou fer ki bann zanfan pa bezwen deplas bokou e malgre i pa pou toultan mars parey, me selman i annan serten seleksyon ler in ganny fer pour ki parey ou'n dir i annan bann *traffic jam*.

Nou'n sey nou mye posib pour ki dan bomaten ek apre midi sa mouvman i ganny fer *against* trafik, pou li pa vin ede kontribye dan *traffic jam*. E par egzant letan nou pe koz lo lekòl teknik vokasyonnel, nou'n sey plas li dan bann landrwa kot i annan en konsantrasyon bann lendistri ouswa bann landrwa kot zanfan i kapab al dan zot *WBE*.

Par egzant letan nou pe koz lo kote tourizm, *this is* en rezon petet akòz Beau Vallon letan nou pe koz kekfw lagrikiltir, sanmenm sa en rezon Anse Royale. So, an zeneral sa i bann lespri ki nou ti pe pran.

E letan nou pe get lo kote *lower secondary* petet akòz nou'n swazir Anse Boileau, letan ou gete ki lamazorite

lekòl zot konsantrasyon i bor dan lavil, anler dan sid, dan *west* i annan Anse Royale Anse Boileau ki i pa bokou segonder.

So, pou mouvman zanfan nou'n war ki i en pti pe pli fasil pou sirtou sa *S1, S2* e larestan ki pe al *S3, S4* e *S5, S6* nou'n met li i Pointe Larue. E an menm tan osi letan nou ti pe fer sa bann seleksyon lekòl, ki evidaman i pa *cast in stones*, i kapab annan bokou plis lezot diskisyon ki ganny fer otour sa, me selman nou ti pe osi get li an konteks son groser e bann diferan lekòl dan son rezyon ki i pou pe deservi.

So sa i bann diferan konteks ki nou'n met ater, e evidaman letan nou'n zwe sirtou Mahe avek sa 9 segonder, i annan bokou travay ki'n ganny fer avek *data*, nou'n servi *data* aktyel premye term 2025, kot letan nou pe fer sa bann klasman *S1, S2, S3, S4* e swa *S5, S6* ki pou vin avek, nou'n servi *the numbers* ki egziste e nou'n *forecast* li *for a mother reform* when it comes. Mersi.

MR DEPUTY SPEAKER

Mersi. Kestyon *SPTC* whether ou satisfè, ou ki pe al reponn prezan.

**MINISTER JUSTIN
VALENTIN**

Mr Speaker, mon pou sagren si *traffic jam* pa- i vin sa fakter ki anpes nou fer sa sanzman.

Nou pou bezwen- wi, pou le moman la dan sa striktir aktyel ki nou pe *operate* nou pa ti pe mazin sanz ler lekòl. Me selman o firamezir nou devlope, o firamezir nou aplik sa reform si i annan bann lekòl ki nou bezwen zwe avek ler lekòl i pou enn manke ki nou pou zwe avek.

Par egzanp, in osi etabli ki nou ler lekòl resers i dir nou i enpe tro boner, i tro gran maten, tro gran maten sirtou sa nivo laz zanfan segonder. Enternasyonanman en bon pe lekòl i komans 9er. E sa i riske rezourd en pe bann difikilte ki annan lo larout sirtou *traffic jam*. Donk, nou, nou pou reste fleksib lo sa kote.

E nou konversasyon avek SPTC byensir pou al dan tou direksyon ki nou krwar pou anmenn benefis pou lenplimantasyon. E apre sa ki enteresan ankor, parey mon pe dir sa i baze lo la realite ozordi. Me i for posib ki avek sa lenplimantasyon nou war nesesite, nesesite piblik oubyen prive i war nesesite antre dan sa zwe, fer bann servis bis spesyal pou lekòl. Tousala.

Donk, i-, annandler en reform i kre bann lezot devlopman ekonimik bann loportinite dan pei. Donk,

annou vwar ki i kapab arive. Mersi Mr Speaker.

Selman Mr Speaker, mon anvi dir ankor en lot pti keksoz akòz mon per, mon tann sa mo S6 i vini tanzantan, mon per pangar bann etidyan ki pe ekoute ozordi zot krwar zot tou zot pou lekòl ziska S6, sa i fer zot per sa. Akòz sa i en premye keksoz ki nou bezwen al dir zot, i pa vedir lekòl segonder pe arive ziska S6 pou tou etidyan.

Sa nou bezwen fer zot kler, e sanmenm sa i pou osi bezwen ki nou al koz avek zot eksplik zot ki pe arive. Donk, i enportan sa pti fraz. Mersi Mr Speaker.

MR DEPUTY SPEAKER

Mersi *Minister*. Onorab Porice.

HON DOYACE PORICE

Mersi Mr Speaker. Mr Speaker, Minis avek ou delegasyon, tou mon bann koleg MNAs en bonn apre midi.

Petet mon pou dir, mon pou felisit Jean Marc koman enn mon zenn dan Baie Ste Anne ki'n vremen aktiv, e ozordi mon war in ariv dan en post o nivo dan Minister Ledikasyon ki fer nou byen fyer lo Praslin.

(APPLAUSE)

HON DOYACE PORICE

Apard ki travay, in vremen aktiv mon kapab dir dan mon kote osi, dan kominote koman en volonter e osi dan *sports*. E pour sa mon pou dir li mersi kontiny sa larout ki ou a vin en pe pli o.

Minis, i anann enn mon kestyon ki'n ganny demande, e petet letan nou ava ganny li pli an detay mon ava pli byen konpran li. Me solman mon annan en dezyenm kestyon; eski i ou annan en swivi konsiltasyon avek bann paran e lezot partener Praslin ek La Digue, pou Praslin avek La Digue pou ed zot konpran pli byen sa reform? Mersi.

MR DEPUTY SPEAKER

Mersi Onorab. Panel.

MINISTER JUSTIN VALENTIN

Mersi Mr Speaker. Mersi Onorab. Sertenman wi, i pou annan gran, parey nou pe dir la, ler nou pou sorti la, la ozordi nou pe al deklans nou dan en seri konsiltasyon lo tou nivo e Praslin nou'n deza mon tim in monte e la mon ganny sinyal ki semenn prosen pe al ankor Praslin e lo zil donk, i en konversasyon ki nou pou kontinyen.

En sansibilizasyon ki nou pou kontinyen lo tou nivo, pa zis Praslin byensir lo Mahe, aköz nou anvi ki tou dimoun i

konpran ki pe arrive. Mersi Mr Speaker.

MR DEPUTY SPEAKER

Mersi *Minister*. Onorab Andre.

MINISTER JUSTIN VALENTIN

Mr Speaker, Mr Domingue i anvi dir en....

MR DEPUTY SPEAKER

Mr Domingue i anvi azout keksoz. *Proceed*.

DIRECTOR OF EDUCATION LEGISLATIVE AND REGULATORY AFFAIRS JEAN-MICHEL DOMINGUE

Mersi Mr Speaker. Zis egzakteman, zis en fraz. Aköz sa ki mon ti anvi dir si mon servi sa term Angle ozordi *is the starting gun, within the next 2 semenn* ki pe vini la, mon pou al Praslin, mon pou al La Digue e apre mon pou al dan tou sant, nou pou bezwen fer sa, aköz nou pou bezwen fer tou dimoun etidyan, paran, *stakeholders* bann lezot Minister osi i pou bezwen konpran. Aköz sa reform i pou enplik nou tou.

So, i enn bann gro travay ki nou pou bezwen fer e nou pou bezwen dedye letan pou fer sa. Mersi Mr Speaker.

MR DEPUTY SPEAKER

Mersi Mr Domingue. Mon ava donn laparol Onorab Andre.

HON CLIFFORD ANDRE

Mersi Mr Speaker. Mr Speaker, par lefe ki i mon premye kestyon dan lazournen, mon ti a kontan profite avek ou permisyon pou mwan felisit tou dimoun ki ti ralye Dimans dan Konvansyon LDS.

(APPLAUSE)

HON CLIFFORD ANDRE

E mon krwar nou'n fer listwar ki zanmen in deza ganny fer, alors felisitasyon LDS pou se ekselan Konvansyon ki nou'n fer e nou dimoun in desann enkrwayab.

Mon kestyon Minis se, an vi ki- *ok* Mr Domingue in dir *starting gun*, vi ki nou lo *starting block* e *gun* pe al pete annefe in fek fini pete la pou nou komanse, eski Minis ou ti kapab dir kekfw la piblik, bann ki pa pou posiblerman *attend*, bann konsiltasyon ki pou kontinyen, ki lavantaz benefis sa reform antye i pou annan pou Sesel e pei an zeneral?

E mwan mon pou demann en dezyenm kestyon Minis. Letan nou gete, sa bann reform i en keksoz ki fantastik ki bezwen arive dan evolisyon ledikasyon, me eski nou'n osi get ki mannyer bann ansennyan ki pou form par sa bann evolisyon zot bann

package pou osi ganny evolye avek sa evolisyon?

Ki zot osi zot kapab santi zot par sa travay, me selman zot osi zot a konnen poudir i annan en amelyorasyon dan sa ki zot, zot pou gannnen letan zot pe deservi nou bann zanfan isi Sesel. Mersi.

MR DEPUTY SPEAKER

Mersi Onorab. Mon ava envit *panel* pou larepons.

MINISTER
VALENTIN**JUSTIN**

Mersi Mr Speaker. Mersi Onorab, pou ou kestyon. En zoli kestyon. Annefe bomaten tou bann kestyon i bann zoli kestyon, i permet nou pous nou largiman, modifie nou bann refleksyon. Les mon re azir ou dernyen kestyon an premyerman.

Parey mon'n toultan dir letan mon vin dan Lasanble mon'n vin defann Bidze, le moman ki mon tandepi i dan sa pozisyon kot pou kapab aprezan re aranz *scheme*, ki nou'n ganny dir la met lo en *hold*, aköz nou sityasyon finans.

Le moman ki mon tann dir annou get dan *scheme* mon krwar mon pou- mon *scheme* in fini pare li, i reste zis pou *submit*, aköz wi, *teachers* i bezwen en *good deal* pou kapab kontinyen fer fas, pou

ledikasyon kapab kontinyen fer fas avek sa realite.

My dear colleagues, konmsi mon anvi dir avek bann dimoun, tou dimoun laba deor lo teren i *tough* pou bann *teachers*. E, nou bezwen nou napa swa, nou, nou bezwen vitman gete ki mannyer nou kapab kontinyen siport sa bann *teachers* ki travay dan sa lanvironnman konplike.

Dezyenmman, ou kestyon Onorab ki benefis? E ankor bann benefis letan bann *teachers* i koze lo benefis lo sa sanzman, i annan en keksoz ki pa'n monte ozordi be la nou a fer li montre atraver ou kestyon, se sa problemn disiplin.

Bann *teachers* in eksprimen ki sa dekoneksyon *S1, S2 lower* avek bann gran zanfan i nesaser. I annan en bon pe letan *teachers* pe eksprimen, zot ki lo sa teren zot in dir nou ki i enportan dekonekte sa group. Akoz en bon pe tirayman i arive petet an rezilta sa 2 group ansanm lo teren.

Donk, premye benefis mon krwar e mon konfidan mon bann tim ki'n travay lo sa proze, osi sa in kataliz sa reform, dekoneksyon segonder *Upper, Lower at last Lower* avek son *Upper – Middle – upper* nou'n dekonekte sa. Donk, i ava annan sa 4 lekòl ki

mon'n dir taler e zot pou *lower, lower secondary S1, S2* - dakor?

E byensir osi i ava prepar sa bann zanfan *S1, S2* sa tranzisyon kot zot in sorti zot in mont dan lekòl segonder pou en bon pe etidyan nou'n gran en sel kou yer swar. I ava petet en tranzisyon en pti pe pli lantman pli trankil, zot a mont dan *lower secondary* apre zot ava ganny prepare osi pou zot la prezan al dan *Middle* avek *Upper*, mon krwar sa i pou en benefis enkrwayab.

E dezyenm benefis, parey nou pe tann dir la, si nou reisir kapab e mon krwar nou anvi reisir kapab, kre dan bann lekòl kot pe ganny teknik e vokasyonnel kre sa sant ki nou bezwen kree, e zanfan i kapab dir be *ok* ler mon kit lekòl segonder akòz sa ki nou anvi, letan mon kit lekòl segonder mon annan mon en sertifika ki mon kapab servi. Sa ki nou anvi.

E apre *S4* ler i kite, i kapab dir be *ok S4* mon kapab servi mon sertifika pou mwan ganny en lanplwa, mon kapab servi sa sertifika prezan pou mwan al dan lekòl dan sant profesyonnel pou mon prezan komans en Diplonm.

E lekòl, e sa pou annan osi en lenpak direk lo sa sant profesyonnel, akòz zot, zot pou pe dir prezan mon pou kapab fer bann nouvo program,

bann nouvo program mon pa bezwen dan post segonder dan sant profesyonnel fer *apprenticeship, apprenticeship* dan *professional center* i disparet, akòz i pou ganny fer dan segonder. Ou pe ganny mon?

So, i annan sa transformasyon. E apre sa ki enteresan pou bann etidyan ki akademik, ki dan group akademik zot pou'n komans zot depi S3, zot pe swiv en *pathway* akademik avek zot bann ansennyan. E nou'n war ki ker ansennyan i akonpany en group zanfan ziska finisyon i annan en bon pe letan ki i annan bann zoli rezilta.

E nou war sa dan bann lekòl prive. E sa i montre sa kontinyasyon ki mannyer sa kontinyasyon in ede en kantite pou fer ki sa rezilta enteresan. E nou war sa, nou war sa ozordi letan nou get par egzantp *IGCSE result* ou war bann etidyan ki pe perform ekselan dan *IGCSE result* i sanz son klima i al dan *A Level*, problemn grav.

Mon krwar i annan en kontinite, e sanmenm sa prezan ki nou pe dir benefis prezan pou bann ansennyan, ansennyan ki ozordi i anvi- akòz i annan en ta ansennyan dan lekòl dan *secondary school* pe dir zot be mon anvi mon osi *teach* en kou *A Level*, mon anvi

teach A Level i anan sa abilite i annan sa konpetans.

E la nou pe dir li napa problemn ou pou annan en group etidyan ki ou pou komans avek depi dan S3, anmenn li e ou osi ou ava *teach A Level*, ou osi ou ava donn lanmen prodwi sa bon rezilta.

Donk, ou war mon war en zoli striktir la mon devan mwan. Mon konnen bann lezot Onorab pe war sa zoli striktir e si sa parey nou pe dir i reisir nou pou *significantly improve* ledikasyon dan Sesel. E nou pou kapab prezan ganny sa group dimoun ki nou anvi pou kapab pran par dan devlopman sosyo ekonomik sa pei. Mersi Mr Speaker.

MR DEPUTY SPEAKER

Mersi Minister. I reste nou ankò a pe pre 27 minit. Nou a sey bouz en pe pli vit. Onorab Naidu. I reste nou ankò 5 Manm pou entervenir.

HON SATHYA NAIDU

Mersi Mr Speaker. Mr Chair. Bonn apre midi Minis ek ou delegasyon, Zisteman sa reform i en pa an avan pou regard lavenir fitir nou pei, vizavi konsèrn ki serten dimoun i kapab annan.

Akòz eski prononsman vizavi sa reform pe ganny fer la dan mwan Zen le 2, le 3 Zen 2025, e non pa pli boner?

Eski in annan en travay ki'n ganny fer par deryer sa reform ki pe ganny prezante ozordi vizavi konsiltasyon avek bann lekol ki pe tonm lo *Lower secondary, Middle secondary, Upper secondary*. Eski in annan en konsiltasyon avek tou bann ansenyan pou zot konpran lenportans sa reform ki pe al ganny fer?

Par legzanp, Belonie in sorti koman en lekol ki pe al ganny konsidere vizavi sa reform ki pe tonm dan *Lower secondary*.

E eski sa bann lekol osi pou pran sa responsabilite pou vin koman *the carrier of the message* vizavi reform ki pe al ganny anmennen?

Akoz ozordi nou vwar Minis ek son delegasyon pe eksplik lenportans sa reform. Eski sa bann diferan lorganizasyon dan bann antite departman Ledikasyon pe al pran sa osi amen pou *drive the message forward*?

Akoz pli gran parti prenan ladan se bann ansenyan, apre bann zelev e paran. Byensir ozordi sa legzersis ki pe ganny fer i annan son lenportans.

Me malerezman i kapab annan enn ou de la deor ki inyoran e la i pou annan bann konfizyon nou'n fek site poudir "ar la ozordi nou pe al ziska S6".

E dimoun pa pou vreman sezi lenportans sa travay ki pe ganny fer. Mersi.

MR DEPUTY SPEAKER

Mersi Onorab. *Minister*.

MINISTER

JUSTIN

VALENTIN

Dakor. Mersi Mr Speaker. Mersi Onorab, pou sa kekyon an menm tan refleksyon. Annefe depi boner lannen pase sa tandans ti pe ale.

Ti annan en group in annan formen depi lannen pase ki ti pe travay lo reform dan ledikasyon segonder, zot ti'n deza fer bann propozisyon, me apre letan parey nou'n dir letan sa letap pou fer transformasyon lekol segonder, Perseverance pa'n arive.

Sa nide in ganny in ganny met ater, me nou dir non nou annan en zoli nide, annou pous sa nide i en zoli nide. Donk nou'n re travay li. Donk bann lekol in ganny konsilte. I pa tou *teachers* ki'n ganny konsilte. Me selman i annan bann group travay ki nou'n demann zot pou al kot zot lekol al koz ek bann *teachers*, retournen vin donn bann pwennvi. Sa in ganny fer. Dakor.

Me-me selman parey nou pe dir nou pa ti a voudre bann dimoun i mal get sa nide ki nou pe fer. Me pli enportan ki

nou anvi dir ozordi, i pa vedir *teachers* ki dan en lekòl ozordi zot ki pou dan sa lekòl la. I pou annan mouvman *teachers*. *Teachers* pou bouze akòz byensir ou kalifikasyon, ou abilite zot pou bouze.

E apre i annan en lot keksoz ki nou anvi promote dan Minister Ledikasyon, nou anvi dir avek en *teacher* ki ou pa en ansenyan lekòl *x*, ou. Ou en ansenyan dan sistèm ledikasyon Sesel.

Donk i annan en peryòd letan ki sistèm i riske bezwen ou lekòl *b*, 3 mwan pli tar sistèm i apel ou i dir ou koumsa, nou bezwen dan sistèm dan lekòl *y*.

So, nou anvi *teachers* osi i vwar sa. Donk avek sa i pou permet nou zwe avek bann resous ki nou annan. Ozordi nou pri akòz bokou dimoun “ar mon en *teacher* lekòl *b*, mon pa pou bouze mon reste la, mon’n fer 25 an la, mon anvi ganny mon gratwite la”. Konmsi i konplik sityasyon.

Be nou, nou anvi dir non, ou dan en sistèm annou bouze e sa i permet ou osi ou devlopman ou bouze. E si byensir ou pou napa sa konpetans ki nou ava donn ou, nou ava sey nou mye.

E en lot group dimoun ki pou enportan dan sa konvèsasyon se *SITE*. *SITE* se bann akonpanyater bann *teachers*.

Donk nou anvi ki zot osi zot devlope pou zot kapab zwe sa rol pou donn lanmen form sa group ansenyan. E la mon profite a sa moman mon fer rapel osi bann etidyan ki pe grandi.

Zot partisipasyon dan devlopman ledikasyon i enportan donk zot osi zot pe ganny apele par sa reform, pou zot vin osi bann ansenyan, bann ansenyan, bann travayer ledikasyon pou zot kapab donn lanmen donn Sesel en bon sistèm ledikasyon. Mersi Mr Speaker.

MR DEPUTY SPEAKER

Mersi *Minister*. Mon pou donn laparol Onorab Bastienne.

HON DESHEILA BASTIENNE

Mersi Mr Speaker. Bonn apre midi Mr Speaker. Bonn apre midi Minis ek ou delegasyon. Mr Speaker, mon osi mon pa pou rat sa sans permet mwan pou remersye tou bann zabitan ek sipòter dan Perseverance ki ti desann Dimans pou vin donn nou sa sipòr.

E mon dir zot en gran mersi pou tou dimoun ki ti vini Dimans pou sa konvansyon. Minis, mon kestyon, mon ti annan de kestyon malerezman in ganny reponn me selman i annan en bout ki ler ou’n reponn ou kestyon mon pa’n tro koz lo la.

E la ou'n letan ou ti mansyonn konsiltasyon zot in nonm pou al lo zil Praslin, La Digue, bann sant pou koz ek bann etidyan, mwan, mon ti a kontan osi demann zot vi ki nou annan sa lekar sa 2026, 2027 rol medya eski li medya pou ganny servi o *maximum*, pou zot kapab zot osi donn sa sipor pas sa lenformasyon edikasyon?

Ki *by the time* sa nouvo reform in pare nou etidyan, paran zot menm zot in osi pare ek korpere pou zot kapab akeyi sa nouvo fason aprantisaz ? Mersi.

MR DEPUTY SPEAKER

Mersi Onorab. Mr Domingue.

MINISTER JUSTIN VALENTIN

Mersi Mr Speaker. Onorab, mersi pou sa kestyon pou sa pwen. mon vwar Mr Domingue, i anvi dir en keksoz lo la, mon a les li dir apre mon a apiye. Mersi.

DIRECTOR OF EDUCATION LEGISLATIVE AND REGULATOR AFFAIRS JEAN-MICHEL DOMINGUE

Mersi Mr Speaker. Mersi Onorab, pou le kestyon. Wi, nou annan *actually* letan nou'n fini devlop *concept* e nou'n anmenn *Cabinet* nou'n komans striktir -akoz nou, nou *part of the* sa *Steering*

Committee. Prezan *Steering Committee* in fer en kantite *sub committees* e nou annan en group espesyalman *for communications* i par zot plan pou anmenn medya. *Actually* letan nou pe komanse *from* dan 2 semenn - nou pou al Praslin La Digue medya pou ganny enplike dan tou sa bann tou sa bann kozri ki nou pou fer.

So, wi, e nou pe - i annan bann *leaflets* - i annan bann *TV sports*, tousala nou pe komans travay lo la pou nou anmenn devan pou tou dimoun konpran le baz ki mannyer keksoz pou ganny devlope, lekel ki pou ganny afekte, e ki mannyer keksoz pou al pli devan *from there*.

MINISTER JUSTIN VALENTIN

Mr Speaker, Mr Domingue in dir tou keksoz, tre byen.

MR DEPUTY SPEAKER

Tre byen, ki ed nou ek letan. Onorab Roucou, *you are next*.

HON MICHEL ROUCOU

Bonn apre midi annefe. Minis, mon kestyon i se ki mon konnen avek lanons la ki pe fer ozordi dan Lasanble, definitivman nou pou annan bokou dimoun ki pou vin devan.

Eski ou Minister i annan en fason ki zot pou met an plas

la, konnen avek eleksyon ki pe vini definitivman bann keksoz pozitiv, definitivman pou annan en serten group dimoun ki pou fer li vin dan en fason pou ganny gete negativ.

Eski pou annan en fason ki mwan demen paran oubyen en group dimoun i apros mon lofis, i dir mwan koumsa *ok*, i ti tann sa dan Lasanble i anvi en pti pe plis leklersisman lo la, eski atraver Minister Ledikasyon i annan en provizyon ki zot pe mete la ki demen nou, nou kapab diriz sa bann dimoun - be ale al kot Minister Ledikasyon ou war *PS* oubyen ou war tel dimoun.

Ki laba ou a kapab ganny plis lenformasyon lo sa reform ki pe ganny pase dan Minister Ledikasyon.

Apre Minis, mon tann ou koz en pti pe lo la, i annan sa *S6* ki ou'n koz lo la, si ou kapab donn nou en pti pe plis lenformasyon lo la li menm li.

Akoz pou mwan mon santi poudir i en keksoz ki pou nouvo, oubyen mon pa konnen si dan lepase ti annan, ki sa i ava kapab ed bann dimoun ki pe ekout nou? Mersi.

MR DEPUTY SPEAKER

Envit *panel* pou donn en larepons.

MINISTER
VALENTIN

JUSTIN

Mer Mr Speaker, mersi Onorab. Onorab, ou'n fer en zoli sizesyon Bonn apre midi annefe. Minis, en zoli pwen ki pou le moman i pa ti dan i pa ti dan nou plan pou met en pwen kontak direkteman pou sa.

Me selman ki nou ti toultan anvi osi dan Ledikasyon pa neseserman pou sa, nou ti anvi - nou anvi en dimoun e sa pos pe ganny nou pe travay pou nou kre en pos.

Kot en i annan bokou lezot keksoz ki dimoun i vin rode kot ledikasyon. Konmsi annandler en dimoun i vini, i vini i fristre, i anvi vwar en dimoun.

Be nou, nou pe kree pou annan enn sa dimoun ki la ki premye ki vwar sa piblik e apre li i kapab diriz sa dimoun dan en landrwa apropiye.

E la zisteman la ou pe - aköz sa i en reform, vre i en reform e sa reform i kapab en pe *bizarre* pou en ta dimoun.

Donk, wi, nou ava fer sir ki nou rod nou en pwen kontak ki letan dimoun - e mon konnen bokou bann Onorab, ki pou pe servi sa kontak.

Pou aköz bann dimoun demann zot isi demann zot laba, e sa i a kapab ede kler sir bann diferan pwen. Donk, zoli sizesyon ki nou note la.

Dezyenm kestyon, sa S6 i senpleman i aplik senpleman pou sa seksyon *academic pathway*. *Academic pathway* kot sa etidyan i fer son *middle S3,S4* e dan *S3,S4* i fer son *IGCSE*.

Donk, *IGCSE* prezan sa *extended* ki normalman ti fer dan *S5* prezan i pou fer li dan *S4*. Prezan son 2 lannen *A Level* olye prezan apre i al *SALS* son 2 lannen *A Level* i kontiny enn premye lannen son *AS* i fer dan *S5*, e apre son *A2* i fer dan en lot dezyenm lannen e nou pe apel sa dezyenm lannen *S6*.

Ozordi i annan li *S6* selman sa *S6* i *SALS* - i *SALS*. E apre en lot keksoz letan Mr Domingue, ti pe koz lo pozisyon *SALS*, ou konnen *SALS* ozordi i annan de ler vre pov dyab annandler zot ganny kriye *Professional Centre*; annan de ler par konvenyans zot ganny kriye avek lekol segonder.

Be ler menm zot *Minister* kot nou ete, dir nou kot nou ete? Mon krwar zot sa. Donk la prezan i ava annan en rol - en pozisyon.

E byensir pa demen bomaten ki byensir apre en serten letan *SALS* koman sa lekol pou *phase out* li. Akoz sa rol ki pe zwe ozordi pou ganny transformen dan bann lekol.

E byensir pou annan bann mouvman dimoun, e

mouvman dimoun dan diferan konteks i annan ki pou ganny promote, i annan ki pou ganny bouz a kote, i annan ki pou ler mon dir bouz a kote pa ganny met a kote a leka.

Non, konmsi al dan bann lezot lekol kot *A Level* pe ganny fer. Donk i pou annan tou sa bann mouvman e byensir i pou annan preparasyon avek bann dimoun pa pou kapab zis vini demen bomaten pou sorti la al la, non.

I annan bann preparasyon ki nou pou fer pou nou kapab gete ki pli bon, ki pli bon fason nou fer sa. Mersi Mr Speaker.

MR DEPUTY SPEAKER

Mersi *Minister*. Onorab Mondon.

HON TERENCE MONDON

Mersi Mr Speaker. Mr Speaker, bokou kestyon in ganny demande mwan mon pou tous sa size Gouvernans bann lekol dan sa nouvo lanvironnman.

Eski zot santi pou annan nesesite pou ranforsi Gouvernans bann lekol? E dezyenmman, lo zot program mon konnen zot mansyonnen kapasite bann ansenyan.

Petet si zot kapab elabor en pti pe ankor ki program zot pe mazine pou met an plas, pou kapab ranforsi kapasite bann ansenyan pou

zot kapab pli byen akonpanny bann etidyan? Mersi Mr Speaker.

MR DEPUTY SPEAKER

Mersi Onorab. *Panel*.

MINISTER JUSTIN VALENTIN

Mersi Mr Speaker. Mersi Onorab, an se konsern gouvènanans ozordi i annan en group - aneefè ozordi i annan en program entansif ki tou bann lekòl pe pran par lajan.

Nou pe viz li ver lotonmi, be selman i pa zis lotonmi, me ki mwayen lekòl i gany gouvènen. Donk i annan i annan bann *management* lekòl avek bann *Council Board* ki pran par lajan.

Donk sa formasyon *basically* pe dir avek bann dimoun, letan ou annan en lekòl pou gouvènen vwala bann fason fer, bann bon *practice* fer.

Donk an se konsern nou gouvènanans mon konfortab ki bann ozordi bann *leaders* ozordi pe fer en zòli travay. E byensir i pou annan nouvo *leaders*.

I pou annan nouvo *team Council* ki pou, ki pou vin an plas e sa i ava sa program i ava kontinyen. Donk, i ava en program ki gany repete avek bann lezot group ki vini.

An se ki konsern kapasite bann ansenyan, sirtou la nou vwar - konnen mwan, mon konfortab ki bann ansenyan ozordi i byen kalifye pou kapab anmèn sa sanzman.

Byen kalifye pou kapab anmèn sa sanzman petet annan de ler sa kontèks dan ki zot pe fonksyonnen, i en pe difisil. E la avek sa reform nou pou vwar en gran amelyorasyon dan kontèks.

Ki fer ki kapab permet zot delivre bokou pli byen. Me byensir en group ansenyan la ki nou krwar nou pou bezwen targete, sirtou bann ansenyan ki pe al dan sa *pathway academic*.

Akoz sa i pa pou zis Sesel sa, i pou osi sa group dimoun ki nou travay avek se *Cambridge* akòz evantyelman sa bann etidyan- bann ansenyan pou pe *teach A Level*.

E en bon pe zot pa'n zanmen formelman *teach A Level*. I annan in *teach A Level*, anba son lavarang in *donn tuition*, me selman dan en laklas formel i pa'n fer sa.

Donk nou annan en *partner Cambridge* i aste nou en kantite letan nou demann zot, zot osi anmèn bann, bann profesyonnel pou vin Sesel ki ed nou bann *teachers* pou kapab fer sa bann tranzisyon.

Donk, nou bann dimoun pou annan sa posibilite pou ot kapab devlop zot konpetans pou zot *teach* lo en lot nivo. Mersi Mr Speaker.

MR DEPUTY SPEAKER

Mersi Minis. Dernyen entervenans lo lalis ki'n demann kestyon - savedir nou'n fer byen avek zesyon letan se Onorab Bistoquet.

HON ANNE BISTOQUET

Mersi Mr Speaker. Bonn apre midi *panel*. Mr Speaker, mwan osi mon zwenn avek Onorab Woodcock, e Onorab Porice, pou mwan felisit Sir Jean-Marc - en Pralinwa, e kanmarad ki nou'n frekante nou'n fer *sport* ansanm, nou'n lekol Praslin Segonder.

E i enn ki in vreman met son etidyan avan tou, espesyalman Praslin Segonder mon konnen i ti pe travay avek bann etidyan sirtou ki annan bann bezwen spesyal e mon pti frer i enn ki in benefisyè in ed en kantite. Mersi *Sir*.

E Minis mon konnen pou dir avek kontribisyon Sir Jean-Marc i pou en sikse sa reform ki zot pe fer. Mon kestyon i al koumsa Minis.

Dan reform ki ou'n dir i pou annan 4 lekol *Lower secondary* S1, S2; 3 lekol *Middle secondary* S3, S5 apre *Upper secondary* sa ki nou pou

apel li nivo *academic* en sort of Lekol Ekselans pou annan 2.

So sa i vèdir si mon pe byen analize, nou pou annan plis laklas dan bann nivo pou bann lannen. Eski pou annan ase ansenyan pou *cater* sa demann? E ki ou *Minister* pe anvizaze fer lo *recruitment* plis ansenyan vizavi sa reform?

E mon dezyenm kestyon Minis ou'n osi dir ki etidyan teknik pou kapab bouz dan nivo *academic*, etidyan *academic* pou kapab bouz dan nivo teknik, eski dan reform zot pe anvizaze re anmenn sistenm *retake* en lannen ki en zanfan in *fail* sa ki nou dir kaye mon krwar?

E si non ki zot pe anvizaze fer pou en zanfan ki'n *fail* en lannen ki li osi i pa ava perdi, eski i pou kontinyen i zis i *switch to* sa lot nivo i bouz dan teknik oubyen eski zot pou re travay ek li sa lannen ki'n *fail*? En fason ki li osi i ava azour avek son devlopman ki ava kapab perform pli byen li osi. Mersi.

MR DEPUTY SPEAKER

Mersi Onorab. Mon ava envit *panel* pou larepons.

MINISTER JUSTIN VALENTIN

Mersi Mr Speaker. Mersi Onorab, pou ou kestyon. Mon'n dir lo kote *recruitment* ki en lot legzersis ki nou pe al

fer osi se pou vwar reso bann *teachers* bann ki nou annan.

E imedyatman letan nou pe fer sa kalkilasyon akòz nou ti'n deza fer sa kalkilasyon par egzanp lannen pase. Nou ti'n vwar ki nou ti annan en sirplis 54 *teachers*.

Ki nou kapab osi pe fer dan sa prosedir, i annan bann *teachers* petet ki nou'n *recruit overseas* i riske petet nou pou nepli bezwen son servis e nou pou bezwen servis petet en lot group *teachers*.

Alor la nou kapab zwe avek sa baze lo la realite ki nou pou annan. Donk nou krwar nou krwar ki sa reform pa pou met presyon *recruitment* lo nou, pa pou mete sa presyon *recruitment* lo nou. Me selman i pou met sa presyon petet pou bezwen dir orevwar serten group dimoun.

Dezyenm pwen i konsern bouze kaye. Nou pa ti a voudre okenn zanfan - lentansyon se zanfan i kapab ganny siporte pou zot fer zot lannen efektiv e monte.

E petet dan bann ka vreman ekstrenm ki nou vwar en zanfan bezwen kapab repete. E repete laplipar ditan i annan sa konsiltasyon ant paran sa zanfan osi, la nou fer sa prosedir.

Me selman kaye pa tro popiler - pa tro souvan dan sistenm ledikasyon. I vreman rar - i vreman rar.

Me nou, nou anvi ki zanfan pa kaye sa nou lentansyon prensipal pa kaye, kapab bouze e nou donn li sa sipor pou li bouze.

E byensir i annan ki bouz pli vit ki kanmarad la osi nou kapab gete ki mannyer nou kapab fer sa prosedir vin pli byen. Mersi Mr Speaker.

MR DEPUTY SPEAKER

Mersi *Minister*, e mersi *panel* dan - selman sa size *Minister*, *panel* i byensir in enteres bann Manm. La letan nou pe koze i annan trwa Manm ki dir ek mon pou dir be zot ti annan lentansyon entervenir.

Me malerezman letan pa dan nou faver. Donk mon swete ki sa promes pou kontiny sa langazman akòz parey Onorab Naidu, in dir nou, nou pou enn bann *stakeholder* ki pou *carry the message forward*, akòz nou reprezant bann distrik kot dimoun pou demann nou bokou lenformasyon lo la, alor nou ava kapab kontiny sa kontiny sa konversasyon.

Mon ava remerisi panel ki ti pe akonpanny Minis Valentin, pou sa *statement*. Ti annan Sekreter Prensipal pou Sekter Devlopman Ledikasyon Mr John Lesperance. *Director of Education Legislative and Regulatory Affairs* Mr Jean-Michel Domingue, e osi *Principal*

Planning Officer Mr Jean-Marc Athanase.

Avan ki nou *adjourn* nou ava demann *Sergeant at Arms* pou re konstitye Lasanble, sorti dan Staz Komite. Mersi bokou *Sergeant at Arms*, donk nou pou *adjourn* la, nou pou re pran travay 2 er edmi.

Pa bliye i annan *Defence Committee meeting* ki pe fer 1 er, *Bills Committee* pe zwenn 1 er edmi alor nou ava *adjourn* e re zwenn 2 er edmi.

(BREAK)

MR DEPUTY SPEAKER

Bonn apre midi tou bann Manm, nou pou kontinyen avek nou *Order Paper*, ki nou'n komans travay lo la depi bomaten.

E nou prosen *item* lo *Order Paper* se Mosyon. I annan trwa Mosyon lo *Order Paper* sa semenn e Mosyon nimerò 1 i dan non Manm Proporsyonnel pou *LDS* Onorab Gerard Bijoux.

Mon pou envit ou fer lentrodiksyon ou Mosyon en Manm i ava segonde apre mon a re donn ou laparol pou entrodwi ou Mosyon. Onorab ?

HON GERARD BIJOUX

Mersi Mr Speaker. Bonn apre midi tou bann Manm Onorab, bonn apre midi bann dimoun ki pe swiv nou lo televizyon ou menm pe ekoute lo radyo.

Mon Mosyon pou Lasanble pou apre midi pou laprouvasyon i lir koumsa, Sa Lasanble i eksprim sok avek lakoler vizavi logmantasyon dan labi zanfàn ki pe ogmante dan Sesel.

E pe demann bann agrese pou reviz zot konportman. Sa Lasanble i osi senpatiz avek tou bann viktim e siport tou lazans konsernen ki pe travay pou lit kont sa sikatris dan nou sosyete. Mersi Mr Speaker.

MR DEPUTY SPEAKER

Mersi Onorab. Donk mon ava demande lekel ki pe segonn Mosyon? Manm Elekte pou Ile Perseverance ?

HON DESHEILA BASTIENNE

Bonn apre midi Mr Speaker. Mersi Mr Speaker. Mosyon i ganny segonde.

MR DEPUTY SPEAKER

Mersi Onorab Bastienne. Donk, apre mon ava envit Loter Mosyon Onorab Bijoux, pou prezant ou Mosyon.

HON GERARD BIJOUX

Ankor enn fwa mersi Mr Speaker. I fer mwan en gran plezir pou prezant mon premye Mosyon dan Lasanble.

Mr Speaker, mon'n anmenn sa Mosyon devan Lasanble, apre ki mon ti soke pou antann e menm vwar dan

nouvel lo *SBC* statistik lo bann labi zanfan pou sa dernyen lannen.

Sa ti pandan Lazournen bann Travayer Sosyal. Labi zanfan pe kontinyelman ogmante ler ou konpar pou sa de dernyen lannen.

Dapre rapor Servis Sosyal, pou lannen 2024 ti annan 413 nouvo ka ki ti ganny raporte, ladan Mr Speaker, 145 ti labi fizik e 137 ti labi seksyel.

Si nou konpran sa avek 2023 kot ti annan 138 labi fizik e 119 labi seksyel, nou vwar ki'n annan logmantasyon 7 ka pou labi fizik e 18 ka pou labi seksyel.

Mr Speaker, parey mon'n dir, sa bann sif i soka. Pou sa kantite lenformasyon, ledikasyon ki nou gannnen, mon demande si sa i vreman sa ki nou bezwen dan nou sosyete?

Pour mwan e mon asire pou lezot Manm, nou konsider sa koman bann aksyon imoral e degoutan. Sa bann pov zanfan pa merit sa bann atosite.

Mr Speaker, mon le osi koz osi lo devwar e responsabilite paran, ou byen bann gardyen sa bann zanfan, pran zot responsabilite pou zot konnen kote ki zot met zot zanfan.

Parler ou tande ki en zanfan in ganny abize ler sa

zanfan in al kot en manm fanmir pros, oubyen kot zanmi sa paran, ou menm kot zot paren oubyen marenn.

Ou zanfan nepli an sekirite, menm kot fanmir oubyen zanmi, e mon kapab al pli lwen pou dir ki menm kot ou lakour ou zanfan pa an sekirite.

Alors bann paran vin pli atantif avek ou zanfan, get byen si napa okenn siny labi, e pa reste silans. Konnen a sak moman kote ou zanfan i ete, e ki i pe fer.

Pou mwan i regretan parfwa ou vwar zanfan fiy e garson pe marse lo semen apre lekòl menm apre soley kouse, dan zot liniform lekòl. Mon parfwa demann mon lekor, eski paran i konnen kot zot ete, e ki zot pe fer?

Mr Speaker, pou sa bann abizer ki laplipar letan i bann zonm mon annan sa pou dir zot,

Silvouple asize e fer en refleksyon lo zot konportman. En zonm i sipoze sa enn ki'n ganny met lo later pou protez bann ki vilnerab e inosan, e sa se bann zanfan.

Me ou vwar ki zot menm zot ki abiz bann zanfan. Bann psikolog i souvan dir ki bann dimoun ki abizer zot osi dan zot lavi ler zot ti pe grandi zot in deza ganny abize.

Me si nou mazin koumsa sa sityasyon pou vin koman en

serk visye, ozordi ou en viktim demen ou en abizer.

E mwan, mon pa krwar ki sa i en maladi. Mon krwar pa si sa i en maladi eskize. Me si i en maladi mon konsey zot pou rod led pou sa kalite dezir ki zot annan. Pou mwan i fer mwan onte ler mon get sa bann atrosite.

Mr Speaker, koman en zonm ki pe touzour rod byennet en zanfan mon le pran sa loportinite pou demann bann paran pou pran sa sityasyon o serye.

Si ou enn sa bann abizer get en kou ou menm, fer en analiz profon e rod led pou ki ou sanz ou leker. Mr Speaker, mon pa pe dir ki zis bann zonm ki abiz nou bann zanfan, i annan osi bann madanm, bann manman ki pran plezir abiz lezot.

Parfwa sa i vin koman labi fizik osi seksyèl. Sa bann viktim i pa zis fiy, me osi bann garson e zot souvan reste an silans.

Alors Mr Speaker, bann zanfan ki ganny abize zot bezwen bokou led. Bann travayer sosyal Servis Sosyal osi ki bann lezot lazans pe fer tou zot mye avek sa konpetans ki zot annan pou donn meyer servis sa bann zanfan.

Mon felisit zot pou sa. Mon konnen i pa fasil pou zot. Souvandfwa piblik i kritik zot. Me sa piblik pa konnen ki

kantite zot mete pou kapab ganny en solisyon.

Wi, i fermal ler sosyal i antre e tir sa zanfan dan sa move lanvironnman dan lakour. I fermal ler en manman i vwar son zanfan ki ankò pti pti pe al dan en fwaye. Me ankò i vin avek responsabilite.

Mr Speaker, nou annan bokou Lalwa tel ki *Children's Act* ki la pou protez nou bann zanfan. Petet i mank en pe son lenplimantasyon pou ki sa i a ede protez nou bann zanfan.

E Mr Speaker, tou dernyerman Servis Sosyal pe travay lo en regilasyon lo zanfan ki apel *Working with Children - suitability check*, zot pe fer bokou *meeting* avek bann group ki travay avek zanfan pou eksplik son konteni.

Mr Speaker, en *suitability check* i en prosesis ki ganny servi pou fer en regar profon lo endividi ou menm lorganizasyon ki travay avek zanfan. Sa se par en *background check* lo tou bann dokiman ki endividi i soumet ler i oule travay ek zanfan.

Lekel ki konsènen avek *suitability check* parey mon'n dir, se bann dimoun ki travay ou ki anvi travay ek zanfan swa an plen tan oubyen koman volonter dan bann lorganizasyon; tel ki Lenstitisyon Edikasyonnel,

bann endividi ki travay dan *Child Care* - bann *child care providers*, menm bann travayer sosyal ek bann asistan, bann profesyonnel lasante ki travay ek zanfán, bann lorganizasyon relizye, klib ek lasosyasyon sportif tel ki bann *coach* ki travay ek zanfán. E sa i a ede pou donn zot en ledikasyon ki mannyer zot pou tret sa bann zanfán e pou vwar si i annan en merit pou sa bann tel endividi travay ek zanfán.

Sa Mr Speaker, i montre nou ki servis sosyal ek bann lezot lazans, pe al pli lwen pou protez nou bann zanfán.

Alors Mr Speaker, si nou vremen kontan nou zanfán pa bezwen kasyet sa bann aksyon malapropo lo nou zanfán, vin devan e denons sa bann abizer.

Mon konnen ki mon bann koleg Onorab, pou annan bokou pou azoute lo sa size, alors mon demann zot tou pou siport sa Mosyon pou montre ki nou osi nou vremen konsernen lo ka labi nou bann zanfán. Mon remersye ou Mr Speaker.

(APPLAUSE)

MR DEPUTY SPEAKER

Mersi Onorab Bijoux. Donk, aprezan lasal, Lasanble plito i ouver pou bann entervansyon an faver, ou kont sa Mosyon.

Premye entervenan ki'n endike i le koze se Onorab Arissol.

HON PHILIP ARISSOL

Mersi Mr Speaker. Bonn apre midi Mr Speaker, bonn apre midi tou koleg Onorab, e tou bann dimoun ki pe swiv nou espesyalman bann zabitan Anse Boileau.

Nou zwenn dan sa Lasanble ozordi non pa zis koman reprezantan nou nasyon, me koman gardyen nou bann ki pli vilnerab, koman bann paran.

Lavenir Sesel i depan lo nou zanfán e sa i nou responsabilite e sa i vremen enorm Mr Speaker.

Mr Speaker, mon leker i lour, mon leker i brize. Mon ranpli avek latristes e lakoler ler mon vwar nou bezwen adres sa fleo ki pe briz lavenir nou zanfán.

Ki touf lespwar ki detri lavenir sa bann pli pti inosan. Labi zanfán pa zis statistik lo papye i en soufrans ki nou pa kapab inyore. Nou pa kapab reste silans ler nou zanfán pe viv dan lafreyer. Ler zot linosans pe ganny vyole. Ler zot desten ki merit ranpli avek larm lazwa i ganny ranplase par larm douler.

Se nou responsabilite, nou devwar, nou devwar moral pou protez zot. Annou lev nou lavwa kont sa bann aksyon

malapropo ki pe detri nou sosyete.

Nou pa kapab zis koz lo fleo nou bezwen azir, azir avek determinasyon. Azir avek konpasyon. Azir avek lanmour en lanmour san kondisyon pou bann ki pli vilnerab. Nou bezwen montre ki nou sosyete pa aksepte sa bann tel aksyon.

Ki nou refiz toler lenzistis ki pe priv nou zanfann en lavenir ki zot merite. Nou pa kapab les lafreier ranplas la transparans ni abandonn zot dan fernwar. Se ler nou pou nou debout ansanm pou defann nou bann zanfann.

Mr Speaker, par la i annan en pti garson ki tousel dan son lasanm leker pe bat vit ranpli avek lafreier e pe sey konpran aköz demen i telman tro fernwar.

I annan en pti fiy ki pe kriye dan kwen son lasanm pe esey konpran aköz, aköz sa ki i sipoze son protekter in trai li.

Mr Speaker, nou pa kapab aksepte sa, nou pa kapab reste trankil letan ki linosans nou bann zanfann pe ganny vyole. Nou pa kapab senpleman eksprim sagrinasyon, nou bezwen bouze nou bezwen lager, nou bezwen anmenn solisyon.

Mr Speaker, nou Lalwa i bezwen ranforsi. Nou bann Lenstitisyon lapolis, tribinal, servis sipor i bezwen vin pli for, pli pros, pli rezistan. Sak

agreser i merit ganny atrape e pini severman Mr Speaker, mon dir severman.

Sa viktim i merit ganny ekoute, rekonforte, geri. Sak zanfann i merit en lanfans ranpli avek sekirite non pa lafreier. Nou bezwen rapel ki lavenir Sesel i reste dan lanmen nou bann zanfann.

Se nou si nou pa protez zot ozordi nou pe *fail* zot demen. Nou pa kapab sanzme nou kapab sanze. Nou kapab met en lafors ki ralye tou dimoun ki batir en miray kont sa fleo.

Anmezir ki nou leve pou defann zot, nou bezwen osi ofer bann viktim lespwar. Sa ki'n soufer i merit konpreansyon, gerizon e en nouvo sans pou re ganny konfyans dan lavi.

Nou tou nou kapab vin sa lalimyer ki gid zot ver en lavenir ki pli prometan. Nou bezwen ranforsi Lalwa wi, me nou osi bezwen ranforsi nou lespwar.

Konnesans i kapab sov lavi nou bezwen ed bann paran, ansenyan, ek bann gardyen pou rekonnet siny labi. E pran aksyon deswit. Nou bezwen ansenny nou bann zanfann ki zot lavwa i annan valer, ki okenn dimoun napa drwa pou pran zot linosans. Si zanmen zot santi zot pa an sekirite zot kapab koze, e nou pou ekout zot.

Pa krwar ki sa problemn i pou zis en pti group Mr Speaker, non. Nou tou nou annan en rol. Koman paran, ansenyan, politisyen, aktivis, sitwayen. nou bezwen debout ansanm, nou bezwen lager. Nou bezwen montre nou lanmour pou sak zanfann ki pe soufer an silans.

Labi zanfann i detri nou fitir. I fragmant nou bann fitir *leader*. I vol konfyans lanfans bann ki merit reve. Si nou pa debout ozordi nou pou an defo. Si nou pa fer sa ki nou merit-nou devret fer nou pou *fail* zot, nou pou *fail* nou bann zanfann Mr Speaker.

Sa pa merit reste zis en diskour. Sa i merit vin en revolisyon. Sa dimoun ki pe ekout mwan ki pe ekout mon lavwa ozordi, mon demann ou trwa kestyon.

Eski ou pare pou fer en diferans? Eski ou pou debout pou defann en zanfann? Eski ou pou pran aksyon pa demen, me ozordi?

Mr Speaker, nou pa pou toler plis souffrans. Nou pa pou les sa fleo kontinyen detri lavi nou bann zanfann. Nou pou lager pou zot. Nou pou protez nou bann zanfann nou pou anmenn lespwar.

Mon pou aport mon sipor pou sa Mosyon anmenn par Onorab Bijoux. Mon a dir ou mersi Mr Speaker.

(APPLAUSE)

MR DEPUTY SPEAKER

Mersi Onorab Arissol. Nou kontinyen avek lalis bann entervenann ki'n endike zot le koze, mon ava donn laparol Onorab Sultan.

HON VALDANA SULTAN

Mersi Mr Speaker. Bonn apre midi Mr Speaker, e tou dimoun a lekout. Mr Speaker, mwan koman en manman, en fanm, e en ansenyan par profesyon zanfann i annan en plas spesyal kot mon leker.

Mr Speaker, parey Loter Mosyon in prezant nou ozordi, mon osi mon eksprim mwan lakoler vizavi logmantasyon dan labi zanfann ki pe ogmante dan nou pei.

Mon zwenn avek mon koleg Onorab Bijoux, pou demann bann agrese pou reviz zot konportman. Mwan osi mon senpatiz avek tou bann viktim, e an menm tan mon aport mon sipor pou tou bann lazans konsernen ki pe travay pou lit kont sa sikatris dan nou sosyete.

Mr Speaker, sa Mosyon ki la devan nou ozordi i enn ki sagrinan i troublan e menm anbarasan e i en realite ki alarman. Sa logmantasyon dan ka labi i pa zis en statistik, me i en kriz ki demann en latansyon imedyat.

Pour mwan labi zanfan nenport ki form ki ete, ki swa i fizik, i seksyel, psikososyal ou menm emosyonnel, i devret ganny pran o serye, e nou tou koman bann endividi dan nou pei nou devret pe kolektivman kondann bann tel aksyon. Akoz i pa bann aksyon ki son lenpak i dir pou en pti moman, me i en lenpak negativ pou bokou lannen dan lavi en endividi.

Mr Speaker, labi zanfan i al pli lwen ki sa. I al pli lwen ki detrwa parol blesan, mark ou grif, lezo kase oubyen virzinite ki'n ganny pran san konsantman.

I anglouti memwar e detri linosans en zanfan. I souvandfwa afekte son fitir e parey nou dir i kit en sikatris dan lavi sa zanfan.

Bokou fwa nou tann dir ki bann ki ganny abize i osi i osi vin en abizer. Alor mon krwar ki se pou sa rezon ki nou bezwen kontinyelman edik nou pep lo sa size, pou nou elimin en tel kalite aksyon.

Mon pa pou dir ki napa nanryen ki'n ganny fer lo sa size, me se nou bann adilt ki devret et—pli responsab e onnet. Bokou fwa sa bann abizer i bann adilt ki la pros avek bann zanfan.

Adilt ki sa zanfan i met konfyans ladan koman sa enn

ki pou gid li, ankouraz li, siport li, e protez li.

Kan nou abiz zanfan, nou vyol sa konfyans ki zot in met dan nou. Bann adilt ki la deor ki responsab pou bann tel aksyon sagrinan. Sa bann *act* troublan, ki swa ou'n fer fas avek Lalwa oubyen ou bann vilen aksyon pa ankor ganny dekouver mon pe adres ou ozordi.

Mon pe dir avek ou re konsider ou aksyon. Rod led si ou santi ou atrakte avek zanfan konsider li koman en keksoz abnormal. Avan ou komet en tel aksyon, mazine ki annan zanfan dan ou fanmir, menm si ou, ou pa en paran personnelman.

Bann abizer mon pe koz avek zot ki kalite lemonn ou anvi kree? Ki leritaz ou pe kit deryer ler ou pe kontribye pou kit zis bann leko soufrans e tourmante?

Mon anvi dir avek ou napa en sosyete ki fleri kan son zanfan tre inosan pe viv dan lafreder ler bann lanmen ki sipoze pe protez li pe detri li.

Mr Speaker, mon pou dir napa zistifikasyon pou bann tel aksyon. Letan pou zistifikasyon leskiz e silans in fini. Mon pe demann bann agrese ou bann abizer, kalkil byen lo zot aksyon, aköz sak swa ki zot fer i anmenn en lenpak negativ pa zis lo sa zanfan, me lo son manm

fanmir, lakominote kot i viv, son kanmarad lekol e finalman nou lasosyete.

Mr Speaker, pou konklir, mon anvi ankor enn fwa adres tou adilt sirtou bann agreser, sanzman dan ou latitud i posib, redanmsyon i posib, nou annan zis pou realize ki bann tel aksyon pa toultan annan reparasyon.

Ankor enn fwa mon dir ou rod led, e aksepte led pou reabilitasyon dan ou aksyon. Petet parfwa ou pa realize ou mal ziska ler en lot i dir ou.

Sanzman dan ou latitud pa depan ni lo en Gouvernman, ni lo en lorganizasyon, me lo ou aksyon. Mon enplor ou pou sanze. Viv dan respe pou lezot. I devwar nou tou koman adilt pou debout koze e defann nou bann zanfan.

Kre en lemonn kot nou zanfan i santi zot touzour an sekirite otour nenport ki ; enn kot zot a santi zot lib kot zot viv san okenn danze. Avek sa Mr Speaker, mon aport tou mon sipor pou sa Mosyon, mersi.

MR DEPUTY SPEAKER

Mersi Onorab Sultan. Prosen enterven an lo lalis Onorab Labrosse.

HON RICHARD LABROSSE

Mersi Mr Speaker. Mon a dir bonn apre midi tou dimoun ki

a lekout, tou mon bann koleg espesyalman zabitan Plaisance ki pe ekoute.

Mr Speaker, ozordi devan nou, nou annan en Mosyon ki pa parey tou Mosyon Mr Speaker, ki vin devan sa Lasanble.

Me sa enn sa Mosyon ki devan nou ozordi Mr Speaker, i pe fer referans avek logmantasyon dan ka labi zanfan. Menm mon rapel dan Lasanble isi sa kekyon ti ganny demande e bann lenformasyon ki nou ti gannyen byensir ti sok nou tou.

Mr Speaker, parey mon'n dir, en size parey dan nou ka la fanmir tradisyonnèl Seselwa i bann size parfwa ki pa gou koz lo la ouswa nou pa koz lo la ditou.

Labi kont zanfan sirtou bann zanfan ki zot ganny konsidere koman bann dimoun pli vilnerab dan sosyete. Dan mon distrik Mr Speaker, mon'n touzour fer li mon devwar pou mon zwenn avek mon travayer sosyal, ansanm avek mon zofisye *welfare*, kot byensir, tou le semenn nou annan nou en pti rankont ki nou fer kot nou diskite en pe lo la realite sosyal dan mon distrik.

Me osi nou pa zis asize diskite Mr Speaker, nou osi parfwa fer bann vizit ki *social worker* li menm i demann

mwan mon lasistans pou nou antre kot serten lakour ansanm parey mon pe dir ou.

I annan bann diferan form parfwa bann konplent ki vini ki ou bezwen reakte lo la Mr Speaker, me sa ki reste for dan tousala Mr Speaker, nou touzour fer sir ki tou bann ka ki nou vwar tou bann *case* ki nou ganny sans vizite ansanm.

Ouswa ki nou diskrit lo la, nou touzour vwar bann solisyon. Me parfwa i annan bann solisyon ki vreman *long term* parey nou dir pou arive.

I pa sitan parfwa bann solisyon ki distrik oubyen travayer sosyal, me osi parfwa bann zefor pou ou sov sa zanfan kot sa fwaye kot i ete kot i santi li pe ganny abize.

Labi zanfan laplipar letan parey mon'n dir Mr Speaker, i ariv dan bann landrwa sirtou dan lakour parey nou dir, kot sa zanfan i sipoze pe ganny proteze lanmenm ler swa ler i ariv dan lakour parfwa ki keksoz nou ganny dir i touf lanmenm.

I annan lenstans ki annan bann dimoun ki pli pa kontan ki pli ankoler, zot pou avans devan pou raport ouswa menm pran aksyon lo la.

Me nou tou nou konnen i annan bann deka kot nou ganny dir nou pa pou koz lo la, swa i anbarasan, swa parfwa sa agreser li menm i sa

dimoun li ki kontribye kot lakour.

Ouswa parey nou dir li ki annan kontrol kot parfwa sa zanfan i reste viktim, kot keksoz pa ganny bouz devan.

Me mwan Mr Speaker, san pou al dan bann gran gran laliny-parey tou bann koze in fini ganny dir mwan mon ti a kontan ozordi dir en keksoz koman en dirizan kominote Mr Speaker.

Bann abizer parey dan Mosyon in dir - bann agreser zot bezwen revwar zot konportman. Ki mannyer zot pou revwar zot konportman Mr Speaker?

Ozordi dan pei Sesel, i annan diferan kalite landrwa ozordi not nou kapab ale pou ganny diferan kad, ouswa diferan fason kot nou kapab ganny sipor lo diferan problem pou keksoz ki nou fer fas avek.

Swa i annan bann problem parfwa ki ou pa santi ou pou koz lo en lot nivo, me osi ozordi nou annan osi bann sant kot nou apel bann sant prive, kot la ou a pey ou pti larzan, tousala i form parti bann sesyon mon krwar ki nou merit ankouraz bann dimoun osi parfwa pou fer en pti vizit laba.

Mr Speaker, mon le osi eksprim mon sipor ek bann profesyonnel - bann travayer sosyal, bann zofisye *child*

protection, bann ansenyan dan bann lenstitisyon ki pa zanmen vwar fer li drol sansibilite ki nou bezwen annan pou nou rekonnet en zanfan ki pe soufer, e ki pe tous sa lavi avek lespwar.

Mr Speaker, nou devret pa zis soke, nou devret enn fwa pour tou bouz pou met plis resours. Ler nou pe dir plis resours la nou pe koz lo si pou revwar en pe resours ki nou bann travayer sosyal i gannyen.

La mon pe koz par leksperyans parey mon'n dir zot ki bann vizit ki mon ale avek li mon, mon vwar kekfwa li pa fer mon konnen.

Me mon santi kekfwa i merit annan en pti pe plis lo sa laliny pou sa bann travayer sosyal pou *deal* ek sa bann *case* ki nou pe *deal* avek ozordi.

Kekfwa bokou dimoun i viz labi zanfan zis ver labi seksyel, me labi zanfan i vin plis ki sa dan sa lemonn ozordi.

E la osi Mr Speaker, nou bezwen vwar osi nou sistenm Zidisyer pou fer li pli efikas kot la i a kapab vin sa sef gard kot i kapab protez sa zanfan kont labi zanfan.

Pou ki bann ki fer sa bann krim osi zot a kapab rann kont. Mr Speaker, zanfan Plaisance zanfan Sesel zot pa'n fer okenn fot, e zot merit

viv lib ek respe ek proteksyon ek lanmour. Mr Speaker, avek sa mon a dir ou mersi pou donn mon laparol.

MR DEPUTY SPEAKER

Mersi Onorab Labrosse. Mon pou donn laparol Onorab Vidot.

HON AUDREY VIDOT

Mersi Mr Speaker. Bonn apre midi Mr Speaker, tou Manm Onorab. En bonn apre midi spesyal pou zabitan Roche Caiman.

Mr Speaker, Mosyon ki devan nou Lasanble ozordi apre midi anmennen par Onorab Gerard Bijoux, mon kapab dir koman en manman, koman en dirizan, koman en madanm i annan son merit.

I annan son merit, me mon bezwen met petet avek loter Mosyon si i kapab posibilite revwar en pti *wording* dan son Mosyon apre ki mon'n ekout serten entervenman koze apre ki loter Mosyon in prezant son Mosyon.

I realis e vwar poudir sa konsern i en konsern tre serye, i en konsern ki tous bokou bokou nou sitwayen, e byensir letan Loter Mosyon i dir ki sa Lasanble i osi senpatiz avek tou bann viktim e siport bann lazans ki pe fer tou dan en fason ou en lot pou zot kapab lit kont sa sikatris ki byensir i

afekte bokou nou sitwayen Seselwa.

Me par kont lo komansman *wording* letan loter Mosyon i demande pou bann agreser pou reviz zot konportman petet mon ava sizere olye dir reviz nou dir arete.

Arete ek sa kalite konportman. I bezwen en mesaz for en mesaz kler ki pep Seselwa, espesyalman nou bann dirizan nou kont kot nou bann zanfan i ganny abize.

Mr Speaker, Lartik nou Konstitisyon ki koz lo nou bann drwa fondamantal mon pou tous lo Lartik 31.

“Leta i rekonnet drwa bann zanfan ek bann drwa bann zenn dimoun pou ganny proteksyon spesyal miner, aköz zot i matirite ek vilnerabilite, e pou asir legzersis efektiv sa drwa, Leta i angaze pou... “e la parti sa bout dan Konstitisyon mon pe koz sa laspe ‘c’ladan, kot i dir,

“pou asir proteksyon kont leksplwatasyon sosyal e, ekonomik danze fizik e moral ki zanfan ouswa bann zenn dimoun i ganny ekspoze avek.”

Mr Speaker, nou bann zanfan pou bann ki kapab koze, pou bann ki kapab vin devan avek son en pros, kot i kapab konfyè avek pou dir i pe ganny abize i annan en sans kot ou kapab dan en fason, ou

en lot sov sa zanfan pou li anpes li ganny plis abize.

Me an menm tan osi kapab pran aksyon nesaser avek son abizer. Me letan en baba ki li i pa kapab koze i napa fason pou eksprim son lekor pou montre pou dir i pe ganny abize.

E la i vin lo responsabilite sa paran ki'n donn nesans sa zanfan, ki'n anmenn sa zanfan o monn. Nou konnen wi, parfwa i en manm pros ki abiz sa zanfan.

Me paran i annan en gran responsabilite pou nou komans tre boner pou annan sa vizilans, e fer tou posib pou protez nou zanfan.

Asire ki landrwa kot nou met zot zanfan i en landrwa ki ou konnen pou dir ou'n fer byen ou resers, ou letan lespri i anpe pou ou kapab kit ou zanfan dan sa landrwa.

Me parey mon dir i arive parfwa ki menm si i annan paran i sey tou avek bonn fwa pou met son zanfan dan en bon landrwa, pa toultan ki i vwar li dan en sirkonstans kot son zanfan i ganny 100 poursan byen proteze.

Me i responsabilite paran pou egzamin byen zot zanfan, pou asire ki zot zanfan nenport ki fason zot kapab vwar fizikman e byensir ek konportman zot zanfan si i annan en ka labi. E zot bezwen vin devan ; vin devan pou rod

led nesaser pou kapab kontinyelman protez zot zanfàn. I pa fasil pou bokou paran ki ozordi ek kondisyon lavi i vwar zot parfwa pe fer de louveraz pou sipòrt zot fanmir.

Me *at risk* parfwa pou met zot zanfàn en serten landrwa ki pa nesaserman 100poursan, dan en landrwa ki sekirite ki son zanfàn i byen ganny okipe.

So, mon santi ki i pa nesaserman zis osi lo paran. Me i annan en kantite laspe osi ki nou bezwen vwar ki mannyer nou kapab donn serten soutyen e sipòr paran pou ki dan sa prose ki zot osi zot pe leve debourye pou kapab sonny zot fanmir, me zot pa pe gard zot zanfàn *at risk* kot landrwa kot petet pou zot met zot zanfàn zot zanfàn i fasil pou zot kapab ganny vin viktim avek bann abizer.

Bann abizer, mesaz i kler e for. Bann Manm ki bann entervenàn ki'n koze avan mwan in fer resorti ki zot bezwen arete.

Mwan mon dir arete me pa revize arete, enn fwa pour tou si zot konnen zot annan en problem mantal zot annan kek problem ki petet zot in pas dan serten sirkonstans lavi ki zot santi zot bezwen led, rod sa led nesaser pou ed zot kapab redres zot lavi.

Pou zot kapab aranz zot konpòrtman e arete sa pratik

pou zot servi zot lotorite, zot pouver koman bann ki pli dominant, pli aze pou zot tous ban ki pli vilnerab dan bann ka kot nou pe koz lo nou bann zanfàn.

Mon pou osi koz lo sipòr ki bann ki swa abizer, bann viktim bann viktim ki zot bezwen bokou, bokou, bokou sipòr moral, e menm manm fanmir pou zot kapab re entegre zot dan sosyete.

Pou konnen pou dir lavi pa fini la. I annan sans loportinite pou zot kapab viv en pli meyer lavi e fer fas avek bann tel sikatris.

Menm si i en parkour, me pou zot kapab bouz de lavan e pa vwar zot reste viktim, me plito vin bann dimoun ki pli for entegre zot ki ler an grandi san sa bann viktim pa vwar zot pe viv prezan pou vin parey bann abizer parey zot, zot in vwar zot swivan viktim ki zot krwar pou dir sa i en bon pratik.

En pwen enpòrtan ki mon koman en paran mon pou partaz avek bokou paran la deor, pe enpòrt ki ou nivo standar lavi, i nou responsabilite pou nou edik nou zanfàn ki mannyer pou protez son lekor.

Ki mannyer pou vin devan, e vin pros avek en manm fanmir pou kapab dan nenpòrt ki evantyalite ki zot annan en keksoz ki pa normal,

zot vwar i pa normal, i pa byen.

Ki swa zot pe ganny touse zot parti lekor fizik, ki swa zot pe verbalman ganny kritike e ki nou dir dan en sans *bullying* dan en fason emosyonnelman pou ki zot vin devan zot koze.

Zot koze, zot rod led nesese pou ki sa ki pe fer bann tel aksyon avek zot i arete. Parfwa si nou, nou pa nou tant pou krwar poudir nou zanfàn i tro pti pou nou servi serten konversasyon avek zot, annou mazin tre byen pou dir nou bann zanfàn fiy koman garson ozordi dan staz primer i devlop tre vitman.

E i enportan ki nou koman bann adilt, koman bann paran responsab nou komans byen entegre nou zanfàn lo parey mon'n dir lo zot parti lekor, lo respektè pa zis zot parti lekor personnel, me osi pou zot kanmarad.

Pou anpese osi ki nou koz parfwa bokou lo adilt i abiz bann zanfàn, me nou annan zanfàn ki abiz zanfàn san realize pou dir zot osi, zot pe vin bann agrese e zot pe enpoz en lot presyon lo sa ki pli pti.

E napa fason ki nou bezwen ansanm koman en pep vwar ki mannyer nou kapab met lespri ansanm, pou nou

adres sa size vyolans e osi labi ki tous nou bann zanfàn.

Ozordi nou pe koz spesifikman dapre Mosyon ki loter—Mosyon in anmennen i tous konsantre lo zanfàn, me nou konnen pou dir labi i pa swazir laz.

I arive avek nou zanfàn enkli adilt, me toudmenm ankor parey mon dir i nou devwar i nou responsabilite pou nou donn sa koman bann dirizan donn bann bon legzanp e osi met an pratik sa ki nou prese.

E donn bann legzanp e osi koz avek bann dimoun partou dan nou kominote, oubyen dan bann diferan groupman ki nou rankontre pou pas sa mesaz.

Akoz si nou, nou pa kapab protez nou zenn zenerasyon lekel ki pou fer li? I nou responsabilite pou nou kapab diriz popilasyon, diriz nou bann zenes lo lenportans pou lo bann bon valè pou asire ki bann nou bann valè i ganny byen byen enplimante, byen ankadre, a en tre zenn az ; ki nou bann zanfàn i kapab protez e defann zot lekor, sa size ki devan nou Lasanble ozordi i en size ki mon konnen nou en kantite Manm nou kapab koz lo la pou al o profon.

Akoz i enportan ki nou anmenn sa lalit, pou donn enn fwa pour tou anpese labi lo

zanfan ou menm lo adilt i ganny ogmante.

Nou lager plis posib pou fer sir ki nou kontribye pou ede fer redwi, me sa redwi nou bezwen met presyon pou ki arete.

E nou bann diferan lenstitisyon ki la i bezwen pe kontinyelman ganny resours nesese pou nou kapab met an pratik laplikasyon pou adres bann ka kot bann viktim i la ozordi pe ganny afekte.

E i annan ki ankor pe soufer an silans, me pou zot konnen pou dir nou Lalwa i morde, i permet pou kapab adrese.

Mon konnen *Cabinet* Minis in resevwar en Lalwa resan lo size kot i konsern labi zanafan, mon pa konnen pou ki rezon ki ziska la i pa ankor vin devan nou Lasanble Nasyonal. Ki i ti ava en sans ankor pou nou vwar koman bann *leaders* e Seselwa i a vwar pou dir vreman nou bann *leaders* nou proaktiv, nou serye lo kwa ki nou pe koz lo la.

Me nou konnen pou dir Mosyon pa *binding*, me sa Lalwa i ti pou fer bokou sans pou nou konnen ki travay ki bann Lotorite Konsernen in fer.

E kwa ki zot pe demann nou pou nou kapab aprouve pou permet zot kapab delivre dan zot manda ki zot annan, pou zot kapab met an

aplikasyon pou adres bann ka labi bann abizer.

Me an menm tan osi pou protez e donn sipor nesese pou bann viktim, ki swa zot bann zanafan, adilt me osi byen bann fanmir ki pe pas dan bann tel sityasyon difisil.

Pou mwan i pa akseptab ki i pe tro trennen sa kantite letan. Menm mon'n demann PS William resaman - Melanie, plito *sorry* eskize, lo sa size.

E in fer mwan konpran ki zot pa ankor - Gouvernman pa ankor pare pou vin devan avek i pe pran le- i pou annan en pe letan ankor.

Me nou kestonnen aköz rezon pe tarde, si sa nou vwar koman en Lasanble ozordi pe koz lo en Mosyon i annan son lenportans, sa Lalwa in fini vin devan *Cabinet* pou diskrit lo la, nou koman bann dirizan e mwan koman enn bann dirizan ki konsernen konsernan sa size, mon pe demande oli? Oli sa Lalwa? Aköz ki pa ankor ariv devan nou Lasanble? Aköz ki i pe tarde?

Nou annan en travay devan nou ziska avan ler Lasanble i ava i al *recess*, e nou konnen apre *recess* i pou eleksyon. E i pou annan en lot manda, en lot *cohort* Lasanble ki pou vini. Me omwen nou koman bann dirizan ki la ozordi nou a fer nou devwar pou ki bann viktim i ava vwar

pou dir vreman sa 7enm Lasanble in fer en keksoz ki dan zot... pe montre pe donn zot sa sipor, sa soutyen dan sa bann moman.

So, san tarde pou les lezot Manm ganny en loportinite pou vwar sa, ankor enn fwa mon soumet avek loter Mosyon pou reviz sa mo kot in dir,

“Sa Lasanble i eksprim sok avek lakoler vizavi logmantasyon dan labi zanfani ki pe ogmante dan Sesel e pe demann bann agrese pou reviz zot konportman.”

E mon, mon pe demande ki loter i dir agrese “pou arete, arete ek sa kalite konportman.” Mersi Mr Speaker.

(APPLAUSE)

MR DEPUTY SPEAKER

Mersi Onorab Vidot. I annanmon a donn letan ou fer ou *right of reply* ou ava *take up* sa Onorab Bijoux. Prosenman lo lalis Onorab Porice.

HON DOYACE PORICE

Mersi Mr Speaker. Bonn apre midi a tous. Mr Speaker, sa Mosyon anmennen par Onorab Bijoux, i en Mosyon ki konsern nou tou ki dan Lasanble, Egzekitiv ki an deor kot bann paran e piblik an zeneral.

Mon pou sipor sa Mosyon aköz mon distrik Baie Ste Anne, pa’n ganny eparnye. I tous mon leker bokou ler nou koz zanfani.

Vi ki mon’n deza anmennen en Mosyon kot i konsern bann zanfani anba laz ki reste dan semen apre ler sirtou tar apre 6 er, sa i ede pou annan bokou labi lo nou bann zanfani, e kot serten nou paran napa kontrol lo zot zanfani. Sirtou bann paran ki pe travay ziska tar dan lannwit, oubyen menm retourn lannmen.

Mon komans koumsa aköz labi zanfani i partou, e dan toudsort fason. Mr Speaker, nou annan zanfani ki ganny abize par serten paran tel ki boper, belmer oubyen lezot endividi.

Seksyelman, bate, pinisyon ki pa apropiye ki kot lakour, oubyen dan semen. I menm annan serten ki servi zot lotorite zis aköz zot larzan oubyen personnel.

E parey nou konnen ki i annan zanfani konmela ki vreman kontan sa bann tel keksoz parey, san zot realize ki zot pe abes zot lavenir demen.

Mr Speaker, nou osi annan serten paran ki dan plas asize koz avek zot zanfani zot plito atrape bate sanses apre ki zot in fer en pti fot, san realize ki dialog i pli enportan ki bate oubyen zoure. Tousala

i en bann labi ki nou pe vwar ozordi e plizyer lannen pase.

Akoz sa bann zanfan osi i fer serten labi lo lezot pti kanmarad, san realize ki i pou vin en problem a lavenir.

Mr Speaker, sa osi i vin en labi kot bann paran e zanfan i ganny dir dan dernyen moman pou sorti dan en lakaz ki zot pe lwe avek en lorganizasyon.

Zis aköz politik, sirtou ler zot partisip dan aktivite ki pa an faver sa lorganizasyon la kot sa zanfan i dan problem lozman e pa konnen kot pou ale. E abizer i antre. Mon debout ozordi avek en leker lour, me osi avek determinasyon pou siport sa Mosyon ki pe denons avek sok ek lakoler logmantasyon dan ka labi zanfan dan nou pei.

Mr Speaker, sa Lasanble pe anvoy en mesaz kler ozordi, bann ki pe fer bann tel aksyon, zot bezwen komans pran zot responsabilite zot konportman i mal.

Zot bezwen arete, zot bezwen reviz lo sa ki zot pe fer ozordi. Nou pa kapab kontinyen dan en sosyete kot lafanmir, lekol, legliz, lari ; lari i troun dan en lasenn kot zanfan pa an sekirite. Labi seksyèl, fizik, mantal tou sa ki tou sa i kit sikatris ki pa neseserman vizib.

Me ki reste en kosmar vivan dan lavi sa zanfan ziska

bokou lannen pli tar. Nou osi pa kapab les okenn silans koupab kontinyen anpes laverite sorti.

Tro bokou fwa bann viktim pe reste trankil aköz laont, aköz lafreyer, aköz zot pa'n vwar personn pou ekout zot.

Se pou sa rezon ki mon osi eksprim mon solidarite ek tou bann viktim. Nou krwar zot nou respe zot nou siport zot nou asire zot ki sa-

Nou asire ki sa Lasanble pe angaz li pou defann zot drwa comma protez zot e pouse pou lazistis.

Mr Speaker, mon krwar nou bezwen fer plis. Wi, plis sipo pou Servis Sosyal, plis formasyon pou bann *teachers*, plis kapasite pou bann *child protection officers* plis vizibilite pou bann fason raporte.

E la mon pou felisit bann travayer sosyal, spesyalman bann ki lo mon zil Praslin pou sa travay nob ki fer ki osi zot pran bann *risk*. Me, nou osi bezwen fer pli profon kiltir, kiltir silans, kiltir otoriter abisif, kiltir fer koumsa i pa nanryen. Sa osi fodre komans sanze dan lakour dan kominote dan legliz dan medya.

An konklizyon, mon siport sa Mosyon i en portre douloure, me nesaser e i en lapel pou aksyon, nou pa devret zis soke nou devret

bouze e kontinyen rod solisyon.

Zanfan Seselwa merit meyer, e zot pou ganny li si nou osi nou fer le meyer e mon pou siport sa Mosyon. Mersi.

MR DEPUTY SPEAKER

Mersi Onorab. Mon pou donn laparol Onorab Roucou.

HON MICHEL ROUCOU

Mersi Mr Speaker. Bonzour. Bonn apre midi annefe, tou dimoun ki pe ekout nou. Mr Speaker, Mosyon anmennen par Onorab Bijoux, ozordi apre midi dan nou Lasanble.

I en Mosyon ki vreman mon kapab dir i sansib li menm li, i vreman emosyonnel e i tous bokou nou bann zanfan la deor.

Mr Speaker, sak fwa ki en zanfan i ganny abize seksyelman oubyen verbalman, savedir i montre pou dir se ki sa kominote kot i pe reste li menm li i *fail* li, sa landrwa dan sa *housing estate* kot i reste i *fail* li e son ou kapab dir son paran li menm li i *fail* li.

Akoz mon dir sa Mr Speaker, ozordi laplipar lakour i annan li en zanfan e ki nou vwar ozordi Mr Speaker? Nou annan bokou bann paran tousel, sa i enkli papa ouswa menm manman.

E mazorite fwa Mr Speaker, nou vwar poudir sa

manman ouswa sa papa li menm li i ganny li en *partner* ki petet i napa nanryen pou fer avek sa zanfan.

Savedir i vin son belmer ouswa son boper. E souvandfwa ki nou vwar Mr Speaker? I arive Sesel kot swa sa dimoun li menm li swa i pa tonm dakor ek sa zanfan pou nenport ki rezon, ouswa li menm li si annan problem swa ek son *partner* aprezan i tant pou vir lo sa zanfan.

E souvandfwa nou vwar pou dir bokou nou, nou tant pou frenm lizye ler nou vwar pou dir en zanfan li menm li i pe ganny abize dan nenport ki fason.

E souvandfwa nou reakte ler keksoz in fini tro tar. Nou'n vwar legzanp i la kot nou'n menm vwar bann ka fatal kot swa sa zanfan i tant pou perdi son lavi.

Mr Speaker, mon napa keksoz ki pli frap mwan ki ler ou tande pou dir en zanfan li menm li in perdi son lavi aköz in pas dan bann serten sirkonstans vyolans.

E sa i fer ou demann ou lekor bokou kestyon li menm li. Kwa ki sa zanfan li menm li ti pe pas ladan, ki aprezan in anpese pou nou bann ki otour li dan son vwazinaz pou nou reakte ?

Kwa aprezan ki nou apre ki sa bann lensidan in arive, kwa ki sa i vedir ki nou, nou

devret fer an plis pou ede ki nou bann zanfan dan nou kominote?

Piti zanfan mon vwazen ki reste o bor mwan oubyen zanfan enn mon fanmir parla pou fer sir ki i pa pe pas dan bann labi parey li menm li.

Espesyalman parey Onorab Vidot, in dir oparavan i annan bokou zanfan la deor ki zot pa pe kapab koze pou zot lekòr e zot pa pe kapab eksprimen egzaktman kwa ki zot, zot pe pas atraver ki aprezan sa demen i pou annan en lenpak.

Mr Speaker, dan aswar ler ou tann dan nouvel poudir en zanfan in ganny abize, koman en paran sa ki frap ou for konmsi.

Prezan sa i fer ou demann ou lekòr li menm li bokou keston, ki zistans nou pou ale avek sa bann keksoz koumsa. Eski ki tan ki lasosyete li menm li i pou kontinyelman soutir bann keksoz koumsa bann *act* parey?

Kwa egzaktman ki nou, nou devret fer pou nou kapab edik bann zanfan ouswa edik bann paran pou fer sir ki zot menm zot ki vin sa defander li menm li?

Sa defander pou zot zanfan, pou zot fanmir, e osi sa defander pou sa zanfan dan nou kominote li menm li Mr Speaker.

Ozordi Mr Speaker, i annan serten ka kot bann paran li menm li i pe vann son zanfan swa pou larzan swa pou drog. E kwa ki kapab ganny fer ki sa bann keksoz i kapab ganny *deal* avek?

E souvandfwa ki nou vwar Mr Speaker? Plasman bann zanfan sa i en keksoz ki mon konnen pou dir Gouvernman pe fer en ta, zot pe rod en mannyer pou zot kapab adres sa size.

Be selman mon krwar pou dir nou devret fer li en pti git posib akòz sa pou ede demen i ava ed sa zofisye sosyal li menm li, pou kapab pran serten desizyon.

Akòz ki nou vwar, ozordi ou tir sa zanfan ou deplas li dan en landrwa i annan bokou bann *care taker* ki vreman pe fer louvraz formidab Mr Speaker, vreman formidab.

Mon pa dir pou dir tou, me selman petet sa lanvironnman kot sa zanfan i reste li menm li, ouswa kot i ganny plase.

E mwan mon panse pou dir se ki nou menm nou bann adilt, bann paran, bann defander pou sa bann zanfan ki nou'n ganny sa responsabilite akòz i en desizyon ki'n nou'n pran pou nou vin en paran ozordi, nou bezwen, nou bezwen komans mazin ki mannyer nou pou fer. Akòz parey Onorab Bijoux,

in dir loter—Mosyon ek lakantite poursantaz ki'n donneren pou 2024 avek 2023 nou vwar pou dir 2024 in ogmante Mr Speaker.

Mon krwar sa i devret en *wake up call* pou nou tou, e sa osi i pa zis responsabilite sa travayer sosyal ouswa Gouvernman li menm li. Sa i en responsabilite mon krwar preski nou tou ki nou bezwen fer.

Mr Speaker, napa keksoz ki ti bles mon plis koman en dimoun ki travay ki fer en pti *part time* kot en *mortuary* pou ou vwar en lekor en zanfann ki'n pas atraver serten troma.

I fatig ou sa. I fer ou realize koman en paran kwa ki nou bezwen pe fer ozordi? Ozordi kantite zanfann la deor ki pe pas atraver sa bann sityasyon ki pa pe kapab koze ki nou, nou pa pe konnen.

E mwan mon krwar la lakominote nou devret pran sa sityasyon vreman serye. Nou devret pran sa sityasyon koman en keksoz ki ou kapab dir ki nenport letan kot nou pou vwar pou dir ki i annan en zanfann ki dan danze comma nou pou bezwen alert lotorite.

E mwan mon krwar pou dir lotorite ler bann, bann *whistleblower* ou kapab dir vin devan e fer konnen poudir i annan sa bann keksoz ki pe pase nou devret pran li serye.

Nou pa devret pe pran letan pou nou *deal* avek sa bann sityasyon koumsa, nou devret pe pran li serye, nou reakte vitman kot nou anpese demen kot nou vwar pou dir sa zanfann swa i vwar li dan en serten sityasyon - en serten pozisyon li menm li Mr Speaker, kot nou bezwen li menm li reakte dan en fason, kot nou bezwen fer sa dimoun ki responsab, responsab pou li anvoy en mesaz for pou bokou ozordi la deor, ki annan nide pou zot angaz zot dan en keksoz koumsa.

Mr Speaker, ozordi mon demande kwa ki difisil pou en msye rod li en madanm? Ozordi nou annan bokou bann madanm tousel la deor, dan plas nou pou target en zanfann, annou rod nou en madanm dan plas nou target en zanfann vwar?

E mwan mon panse pou dir se ki bann mon vwar Onorab Uranie, laba pe anvoy lavwa mon pa konnen si petet i pe rod en madanm Mr Speaker.

(laughter)

HON MICHEL ROUCOU

Mr Speaker, mwan mon krwar Mosyon ki la sa Mosyon anmennen par Onorab Bijoux, i en Mosyon ki vreman comma ki vreman serye.

I en Mosyon ki annan son lenportans la deor aköz, aköz Mr Speaker, e mon mon krwar pou dir se ki i annan bokou zanfan la deor ki petet zot dan en fason ou en lot zot dan serten sityasyon.

Kot zot pa pe kapab koz pou zot menm e mwan mon krwar pou dir i devret annan bann fason en pti pe pli fasil, kot nou kapab ede pou bann zanfan kapab zot menm zot fer tandè zot lavwa.

E Mr Speaker, mwan zis en serten letan mon annan mwan trwa zanfan mon annan mon de fiy en garson, kot lekol mon krwar i montre zot lafason, i monte zot bann zot bann parti prive personn pa devret touse.

Aküz plizyer fwa mon'n tann—zot pe mansyonn sa li menm li, kot savedir i montre ou pou dir deza dan lekol i annan bann serten travay ki deza pe komans ganny fer.

Me selman i pa vèdir pou dir la deor napa enn sa bann dimoun la deor ki pe asize ki pe veye. E souvandfwa ler ou pou pase dan semen 6 er diswar parey Onorab, Onorab Bijoux, in dir, ou vwar bokou bann zenn zenn pti fiy, zenn pti garson dan fernwar, swa zot pe al laboutik oubyen ou vwar zot ankor pe *roam about* dan distrik.

Dan nou letan nou, nou paran ti donn nou en serten

ler pou nou antre, si apre sa ler ou pa ankor antre, sa bate ki ou pou gannyen mon konnen pou dir konmela pe dir pa koriz zanfan.

Be selman nou pa kapab tro priv paran pou li kapab edik son zanfan, pou li kapab annan en serten lord ki ler i pou antre kot en lakour.

E mwan mon panse pou dir sa Mosyon i vreman enportan. e sa Mosyon li menm li Mr Speaker, i devret ganny pran serye, aköz mon krwar pou dir avek bokou keksoz ki pe arive, lemonn pe ganny pe avans dan en fason vit, e ozordi bokou bann dimoun pe servi atraver *social media* pou zot kapab pran kontak ek bann zanfan.

Bann paran i devret pli *alert* pou zot konnen egzaktèman kwa ki pe pase. E sa zafer kot zanfan i al dormi kot madanm entel, kot zanmi entel la mon pa *believe* ladan. Mon pa krwar pou dir i en keksoz ki devret ganny ankouraze.

Aküz lanmenm sa bann landrwa ki ou vwar souvandfwa kot zanfan i pas dan bann serten keksoz, ki apre demen paran pa konnen.

Mr Speaker, mwan mon pou donn mon sipor sa Mosyon. Mon pou lev mon lanmen tre o aköz koman en paran, e osi koman en dimoun ki pe reste dan en kominote.

Mon panse pou dir sa i devret nou tou responsabilite nou tou pou nou kapab vin en gardyen nou bann zanfan. Mersi.

MR DEPUTY SPEAKER

Mersi Onorab. Prosen entervenans lo lalis i ava Onorab Aglae.

HON EGBERT AGLAE

Mersi Mr Speaker. Mon a dir bonn apre midi tou Manm Onorab, e tou dimoun ki a lekout e osi tou bann petet paran ki annan en lentere dan sa Mosyon, ki petet zot osi zot kapab annan en pros ki'n pas atraver bann sikonstans labi.

Mr Speaker, Mosyon ki devan nou i en Mosyon ki osi nesesisit koman en sosyete serten refleksyon lo lavenir kote nou anvi ale koman en sosyete, koman en pei fas avek sa lemonn global ki nou ladan sa lemonn ouver e sitan ekspoze.

Kot bann diferan form mon kapab dir bann diferan form teknolozi, bann leksperyans ki ganny partaze ouvertman.

Mon dir sa Mr Speaker, aköz ozordi avek zis en telefonn, en *mobile* sirtou si nou'n donn enn nou zanfan si napa bann proteksyon nesesiser lo la avek kot i konsern akse, nou pou vwar zot pe ganny akse ek bann diferan konteni.

E dan menm lenstans nou annan bann paran ki nou ki sipoze gardyen nou bann zanfan, e plizyer nou la anndan nou bann paran nou santi ki parfw zis en pti mankman dan responsabilite dan en sans dan zet en koudey.

Ouswa dan serten sityasyon lavi ki nou pe fer fas avek i kapab sap nou, ouswa nou zanfan i sap nou i tonm dan serten sityasyon.

Mon'n komans koumsa Mr Speaker, aköz mon dir nou bezwen reflesir en pti pe koman en sosyete. Letan mon regard statistik pou lannen pase ki ti ganny pibliye, premye 5 mwan dan lannen 2024 letan mon ti pe regard statistik.

E Minister zafer Lafanmir ki ti pibliy sa ti fer resorti ki annan 85 ka labi seksyel, *ok*. Ti annan 54 ka labi fizik e 42 ka *neglect* anver nou bann zanfan.

Pou mwan sa letan mon regard en statistik parey, i fer mwan reflesir en kantite kwa ki pe arive dan nou sosyete? Kwa ki pe *trigger* serten kalite konportman anti-sosyal ki pe ede vin ver labi nou bann zanfan?

E ti annan en letid osi ki ti ganny fer an 2022 par *Afrobarometer*, ki'n tous senk pwen enportan kot i konsern

nou bann zanfan li menm, labi nou bann zanfan.

Premye pwen ki zot ti fer bann *findings* lo la se kot i konsern disiplin nou bann zanfan, *ok*. E ladan zot ti vwar pou dir en *survey* ki ti ganny fer ti kouven 1,200 adilt.

Pou regard en pe bann persepsyon kot i konsern disiplin avek nou bann zanfan, 50 pousan paran ki ti dan sa *survey* zot ti dir pou dir zot labi lo zot bann zanfan savedir kot zot pe servi lafors fizik avek zot bann zanfan i pa-

Pou zot sa i pa bezwen ganny zistifye ki dan en fason ou pe dir i normal, e 40, e 49pousan (mon a koriz sa en pti kou) 50 pousan pa ti an faver, e 49pousan zot zot ti *endorse* sa kalite *practice* savedir pou zot i *ok*, si en zanfan i ganny korize fizikman *ok* ?

E apre ti al pli devan kot ti konsern *neglect* bann labi e sirtou bann zanfan ki nou apel zot parfw an deor lekol. E ladan nou ti vwar ki 31 pousan bann paran i konsider *neglect* koman labi ek *neglect* koman en problem dan zot kominote.

E 58 pousan ladan ti dezagree pa ti dakor *ok* ? Kot i konsern *availability* pou bann sipor e servis pou bann zanfan ki tonm dan sa bann kategori.

Parey nou annan bann diferan e taler mon pou koz lo

enn de sa bann sa bann parey bann *helpline* ki annan, ki bann departman ki ou kapab akse pou ou bann zanfan ki pe santi pe ganny en labi.

E *findings* ladan ti fer resorti ki 75pousan ti dir ki i annan ase resours ouswa ai annan ase laport pou ou tape kot i annan bann sityasyon ki ou kapab raport bann labi dan lasosyete li menm.

E dernyen *key findings* se kot i konsern Gouvernman li menm, fas avek son bann lentervansyon prosedir kot i konsern *welfare of the child* li menm.

E 71pousan ti dir pou dir Gouvernman ti pe fer en bon travay pour sof gard byennet bann program ki annan pou fer avek *neglect*, e *child abuse*.

E ladan 29pousan pa ti dakor. *Now* Mr Speaker, mon'n tann en entervenon taler ki'n koze in dir sa responsabilite i pa neseserman responsabilite Gouvernman i en responsabilite petet pe get nou paran, bann paran.

Me selman, pou mwan mon pou dir sa i en responsabilite mayon ki annan pou fer ek tou dimoun sa. Gouvernman i annan son bout pou zwe, lasosyete *civil* i annan son rol pou li zwe paran fanmir i annan son rol ki i bezwen zwe.

E bann lotorite konsernen osi parey Lotorite Distrik bann departman i annan rol kle pou zwe kot i konsern proteksyon nou bann zanfan.

En kantite in ganny fer mon pou dir dan lefase kot i konsern proteksyon zanfan e a en pwen mon rapel kot ti annan serten kritik letan roten ti pe pran paran pou konsern zanfan.

Me ozordi nou'n bouze dan sa kalite *mindset* nou'n ariv pli devan ki sa. Ozordi i annan sa ki nou apel *the new helpline for children* kot ou call 116.

Fotespere i ankor marse sa laliny ou kapab ganny bann travayer ki travay avek dan Departman Sosyal byensir, ki osi konpri bann zofisye legal ki kapab donn bann gidans ouswa bann *red flag*, si okenn i kapab paran e menm zanfan i kapab call si i santi i pa pe ganny sa proteksyon neseser, i kapab call sa laliny.

Nou annan *Child Protection Unit* osi ki fer en travay mon kapab dir ase formidab pou kapab regard bann ka ki vin devan zot. E ki parfwa osi i annan prosekisyon legal ki bezwen ganny fer ok? Nou annan *Abuse and Domestic Violence helpline* osi ki annan an egzistan.

Nou annan *Care helpline* ki mon mazine i ankor operasyonnel lontan mon pa tonm nonm *Care*, nou annan *the National Commission for Child Protection* en komite - en komisyen ki'n ganny ti ganny apwente pou regard lo size regilasyon e osi proteksyon pou nou bann zanfan.

I annan ki mon rapel dan lefase kot ti annan sa *Child Law Reform Committee* kot ti pe revwar bann diferan kad legal pou armoniz li e moderniz li pou kapab reflekte lemondn modern ki nou ladan.

E si mon pa tronpe sa travay i ankor *on going*, e mon krwar ti annan en rapor ki ti ganny prezante avek Legzekitiv. Nou annan osi *Committee on the Right of the Child*.

So Mr Speaker, i annan apepre 7 Lenstitisyon la ki mon'n nonmen ki anba lebra gouvernans kot i konsern bann proteksyon.

So, en kantite pa in fer dan lefase e ozordi nou annan sa bann antite ki fer sa. Me *still* nou pe vwar sa *trend* statistik kot labi zanfan i kontinyen ogmante.

Swa *neglect*, swa labi fizik, swa labi seksyel e pou nou i poz kestyon prezan, kwa ki pe al mal dan fabrik sosyete kot nou annan serten endividi - la nou pa blanm tou la nou - serten endividi ki pe kontinyen

koz bann aksyon e letan nou koz aksyon la nou bezwen kategoriz li osi akòz letan mon'n ekout loter Mosyon in koz lo labi zeneral dan en sans, e si nou pe kategoriz parey si nou pe koz labi seksyel i annan son kalite.

Mon pou met li koumsa endividi ki fer sa bann kalite aksyon dan son *mindset* dan en sans. Sa endividi i annan en lot kalite *mindset* konpare en zanfan ki pe ganny en labi fizik.

Li en labi fizik ki pe koz sa aksyon i osi annan en lot kalite *mindset* ki nou bezwen konpran, e ki sosyete i bezwen vwar lo lafason ki adrese pou ariv koumsa.

E osi nou annan *neglect*. I osi i annan sa kalite *mindset* ki vin avek sirtou la nou pe koz paran, ki bann rezon osi ki nou vwar sa.

So, sa i bezwen annan en pti pe letid aprofondi, pou nou kapab konpran en pti git kwa ki pe pase dan sa bann lespri ki pe fer bann aksyon repetitif kontinyen.

Without sa nou pa pou kapab vin avek bann ouswa enplimant bann desizyon ase konkret, pou *tackle* sa sityasyon. Wi, nou pe kriye nou pe dir bezwen arete. Deswit arete wi, i pa akseptab be *if we go to the root*, nou bezwen al rod lakoz akòz *the root of the problem* akòz serten

endividi pe *act* koman iresponsab, imoral anver nou bann zanfan.

Sa ki mon krwar nou'n ariv lo sa *junction* la kot nou bezwen kapab travay ek dimoun. Ozordi Sesel mon ti a swete ki nou ti ava annan plizyer bann *support group* ki a ed paran, ed bann adilt me, souvandfwa sa bann ki pe komet bann *act* zot pa, menm si ou fer sa kalite program zot pa zanmen vini zot zot pa pou vini.

I annan ki *operate* dan *shadow* mon kapab dir ki fonksyonnn dan lannwit, i annan petet ki li menm li i izol son lekor dan lasosyete e i rod son *next* predater la nou pe koz parey labi seksyel.

So Mr Speaker, bann fason fer mon santi petet koman en sosyete, e Gouvernman pou annan en rol ki bezwen zwe ladan ki mannyer nou pou *channel* serten resours pou nou annan bann group sipor kontinyel.

I byen nou annan serten bann *NGOs*, me parfwa nou santi pou dir i pa ase par egzanp, si nou tous lo kote *neglect*, kwa ki fer paran *neglect*? I kapab son fason travay, i sorti granmaten e antre tar. Ouswa i bezwen fer de louveraz, e i napa en lot lizye ki pou regard son zanfan.

Nou konnen pou dir ozordi nou sistenm *social*

housing i pli zou mwen Flat de ou trwa lasanm, e nou nepli viv dan bann *extended family* kot nou ti annan granmanman, gran tonton, frer, ser.

Fanmir ozordi i ganny formen ase boner kot en zenn in ganny en serten laz mazer i deside bouze i kit son paran i ale.

So, i annan en *level of* responsabilite ki sorti dan en sans la, so nou bezwen regard en pti git osi, eski sa pe koz *neglect* kot bann zanfan pe ganny negligize? Ennler 7 er, 8 er diswar nou vwar pe kontinyen pase dan semen. Tousala nou bezwen revwar petet ki mannyer nou paran pe cope ek serten sityasyon lavi ki fer li rann sa.

Mwan mon ti a kontan en *survey* i ganny fer dan sa lanir pou nou vwar la realite *without statistic* dan sa bann konteks parey nou kapab fer bann desizyon ki mal enformen, ouswa ganny bann lenformasyon ki'n mal enformen.

Dezyenmman si nou pe get labi zanfan *ok*, pou mwan sa i sagrinan aköz i annan zanfan ki'n perdi lavi dan sa bann konteks parey, i domaz.

E parfwa osi mwan mon pa anvi montre ledwa lo personn. Me selman konfidans ouswa konfyans ki parfwa nou met dan adilt, serten adilt pou

get lizye lo nou zanfan osi nou bezwen reflesir lo la.

Akoz par deryer ou ledou ou pa konnen ki pase koman en paran letan ou'n kit ou zanfan dan responsabilite en adilt, serten keksoz i kapab arive.

Ouswa nou menm nou letan fanmir i kase, nou anmenn nou entrodwi serten dimoun nouvo dan fanmir tousala i arive kot i annan labi.

E nou bezwen regard sa byen, e kantite keksoz ozordi. Statistik ki la devan mwan mon pe regarde sa i sa ki'n raporte nou konnen i plis ki sa, i annan ki ganny toufe.

Akoz parfwa serten fanmir i annan serten *pride* i pa anvi met sa keksoz o fe an piblik, i montre ou sa e in arive nou'n vwar sa.

So, ankor enn fwa i malere letan ou tann en zanfan anba laz in ganny abize i tonm ansent tou, e menm i annan ki ganny enfekte ek maladi.

So, ou kapab pa konpran pou dir son lavenir in deza i pa ankor grandi i pe ganny brize, i pe ganny tromatize, e i pa akseptab bann keksoz koumsa.

E mwan pou mwan ler ou pe get serten bann santans ki ganny pase parfwa, eski i rezonnab pou dir? Eski nou pa devret vin en pti pe pli sever pou lans en lapel for deor

laba? Pou dir ler ou tous soz en zanfan en lofans ki pli grav ki si ou'n al komet serten pti *petty crime* ki parfwa ou vwar pou dir i ganny regarde koman pli grav ki sa.

E dernyen konteks se bann labi fiziks, fizik ki arive. Labi fizik zanfan i ganny i ganny bate, ouswa i fer serten keksoz forse. E nou'n vwar pou dir bann legzanp Sesel i pa neseserman tro alarman konpare avek serten pei, sirtou dan bann *conflict areas* bann landrwa ki bann pei ki sitan pov kot i annan bann labi fizik ekstrenm lo bann zanfan.

Zanfan depi laz 7 an, 8 an, 9 an pe ganny *subject* avek bann *physical trauma*, nou pe vwar tousala, me dan konteks Sesel nou'n devlope sa kantite nou pa pe neseserman vwar sa kalite pratik konpare ek bann pei ki dan bann pei konfli, ouswa bann pei ki pov ki annan bann *child labours and all*.

Me selman nou bezwen regard li, pa akòz nou statistik lo *physical abuse* dan sa bann sans koumsa i pa that *alarming*.

Me i kapab dan en lot konteks lakoler paran parfwa i fer ki lanmen i ganny leve, ouswa i servi serten mezir avek zanfan petet dan lespri fer zanfan konpran.

Mwan osi mon ti grandi mon ti gannnen, roten, sang pou ganny disiplin dan bann lenstans. Me selman i pa vin en i pa sipoze en palto fann deryer kan zis ou zanfan i fer en aksyon ki ou santi i an deor sa prensip ou fanmir nek ou leve ou tape, ou fer isi ou fer laba.

Pinisyon i vin dan diferan fason konmela. I annan pinisyon ki ou kapab fer li zis par depriv ou zanfan serten keksoz ki pe demann ou, ouswa sa ki kontan servi, i en bann form pinisyon dan en fason emosyonnel ou kapab dir.

Kot ou fer li santi, so tousala i bann ledikasyon ki bezwen ganny fer dan lasosyete pou nou kapab redres en pti pe sa *trend* kot pe arive.

E souvandfwa avek bann labi *neglect* tou kou i annan en laspe psikososyal ki atrape avek, kot osi bann malez sosyal drog, lalkol, labi sibstans bann kondisyon lavi i fer ki sa bann pratik i erite ouswa i ganny pratike.

So, bann lendikasyon i la dan lakominote li, nou kapab konpran ouswa vwar kot bann *trend* i kapab komanse. Letan ou pe get en serten fanmir ou vwar poudir be laba si sa tandans i kontinyen mannyer zot pe anmenn sa zot lavi zot riske tonm dan sa bann kalite

lenfliyans. E pou annan bann aksyon ki ganny swiv letan ou pe vwar zanfan pe grandi dan sa kalite lanvironnman.

So, i annan bann *red flag* deor be prezan ki nou fer ki mannyer nou anmas sa nou? So, i annan en travay kot lasosyete ansanm ek bann lekip Gouvernman, bann departman, bann lenstitisyon ki'n ganny formen pou asiz ansanm enn fwa pour tou.

Annou regarde, e *come up with solution* ki kapab anpese arete e kondannen osi kot i annan ki pe ganny fer tou, severman.

So, avek sa Mr Speaker, mon pou termin la lo sa Mosyon. Mersi.

(APPLAUSE)

MR DEPUTY SPEAKER

Mersi Onorab. I reste nou 5 Manm ki annan lentansyon koze lo sa Mosyon. Nou le fini 5 er so, i reste nou si nou donn larestan Manm ki pou koze 10 minit *we should be able to finish at 5.*

So, *10 minutes* get zot ler mon pou donn laparol la Onorab Desheila Bastienne.

HON DESHEILA BASTIENNE

Mersi Mr Speaker. Bonn apre midi a tous. Mr Speaker, sa Mosyon ki devan Lasanble ozordi i en Mosyon tre apropiye, me i osi en moman

kot nou kapab apel li osi kritik ki demann aksyon desiziv, sever e tre irzan.

Mr Speaker, dan sesyon *question time* Lasanble Nasyonal Mardi le 20 Me 2025 selman de semenn pase, kestyon 68 lo *Order Paper* parey mon'n mansyonnen Mardi le 20 Me 2025 Onorab Anne Bistoquet, Manm Proporsyonnel dan Lasanble Nasyonal ti demann Minis pou zafer Sosyal Minis Patricia Francourt, en kestyon lo labi zanfan e sa kestyon ti al koumsa mon site, "Eski Minis i kapab enform Lasanble lo *statistic* labi kont zanfan pou lannen 2024 e ki sa *statistic* i montre konpare avek sa dernyen 10 an?" Fen sitasyon.

Mr Speaker, dapre repons pou sa kestyon lo labi zanfan i pa'n fer ditou dibyen pou lasosyete, aköz senpleman letan nou pe swete ki labi kont zanfan i desann i plito soka pou aprann ki i konsistaman ogmante.

Mr Speaker, Minis ti menm konfirm la kantite ka ki'n ganny rikord kot divizyon sosyal in anrezistre 425 ka kont labi zanfan pou lannen 2024, tel ki labi fizik, labi seksyèl, labi dan ka neglizans e osi labi emosyonnel.

Mr Speaker, letan nou pas lo sa bann tel ka labi mon, mon pou dir fortman ki i pa

akseptab, e ki i pa ti devret zanmen pe arive dan nou pti pei Sesel. Ankor lo mon kote mwan koman en Manm konsernen mon ti annan kestyon lo aköz logmantasyon dan sa ka labi zanfan ?

mon ti menm kestyonnen, eski lazans konsernen ki pran sa bann ka pa pe fer zot travay koman fodre? Eski zot tro zot pran tro bokou letan pou *deal* avek bann ka parey? Eski zot fer fas avek menas letan zot pe fer zot travay?

Eski Lakour pa pe donn bann abizer santans ase sever pou ki zot pa repet sa bann tel aksyon kriminel ankor? E pou menm arive dekouraz lezot ki pe mazin al lo sa direksyon?

Mr Speaker, letan nou'n antann sa logmantasyon dan labi zanfan letan nou'n antann sa bann ogmantasyon labi zanfan, eski nou pran en letan pou rode, aköz sa bann tel ka i kontinyen arive? Depi lannen 2021 en *helpline* nimerò 116 in ganny entrodwi dan pei pou raport bann ka labi kont zanfan.

Mr Speaker, rikord in demontre ki san *helpline* in vreman efektiv kot bokou ka in ganny rikorde, program edikatif in annan atraver medya sosyal, dan lekol osi byen lo nivo kominoter.

Mr Speaker, ozordi mon pou tir mon sapo avek NCC

ki'n zwe en gran rol dan proteksyon zanfan kont okenn form labi. E i ankor pe zwe sa rol pa zis lo labi zanfan, me lo *parenting* osi kot bokou zenn manman pe ganny byen ankadre lo lafason pou fer grandi e protez zot zanfan.

Mr Speaker, ozordi nou'n aprann ki zanfan zot menm in ganny sa kouraz e pe servi *helpline* pou zot kapab arive raport bann ka labi kont zot.

Tou sa bann mouvman ek rapor ki pe ganny arive, i bann pa ase brav lo tou kote, swa i en vwazen, swa i en zanmi sa viktim, swa i en ansenyan swa li menm li sa paran zot pe ede sov nou bann zanfan inosan.

Me ankor Mr Speaker, kestyon i pou touzour la ki pe kontinyelman sers en larepons aköz ka pe ogmante dan plas desann?

Eski sa bann ka labi i bann nouvo ka, oubyen bann ka ki'n arive, me prezan ki pe ganny rikorde? Eski bann ka eski letan bann ka labi i ganny raporte dan en lakour li menm, eski an premye lazans konsernen i pe al o profon dan sa fanmir li menm?

Pou rode kote sa in komanse kan e ki ler sa bann labi in pran plas. Lekel ki reste dan sa lakour, e lekel ki ti la letan sa ka ti arive?

Mr Speaker, sa Mosyon ozordi i fer nou kontinyen

demann bokou keston tel ki, eski ka labi i bann ka repetitif, ouswa i nouvo ka ki kontinyen ganny raporte?

Eski se menm zanfan ki pe kontinyelman raport a bann soufrans? Ki nou fer ozordi letan nou aprann sa nouvel byen dezapwentan?

Nou sanz stratezi travay lo sa bann ka ? Nou vin pli vizilan paran konsernen, gardyen ? Eski tou manm dan sa lakour osi byen ki sa viktim i ganny met anba sipervizyon pou omwen kapab arive dekouver sours sa labi? Kote i komanse, e lekel ki koupab dan sa sityasyon?

Mr Speaker, i enportan ki sa travay ant paran ek zanfan pa zanmen arete.

I osi enportan ki zanfan i ganny *empower* ki zot pa devret per pou raport lo okenn ka ki zot santi pa normal. E ki sa i en nouvo i en move komansman ki kapab antrenn zot dan en ka ganny abize. Mr Speaker, nou demande e ensiste ki sa *empowerment* i devret pe ganny apiy bokou lo la depi kot lekol.

Nou osi pe rekomande pou lanmour nou bann zanfan inosan, paran silvouple ekout ou zanfan, pran letan koz avek ou zanfan e donn li sa lasirans ki i an sekirite dan ou lebra e ki ou pou defann li a tou pri swa i en garson swa i en fiy. Alor fodre zot pa per pou zot

kapab met zot konfyans dan zot paran.

Mr Speaker, ozordi nou pe sipliye ki lazans i azir pli vit o moman zot ganny bann rapor. sa bann ogmantasyon labi zanfan swa par en endividi, swa par en zanfan ki pe sey raporte ki i pa pe santi li an sekirite.

Ansenyan silvouple profit tou pti moman posib pou koze e *empower* zanfan pou fer tou pou tir sa lafreyer dan zot. E fer zot konpran ki zot devret detase avek bann rekonpans materyel ki zot ganny promes, ki pe apes zot avans devan.

Akoz zot linosans zot dinyite napa pri, bann abizer i la bann abizer i pou zis la pou lespas segonn apre ki zot in satisfè zot pou disparet an kit an en sikatris deryer ki ou pou reste avek pou ou lavi antye.

Mr Speaker, pli gran siplikasyon i al pou paran. Paran silvouple protez ou zanfan parey ou ti pran swen avek li letan i ti a pe grosi dan ou vant pou 9 mwan.

Kontinyen pran menm swen avek zot ziska zot kapab pran zot prop desizyon zot laz mazer, pa les zot zanfan vin viktim bann endividi malad *psycho* mank respe pou imen napa moral napa leker.

Mr Speaker, ozordi atraver sa Mosyon nou eksprim nou lakoler e mekontantman profon lo sa

logmantasyon kontinyel dan ka labi zanfandann nanpòt ki fason. E ankò nou dir ki i pa akseptab ditou e ditou.

Mr Speaker, nou mesaz ozòrdi se ki bann abizè pou bezwen sanz zot konpòtman anver nou bann zanfandann.

Rekonnet gravite souffrans ki zot pe anmèn lo bann paran e dan lasosyete. Si ou ti pas atavè labi la i ou sanz pou ou sov en zanfandann.

E anpes li pas dan sa menm souffrans ki ou ou'n pas ladan, mazin byen ki de mal pa fè en byen.

Silvoup les nou bann zanfandann viv dan lape zot kapab les zot kapab viv zot linosans e grandi dan lazwa ek dinyite.

Mr Speaker, nou reste an solidarite avèk tou viktim osi byen ki zot fanm. An plis nou pare pou nou apòt nou sipò anver tou lazans ki pran konsèrn labi zanfandann akè e pare pou fè tou pou defann nou bann zanfandann, nou trezor, nou bann fitir dirizan nou pei.

Mr Speaker, avan ki mon terminen nou lans en lapel irrevokable avèk Lakour ek tou lorganizasyon konsèrn pou azir vitman e desizivman. Annou zwenn lanmen pran aksyon e fè sir ki lazistis i ganny fè pou met en lafen final lo sa bann krim ki pe pase kont nou zanfandann.

Nou'n tann ase Mr Speaker, mon pou sipò sa Mosyon anmèn par Onorab Gerard Bijoux, e mon swete ki tou mon koleg Onorab, i osi donn tou zot sipò posib anver sa Mosyon. Mersi.

(APPLAUSE)

MR DEPUTY SPEAKER

Mersi Onorab. Mon pou donn laparòl aprezan Onorab Labontè.

HON ANDY LABONTE

Mersi Mr Speaker. Mr Speaker bonn apre midi tou dimoun ki a lekout sa size ki nou pe adrese ozòrdi enn ki grav.

Me souvandfwa nou reste silans lo la. Parey mon bann koleg mon pou koz lo sa size avèk bokou lakoler Mr Speaker.

Nou zoli pti pei ki nou apel li e nou apel nou bann zanfandann bann zoli pti trezor, wi labi zanfandann pe ogmante, e sa i pa zis statistik sa se lavi nou zanfandann.

Nou pti garson e nou bann pti fiy nou fitir zenerasyon, e nou zanfandann i devret santi zot an sekirite dan zot prop lakour, dan zot lekòl e dan zot kominote.

Menm pa tou zanfandann ki en viktim i kapab zis en zanfandann me mon, mon pou kondann menm zis en ka. Me mon anvi

met lanfaz lo en group ki souvandfwa i ganny oublie e sa se bann garson. Zot soufer an silans e zot pa plere an piblik, zot pa toultan ganny tandé. Zot soufrans i souvandfwa ganny kasyet parfwa i manifeste dan par zot konportman ki dan kominote oubyen lekol, par deryer lakoler vyolans oubyen silans total, me nou plito reste trankil oubyen nou pa trouve.

Nou pe viv dan en sosyete kot tro bokou zanfán pe pas atraver sa ki nou pa menm oule prononse, swa labi seksyèl, swa labi fizik, swa labi moral. Bann ki sipoze protez zot souvandfwa se zot ki pe fer sa ditor e sa i pa akseptab.

Mr Speaker, mon dir sa bann agrese get byen dan figir sa bann pti trezor avan komet en tel aksyon.

Ou ki pe fer sa ditor, ou ki pe abiz en zanfán pa krwar ki parski i pa dir nanryen i pa vèdir ki i an sekirite. Mosyon ozordi pe demann ou pou aret sa krim, reviz ou konportman al rod led.

Parski en zour laverite pou sorti e ou pou bezwen fer fas avek lazistis. Atraver sa Mosyon nou osi anvè lans en mesaj spesyalman pou bann viktim.

Ou sa zanfán ou pa tousèl ; ou sa zanfán ou pa koupab ; ou sa zanfán ou pa oblize viv avek sa lapenn ou

tousèl. Nou annan sipor pou ou atraver ban Lenstitisyon, atraver bann profesyonnel, atraver bann travayer sosyal, atraver bann zofisye lapolis, bann group relizye e bokou bann manm kominote ki pare pou ekout ou e ed ou.

Nou oblize kre en lanvironnman kot sak zanfán i santi li annan valè, kot i ganny ekoute, kot i ganny proteze. Bann paran, bann ansenyan, bann *leader* atraver pei, annou pa zis get zis bann fiy. Annou ouver nou lizye pou vwar osi soufrans bann garson.

Bann garson osi i ganny abize. Zot osi bezwen nou sipor. Zot osi zot bezwen profesyonnel. Zot osi zot bezwen konpasyon. Zot osi zot bezwen rekonesans.

Sa Mosyon i osi lans en lapel avek tou lazans konsènen komans par nou bann Manm Parlman, tou bann Minister espesyalman Minister Ledikasyon, Minister Lasante, Minister Sosyal, bann NGO, Legliz osi byen ki medya.

Annou met zanfán an premye, annou aret travay an saylo. Annou met nou resous ansanm. Annou kre en zero proteksyon o tan solid ki agrese pa kapab kas li.

Sa i vèdir plis lenformasyon pou bann profesyonnel ki travay avek

zanfan, plis kanpanny pou ed zanafan e paran rekonnet siny labi. Plis lespwar dan bann Sant Reabilitasyon, plis aksyon dan Tribinal e zero tolerans pou sa bann krim kont zanafan.

Mr Speaker, le 1 Zen nou fe selebre Zournen bann Zanafan e nou dan distrik La Rivyer Anglez nou ti zwenn avek tou bann *child minders* pou en pti dyalog ek donasyon.

E nou'n felisit e rekonnet zot kontribisyon dan kominote. La mon mazin Mis Anna Joseph, Mis Sonia Sinon, Noela Radegonde, Mis Margarette Gomme, Mis Jacqueline Bothe, Mis Natasha Rose, Mis Daniella Charles e Mis Marvelle Julie.

Se bann dimoun se bann dimoun ki pe travay avek bann zanafan e pe fer travay vreman ekstraordiner, e nou rekonnet sa.

Mr Speaker, mwan osi anvi felisit Gouvernman LDS ki atraver IECD in entrodwi en prosedir ki obliz tou endividi, ki travay avek bann zanafan fer en *due diligence* avan angaz dan travay avek zanafan.

Mon swe se ki plis ki ler nou bezwen sanz konversasyon dan nou pei. Aret fer komanter parey garson i pli for sa garson i tro gayar i ti pe rode garson pa merit plere, nou pa kapab fer

sa bann garson e tou zanafan santi ki zot koupab.

Se sa agrese ki koupab. Les en zanafan reste zanafan. Sa Mosyon pe pas en mesaz senp, for e serye. Labi zanafan i reste en krim tou zanafan i merit proteksyon, tou viktim i merit ganny ekoute, e sipor, e led apropiye.

Me tou agrese i oblize arete labi ver bann zanafan, tou abizer i bezwen tretman profesyonnel e fer fas avek lazistis. Mr Speaker, pou terminen mon anvi dir ki nou annan pouvwar pou sanz sa larealite. Nou annan pouvwar pou protez nou zanafan.

Me nou bezwen fer li ansanm avek kouraz, lanmour pou nou zanafan, e pli enportan avek aksyon. Avek sa de mo Mr Speaker, mon pou donn tou mon sipor en tel Mosyon. Mersi.

MR DEPUTY SPEAKER

Mersi Onorab. Mon pou donn laparol aprezan Onorab Pillay.

HON SEBASTIEN PILLAY

Mersi bokou. Bonn apre midi tou dimoun, e bonn apre midi tou dimoun ki pe swiv Lasanble Nasyonal.

Pandan sa apre midi nou'n fer en deba lo en Mosyon ki'n ganny anmennen par en Manm Lasanble lo en size vreman enportan.

Be selman, ler mon pe reflesir lo deba ki nou'n gannye nou tou nou pe fer menm konversasyon. I paret nou tou nou tonm dakor lo menm keksoz.

Me selman, i annan en keksoz ki nou bezwen met an perspektiv nou tou ki la anndan. Tir tou konsiderasyon politik met a kote, e annou get nou rol koman Lasanble Nasyonal.

Lekel ki sipoze asire ki bann lazans, bann antite Gouvernman e tou lezot i fer son travay pou met an plas bann kad legal, *framework*, pou asire ki annan proteksyon pou zanfan, proteksyon kont labi? E sa se nou Lasanble Nasyonal. Me nou problem ki nou annan se ki nou'n sitan polarize lo sa size, pa lo sa size me nou'n sitan polarize ki menm ler en Minis i vin la anndan dan lenstans kot nou pe vwar en logmantasyon eksponansyel dan ka labi zanfan.

Nou zwe en kad politik nou felisit sa Minis pou son travay, me selman la realite i reste ki anba son *watch* nou pa'n zanmen annan plis ka labi zanfan ki nou'n annan ozordi.

Mon pa pe kritik Gouvernman, mon pe kritik en realite. E nou problem prezan ki nou annan se eski

nou senser ler nou dir nou le adres sa sityasyon?

Premyerman i annan en Prozedlwa ki ti'n ganny drafte, e sa prozedlwa i apel *Sexual Offences Bill* en *Proposed Model Law* ki ti ganny donnen avek Prezidan Larepiblik an 2021.

E osi ti annan en rapor mon annan en kopi la dan mon lanmen la mon gete, ki ti en rapor *from the Child Law Reform Committee* e ki sipoze *enhance Child Protection* dan Sesel.

E sa rapor ti fer plizyer rekomandasyon. Par egzanp, sa rapor ti rekomande ki Lalwa Sesel i ganny amande pou enkli en *mandatory reporting* savedir en rapor mandatwar ki ganny fer lo bann dimoun spesifik, bann diferan kategori dimoun, *ok*?

Ki zot pe fer *outreach* e si sa i ganny enkorpoze dan sa *draft Sexual Offences Bill* ki'n fini ganny drafte. E si nou al lo *website* Attorney Zeneral nou pou vwar sa Lalwa.

Kestyon, oli sa Lalwa? Si nou pe koz nou serye, e mwan mon dakor ek tou sa ki'n ganny dir mon *subscribe to* tou sa ki tou dimoun in ganny dir - mon bezwen dir tou dimoun in byen koze.

Me, dan tou sa ki nou pe dir dan nou pe koze oli son aksyon tanzib? Aksyon tanzib ki nou devret pe pran anba

lartik 84 nou Konstitisyon se pou nou pas en tel Lalwa, me i pa la devan nou.

Dezyenmman, ler nou regard bann diferan konponan legal ki egziste ozordi nou swadizan kapab asire ki annan proteksyon zanfann anba nou bann diferan lartik Konstitisyon.

Akoz i ganny defini anba nou Konstitisyon, e ler nou pas dan nou Konstitisyon nou regard bann diferan lartik ki pe *provide* pou proteksyon zanfann, nou vwar poudir nou Konstitisyon menm an sa ki konsern bann drwa fondamantal ki tou dimoun i annan, i osi koz lo en drwa spesyal ki zanfann i annan dan lasosyete pou zourir en proteksyon spesyal.

E nou kot Kod Sivil nou Konstitisyon i defini diferan serten zanfann ek en adilt, e i annan bann kestyon ki nou bezwen reponn.

An se ki konsern par egzanp, akse a kontrasepsyon eksetera, me sa i pa topik deba ki nou annan ozordi.

So, si nou tou nou tonm dakor ki annan keksoz ki nou bezwen fer, *then* nou bezwen les nou lekor ganny gide par bann aksyon ki'n arive ozordi. E *whether or not* nou'n reakte lo sa bann aksyon. Enn bann keksoz ki'n arive ki'n tous mwan ler mon'n fer mon resers otour sa deba ki nou pe

fer ozordi, se sa ka kot sa pti fiy ti perdi son lavi apre sibir plizyer labi, e ler nou regard *transcript* Lakour e mon rapel se Ziz Twomey ki ti donn desizyon ladan.

Sa ka ti ariv ase resaman en kantite sa bann *failings* ki Lakour ti'n idantifye pa'n ganny adrese, e mon krwar *mover* Mosyon in tous sa ler in komans son lentrodiksyon kot sa lakoler ki dir i pe eksprimen.

En kantite sa bann keksoz pa'n ganny adrese. Kestyon fondamantal ki nou bezwen demande se, aköz ki pa'n ganny adrese?

E ki nou koman Lasanble nou kapab fer koman rekomandasyon tanzib pou fer ki sa i ganny adrese? Dan mon lopinyon mon kapab mal, i annan serten keksoz ki nou, nou bezwen fer koman en Lasanble Nasyonal pou nou propoz bann keksoz ki neser.

Par egzanp, mon'n tann koz lo re definisyon kad legal, i neser me selman nou bezwen osi re defini dan konteks kot nou annan en *Sexual Offenders Register as well* pou asire ki i annan ne rikord ki ganny garde lo bann dimoun ki komet lofans dan sa natir kont zanfann.

Akoz sa i ava preskri ki a okenn moman sa dimoun ki komet sa lofans i al reste dan

en lot landrwa, i pou annan posibilite pou nou konnen lekel sa dimoun ki pe fer sa lofans.

E Lalwa bann Lotorite Konsernen i a konnen. Dezyenmman resours otour sa *role out* sa ki mon pou apel li en *vetting process*.

Me sa *policy* ki'n ganny met an plas pou fer ki nenport dimoun ki pou annan en travay ki konekte avek zanfani bezwen ranpli serten dokimantasyon, i bezwen ganny ogmante.

Par egzanp, ozordi okenn dimoun ki en *teacher*, ki en *counsellor* ki annan en rol pou travay ek zanfani, i bezwen annan en sa ki ou apel en *fit for purpose exercise* ki bezwen swiv.

Me sa *fit for purpose exercise* i *only as strong as* resours ki ou annan pou fer sa travay evalyasyon sa dimoun. E si nou pran tou dimoun ki pou fer sa si ou apel sa *fit for purpose exercise* i kapab konplike pou fer li, e se pou sa rezon ki i bezwen bouze, pa zis pou li vin en *policy*, me i bezwen vin en Lalwa si nou tou nou pe tonm dakor pou dir okenn dimoun ki travay avek zanfani i bezwen *meet* en serten standar en serten kriter.

Sa i neser pou ki si Lasanble Nasyonal ozordi apre midi nou serye *about* sa, sa i

bezwen enn bann mesaz ki nou pe lanse an relasyon avek sa aktivite.

En lot keksoz enportan ki nou bezwen re fokaliz lo la, se lefe ozordi ki ler nou koz lo sa size santans e nou regard par egzanp, *maximum* ki egziste anba Lalwa 20 an. E nou regard sa size *Sexual Interference With A Child*, la mon aköz i annan diferan kalite labi e nou'n *focus* en kantite lo lenterferans seksyel.

Be osi nou annan lenterferans diferan fason, labi fizik i annan en pri ki atase avek oubyen en konsekans ki atase avek.

Me par kont, par kont menm konsekans, oubyen menm drwa regar, oubyen menm lanfaz pa ganny mete lo en ka *of consistent physical abuse* ki anmenn en zanfani an grandi san pou vin en *flawed adult* oubyen en adilt ki pa kapab aziste byen ek sosyete.

E mon krwar se sa kot nou bezwen regarde ki mannyer sa lenpak, how nou *do redefine* konteks labi *the concept of abuse* e osi asire ki prezan nou annan en kad legal pou siport li.

E mon krwar i annan posibilite pou servi sa ki'n ganny mete dan sa *Model Law* re amann li, e fer li vin en kad ki nou kapab servi si oule pou lezot eleman ki *involve* labi zanfani parey nou pe dir.

En lo *issue* - en lot keksoz ki mon ti a kontan koz lo la osi se lefe ki, e la petet nou pa pou tonm dakor dan Lasanble Nasyonal e byensir nou konpran nou en *forum* kot parfwa politik i ganny fer.

Me la mon pa pe fer politik strikteman, be nou bezwen regard pou ki rezon par egzanp, ki bann fakter sosyoekonomik ki fer ki mon'n tann bokou dimoun koz lo la.

Ki en paran i bezwen kit son zanf an e al fer trwa, kat louveraz ozordi. Nou kapab pa dakor ek sa *statement* ki mon pe fer, me nou'n dir e i en realite.

So, si annan en keksoz en ka sosyoekonomik ki pe afekte sa paran nou bezwen adrese, eski koman en sosyete lo en kote nou pe ankouraz en dimoun fer plis ki trwa, kat louveraz pou li kapab ganny son reveni?

Me lo lot kote nou vwar en logmantasyon dan ka *neglect*, e *neglect* negliz i *lead to other kinds of abuse*. Eski nou pa devret pe dir pou dir be, an sikonstans en paran ki pa kapab - son *income* pa permet li pou okip serten zanf an avek en kad laz.

Then the subsistence level nou bezwen annan en pli en *better targeted system of subsistence* ki ed sa paran spesifik avek sa kategori zanf an.

En paran ki annan en zanf an en pe pli vye en pe pli sa, ou regard en lot mezir eksetera, eksetera e ou *increase* bann mezir baze lo lafason keksoz pe ganny fer.

Mon pwen i se ki en *one size fit all approach obviously* pa pe marse ozordi, aköz si nou la dan Lasanble pe debat sa 4 er, 5 er mwen zen kar ozordi i vedir pou dir nou annan en konsern ki nou bezwen adrese, e nou bezwen adrese.

Prezan nou vin lo ki rol prezan bann Lenstitisyon i bezwen zwe. *Once* nou'n met tou sa bann *framework* legal, nou'n met tou sa bann keksoz an plas ki rol bann lenstitisyon i bezwen zwe?

E eski bann lenstitisyon i ekipe pou zwe sa rol? Eski *mover* Mosyon i pare pou al osi lwen pou dir ki i bezwen annan en tas fors ki ganny etabli?

Kot nou dir pou dir in annan, nou'n idantifye pou dir i annan zanf an ki pe *roam about* mon'n tann dir 8 er mon'n tann dir 9 er mon'n tann dir isi laba.

En tas fors ki zisteman zot rol se pou regard *whether or not* ou annan zanf an anba laz ki lo semen, oubyen dan bann landrwa ki zot pa sipoze ete tel ler.

Are we prepared to go that far? Ou bezwen serye si

nou le - nou pa kapab pran *half measures* la nou bezwen pran bann mezir ki konkret e ki *go all the way* pou adres bann problem ki nou pe koz lo la.

Irespektiv ki politik ou annan nou pe koz lo zanfán, nou sitye lo zanfán e nou dir lala bann keksoz ki nou pe fer. E la dan lankadremán ledikasyon nou osi eski nou pou *go as far* azir ki nou devret annan bann *truancy officers* pou asire ki bann zanfán ki sipoze dan lekol letan lekol pe ganny fer, ou pa vwar zot pe marse dan semen.

E prezan kot i annan en problem ki souleve, dan premye ka en paran ki travay e son zanfán i kot lakaz e li in bezwen ale al travay.

That is *neglect* e i en lofans, *all the more reason* pou adres sa problem. Dan dezyenm ka en zanfán ki sipoze lekol e pa'n al dan lekol e son paran in al travay i *truancy*.

Me osi sa paran i pou vin an defo akòz Konstitisyon i koz lo *compulsory schooling* savedir i pou bezwen *compulsory*, be i devret dan lekol a sa moman.

So, largiman senp i se ki nou bann Lenstitisyon Sosyal ki nou annan i bezwen ganny ranforsi pou zot kapab *deal* avek sa bann sityasyon.

E se pou sa rezon ki ler nou pe regard, mon pe regard sa rapor ki devan mwan e travay ase konpreansiv ki'n ganny fer, an prenon kont bann diferan provizyon legal ki egziste lokalman e enternasyonal.

Bann diferan lartik bann Konstitisyon lartik bann konvansyon, e nou bezwen prezan met li an perspektiv avek konteks Zidisyer ki mannyer i ganny aplike dan Lalwa.

Ki mannyer Lalwa i fer sir pou ekomiz bann remed ler i ariv bann lenstans labi, pe enport dan ki laform, nou vwar poudir nou en sosyete ki annan en mankman.

E pou nou adres sa mankman nou bezwen pa adres zis sa labi li menm, me nou bezwen adres lakoz ki kre sa labi.

E se pou sa rezon ki mon, mon krwar poudir si Lasanble nou serye nou pou bezwen pe anvoy en rapor kot Legzekitiv ki donn bann mezir, e bann propozisyon bann mezir ki kler.

Akòz *then* nou pou'n zis fer tou sa ki bann Lasanble presedan, oubyen tou bann deba presedan in fer se zis koz lo la *and then* napa aksyon.

E apre pli tar en group dimoun i vini i dir ou nou deplor lakantite ka labi ki pe ogmante.

Akoz nou bezwen realis pou dir nou bi ozordi se sanz sa konteks, e fer ki nou anmenn en lenfliyans pou sanz sityasyon mannyer i ete ozordi.

Enn bann keksoz ki'n *strike* mwan Mr Speaker, se lefe ki nou bliye konpletman ki pou dir malgre en zanfan i en zanfan, i annan bann menm proteksyon ki en adilt anba nou Konstitisyon.

E dan lartik 27 nou Konstitisyon i dir poudir, tou dimoun i annan en drwa pou zot pa ganny diskriminen, be zot osi annan drwa a proteksyon egal devan nou devan Lalwa.

I enteresan sa Mr Speaker, aköz si nou regard sa byen i vedir pou dir, eski Leta pe enport lekel ki la.

Eski Leta in *fail* dan son *duty of care* pou *uphold* nou Konstitisyon an se ki konsern proteksyon egal ki zanfan i bezwen gannnen anba Lalwa?

Mon ti a kontan *Mover* Mosyon i reflekte lo la aköz anmenn en *Sexual Offences Bill* pa vedir ou'n amenn en *Bill* pou protez drwa zanfan. I en *Bill* ki *deal* avek *Sexual Offences* i pa *deal* strikteman avek *the concept of abuse of* zanfan.

Me i *part and parcel of* sa *mechanism* ki ou bezwen annan an plas. So, kekyon ki nou bezwen demann nou

lekor, se ki Leta dan sa konteks nou leta Sesel nou bezwen fer ler mon dir li nou tou ki la anndan.

Nou bezwen fer pou asire ki nou protez drwa zanfan ki nou annan kad legal ki protez sa zanfan, nou annan striktir e *framework* administratif e entitisyonnel ki protez drwa zanfan.

Me pli enportan nou annan striktir sosyoekonomik ki anpese ki zanfan i vin viktim labi, i bann kekyon vremen difisil pa fasil pou reponn.

Be selman i bann kekyon ki nou bezwen reponn, e probableman nou pa pou trouv larepons dan nou *lifetime* koman en Lasanble oubyen dan 8enm Lasanble.

Me i ava bann kekyon ki kontinyelman ganny reponn par bann diferan Lasanble siksesiv e bann diferan Gouvernman siksesiv ki ava reponn sa bann kekyon ki nou pe koz lo la ozordi.

An konklizyon, mon pou retourn lo sa *roadmap* ki ti ganny prezante avek sa Lalwa ler ti ganny prezante.

So, rekomandasyon sete ki Prezidan i fer en revi e partaz sa rapor avek tou bann Minister ki relevan, e bann departman pou adres sa bann kekyon avek sa *Child Law Reform Committee*.

Dezyenm rekomandasyon, sete pou

apwent en *Ministerial Steering Committee* pou fer rekomandasyon avek CLRC e apre sa sete Minis pou *Employment and Social Affairs* ki sipoze *Chair* sa *Steering Committee*.

Trwazyenm, sete pou annan bann *Public and Child Friendly Consultation on the draft Sexual Offences Law*.

E katriyenm Prezidan an konsiltasyon avek CLRC *Child Law Reform Committee* i determinen ki si manda sa *Chil Reform Committee* i devret *extended altered* e son konpozisyon ganny aziste.

As *it stands* la nou pa ankor *meet* sa bann rekomandasyon ki la an antye, petet enn rekomandasyon Lasanble Nasyonal i ti devret demande.

Demann re Konstitisyon sa Komite pou vwar si lenplimantasyon sa Lalwa i kapab ganny fer *within lifespan* sa Lasanble mon pa konnen si sa pou posib.

Me i ava byen boner dan lavi sa lot Lasanble ki ava pe vini, mon pou siport sa Mosyon e mon'n adres mon ban konsern dan en fason fran e onnet e mon swete ki *mover* Mosyon i ava annan bann rekomandasyon ki serye.

Akoz nou tou nou'n koz lo bann size lo bann keksoz ki in arive, me sa ki nesaser prezan se pou nou propoz

bann aksyon konkret ki bezwen ganny pran. Mersi bokou.

(APPLAUSE)

MR DEPUTY SPEAKER

Mersi Onorab. E parey mon ti'n dir boner, i nou lentansyon pou nou termin travay ozordi 5 er. So, ki fer nou pa'n kapab fini *go through* lalis bann dimoun ki'n eksprim lentere pou koze; i reste mon 3 Manm lo lalis, enkli *right of reply* Loter Mosyon.

So, ki nou pou fer parey – parfwa i le ka *we'll spillover tomorrow* so nou ava, nou ava-*unless* i annan en lot dimoun ki le eksprim lentere pou koze demen lo sa Mosyon.

Mon vwar en lot la, *ok*, so i ava fer 4 i fer 5 avek so 5 enterven an *plus right of reply* sa i demen bomaten, *ok very well*. So, nou ava *adjourn* la e nou ava repran travay avan nou ale.

Nou pa'n ganny okenn kominikasyon *where's the Chief Whip of LDS Deputy Chief Whip?*

HON EGBERT AGLAE

Yes, Mr Speaker, *you mean Chief Whip of US.*

MR DEPUTY SPEAKER

Yes ki mon'n dir?

HON EGBERT AGLAE

Ou'n dir *LDS*.

MR DEPUTY SPEAKER

Sorry.

HON EGBERT AGLAE

In al *attend* en komitman in ranpli son *form*, e i pou –

MR DEPUTY SPEAKER

Ok sekreter pa ankor gannyen akoz i enportan nou ganny sa, akoz si non i pou *constitute of in* absan *without the leave of the Speaker*, e ou konnen ki son pinisyon pou sa.

HON EGBERT AGLAE

Yes, in fini ranpli son le *form* Sekretarya i ava resevwar demen.

MR DEPUTY SPEAKER

Zis fer nou gannyen. Mersi, donk nou ava *adjourn* e nou ava rebran travay demen bomaten 9er.

(ADJOURNMENT)